

INCIPIT LIBER IESU FILII SIRACH

Contents

INCIPIIT LIBER IESU FILII SIRACH

1 Prologus Multorum nobis et magnorum per legem, et prophetas, aliosque qui secuti sunt illos, sapientia demonstrata est, in quibus oportet laudare Israëli doctrinæ et sapientiæ causa, quia non solum ipsos loquentes necesse est esse peritos, sed etiam extraneos posse et dicentes et scribentes doctissimos fieri. Avus meus Iesus, postquam se amplius dedit ad diligentiam lectionis legis, et prophetarum, et aliorum librorum qui nobis a parentibus nostris traditi sunt, voluit et ipse scribere aliquid horum quæ ad doctrinam et sapientiam pertinent, ut desiderantes discere, et illorum periti facti, magis magisque attendant animo, et confirmentur ad legitimam vitam. Hortor itaque venire vos cum benevolentia, et attentiori studio lectionem facere, et veniam habere in illis, in quibus videmur, sequentes imaginem sapientiæ, deficere in verborum compositione. Nam deficiunt verba hebraica, quando fuerint translata ad alteram linguam: non autem solum hæc, sed et ipsa lex, et prophetæ, ceteraque aliorum librorum non parvam habent differentiam quando inter se dicuntur. Nam in octavo et trigesimo anno temporibus Ptolemæi Evergetis regis, postquam perveni in Ægyptum, et cum multum temporis ibi fuisset, inveni ibi libros relictos, non parvæ neque contemnendæ doctrinæ. Itaque bonum et necessarium putavi et ipse aliquam addere diligentiam et laborem interpretandi librum istum: et multa vigilia attuli doctrinam in spatio temporis, ad illa quæ ad finem ducunt, librum istum dare, et illis qui volunt animum intendere, et discere quemadmodum oporteat instituere mores, qui secundum legem Domini proposuerint vitam agere. [Omnis sapientia a Domino Deo est: et cum illo fuit semper, et est ante ævum. ¹ ² Arenam maris, et pluvie guttas, et dies sæculi, quis dinumeravit? altitudinem cæli, et latitudinem terræ, et profundum abyssi, quis dimensus est? ² ³ sapientiam Dei præcedentem omnia, quis investigavit? ⁴ Prior omnium creata est sapientia, et intellectus prudentiæ ab ævo. ³ ⁵ Fons sapientiæ verbum Dei in excelsis, et ingressus illius mandata æterna. ⁴ ⁶ Radix sapientiæ cui revelata est? et astutias illius quis agnovit?

¹+ **1.1 Omnis sapientia,** etc. RAB. in Eccli., tom. 3. Incipit ab æterna Dei sapientia, quæ Christus est, qui cum Patre est semper ante sæcula, secundum illud: In principio erat Verbum, et Verbum erat apud Deum Joan. 1.. A Domino Deo est. Quia Christus fons vitæ, lux vera, de Patre nascitur, et omnia per ipsum facta sunt, et sine ipso factum est nihil Ibid.. Quisquis hac sapientia caret, in tenebris ambulat, et nescit quo vadat. Sapientia enim huius mundi stultitia est apud Deum; et prudentia carnis, mors Sap. 11..

²+ **1.2 Arenam maris et pluvie guttas.** RAB. ubi supra. Corporalia spiritualibus comparat, ut ex difficillimis, quod omnino impossibile est, æstimeretur. Si enim hæc quæ in certo numero et mensura, et pondere condita sunt, nemo potest dinumerare; quanto minus sapientiam Dei sine initio et sine fine inenarrabilem inæstimabilem poterit investigare?

³+ **1.4 Prior omnium creata est.** Creata secundum humanitatem in consilio Dei patris, scilicet pro salute humani generis prædestinata est incarnari. Notandum autem quod propter unitatem personæ aliquando Christus dicitur genitus, aliquando creatus.

⁴+ **1.5 Fons sapientiæ.** Origo omnis sapientiæ a Verbo Dei procedit, quod Deus ex Deo

⁵ ⁷ disciplina sapientiæ cui revelata est et manifestata? et multiplicationem ingressus illius quis intellexit? ⁸ Unus est altissimus, Creator omnipotens, et rex potens et metuendus nimis, sedens super thronum illius, et dominans Deus. ⁹ Ipse creavit illam in Spiritu Sancto, et vidit, et dinumeravit, et mensus est: ⁶ ¹⁰ et effudit illam super omnia opera sua, et super omnem carnem, secundum datum suum, et præbuit illam diligentibus se.] ¹¹ [Timor Domini gloria, et gloriatio, et lætitia, et corona exultationis. ⁷ ¹² Timor Domini delectabit cor, et dabit lætitiã, et gaudium, et longitudinem dierum. ⁸ ¹³ Timenti Dominum bene erit in extremis, et in die defunctionis suæ benedicetur. ¹⁴ Dilectio Dei honorabilis sapientiã: ⁹ ¹⁵ quibus autem apparuerit in visu diligunt eam in visione, et in agnitione magnalium suorum. ¹⁶ Initium sapientiæ timor Domini: et cum fidelibus in vulva concreatus est: cum electis feminis graditur, et cum justis et fidelibus agnoscitur. ¹⁷ Timor Domini scientiæ religiositas: ¹⁰ ¹⁸ religiositas custodiet et justificabit cor; jucunditatem atque gaudium dabit. ¹⁹ Timenti Dominum bene erit, et in diebus consummationis illius benedicetur. ¹¹ ²⁰ Plenitudo sapientiæ est timere Deum, et plenitudo a fructibus illius. ²¹ Omnem domum illius implebit a generationibus, et receptacula a thesauris illius. ²² Corona sapientiæ timor Domini, replens pacem et salutis fructum: ²³ et vidit, et dinumeravit eam: utraque autem sunt dona Dei. ¹² ²⁴ Scientiam et intellectum prudentiæ sapientiã compartietur, et gloriam tenentium se exaltat. ²⁵ Radix sapientiæ est timere Dominum, et rami illius longævi. ¹³

semper cum Patre manet in cœlis; sed ingressus mundum per dispensationem humanitatis dedit mandata salutis, unde, Verba vitæ æternæ habes Joan. 6..

⁵ + **1.6 Radix sapientiæ.** Ostendit neminem posse profunditatem Dei penetrare, vel magnitudinem bonitatis ejus et misericordiæ. Unde ad liberationem et illuminationem humani generis homo fieri dignatus est, unde: Generationem ejus quis enarrabit Isa. 53.?

⁶ + **1.9 Ipse creavit illam.** Unigeniti scilicet adventum, per Verbum sibi coæternum cum Spiritu sancto dispensavit: quomodo per Virginis partum ad salutem mundi veniret, et creaturas repararet, et hominem ad agnitionem et dilectionem sui revocaret, dans illi donum Spiritus sancti, ut ejus munere solvetur in æternum.

⁷ + **1.11 Timor Domini gloria,** etc. Beatus vir qui timet Dominum, in mandatis ejus cupit nimis. Gloria et divitiæ in domo ejus Psal. 3., etc. Timor Domini. Duæ species sunt timoris. De altera dicitur, Timor [non est in charitate] animæ in charitate, Joan. 4., etc. Qui hunc habent propter metum gehennæ peccare desinunt, et vitam corrigunt: hic introducit charitatem, sed et foras mittitur. Qui enim sic timet, nondum amat nec desiderat bona, sed cavet mala; sed tamen se corrigit, et bona desiderare incipit. De altera scriptum est, Timor Domini sanctus permanet in sæculum sæculi Psal. 18.. Timet enim unusquisque ne amittat bona, et Dei præsentiam, quæ in æternum frui desiderat, de quo dicitur:

⁸ + **1.12 Timor Domini delectabit cor.** Hic suavitatem tribuit internam, et in futuro vitam æternam.

⁹ + **1.14 Dilectio,** RAB. Charitas Dei vera est sapientiã, etc., usque ad ipsa in futuro remuneratio erit; unde: Adimplebis me lætitiã cum vultu tuo, delectationes in dextera tua Psal. 15., etc.

¹⁰ + **1.17 Timor Domini.** Sine timore Dei, et observatione mandatorum ejus, nulla religio est; unde: Si quis putat se religiosum esse, non refrenans linguam suam, sed seducens cor suum, hujus vana est religio Jac. 1..

¹¹ + **1.19 Timenti Dominum.** Qui scilicet timore Dei in fide et doctrina et operatione regulam justitiæ servat.

¹² + **1.23 Et vidit.** RAB. In conspectu ejus sunt omnia, unicuique conservat dignam retributionem.

¹³ + **1.25 Rami.** Per sapientiã, divinam habet homo scientiam vitandi malum, et intellectum

²⁶ In thesauris sapientiæ intellectus et scientiæ religiositas: execratio autem peccatoribus sapientia. ¹⁴ ²⁷ Timor Domini expellit peccatum: ¹⁵ ²⁸ nam qui sine timore est non poterit justificari: iracundia enim animositatis illius subversio illius est. ²⁹ Usque in tempus sustinebit patiens, et postea redditio jucunditatis. ³⁰ Bonus sensus usque in tempus abscondet verba illius, et labia multorum enarrabunt sensum illius. ¹⁶ ³¹ In thesauris sapientiæ significatio disciplinæ: ³² execratio autem peccatori cultura Dei. ³³ Fili, concupiscens sapientiam, conserva justitiam, et Deus præbebit illam tibi. ¹⁷ ³⁴ Sapientia enim et disciplina timor Domini: et quod beneplacitum est illi, ¹⁸ ³⁵ fides et mansuetudo, et adimplebit thesauros illius. ³⁶ Ne sis incredibilis timori Domini, et ne accesseris ad illum duplici corde. ¹⁹ ³⁷ Ne fueris hypocrita in conspectu hominum, et non scandalizeris in labiis tuis. ²⁰ ³⁸ Attende in illis, ne forte cadas, et adducas animæ tuæ inhonorationem: ²¹ ³⁹ et revelet Deus absconsa tua, et in medio synagogæ elidat te: ⁴⁰ quoniam accessisti maligne ad Dominum, et cor tuum plenum est dolo et fallacia.]

2[Fili, accedens ad servitatem Dei sta in justitia et timore, et præpara

faciendi bonum, utrumque enim in auditore operatur in fine; unde: Qui audit me, non confundetur, et qui operantur in me, non peccabunt. Qui elucidant me, vitam æternam habebunt Eccli. 24.. Initium sapientiæ, timor Domini. Intellectus bonus omnibus facientibus eum Psal. 110..

¹⁴ + **1.26 In thesauris.** In legis meditatione utrumque declaratur, quomodo scilicet vitanda sunt mala, et quomodo discenda spiritualis sapientia, et exercenda bona opera, in quibus est religio vera. Sapientiæ intellectus. Quæ prohibet peccata, et carnalia desideria; unde: Non amat pestilens eum qui se corrigit, nec ad sapientes graditur Prov. 15..

¹⁵ + **1.27 Timor,** etc. Quia per pœnitentiam mundat a præteritis peccatis, vel prohibet a committendis. Quia qui per timorem Dei sese non corrigit, in peccati voraginem cadit.

¹⁶ + **1.30 Bonus sensus.** Unde in Proverbiis, Labia sapientium custodiunt eos Prov. 14.. Et alibi: Astutus omnia agit cum consilio: qui autem fatuus est aperuit stultitiam Ibid. 31.. Sapientis ergo hominis est verba tenere, et omnia modeste peragere. Enarrabunt sensum. Æquanimiter, non mala pro malis, sed bona pro bonis tribuens.

¹⁷ + **1.33 Fili, concupiscens sapientiam.** Qualiter ad sapientiam pervenias, ipsa sapientia monstrat, quia sine conservatione justitiæ, nemo pervenit ad culmen sapientiæ, unde Jacobus: Quis sapiens, inquit, et disciplinatus inter vos? ostendat conversationem bonam in mansuetudine sapientiæ Jac. 3..

¹⁸ + **1.34 Sapientia enim et disciplina.** RAB. Sicut sæpe dictum est, Timor Domini sapientiæ et disciplinæ custodia est Prov. 13., cui convenit fides recta, et morum temperantia, quia sine fide impossibile est placere Deo, et bonorum vita semper tranquilla est; unde in Matthæo: Discite a me, quia mitis sum et humilis corde, et invenietis requiem animabus vestris Matth. 11.. Qui enim vere timet Deum, non potest esse sine fide, et operibus bonis, quæ replent hominem virtutibus, et Deo acceptabilem faciunt. Unde: Homini bono in conspectu suo dedit Deus sapientiam et scientiam et lætitiā. Peccatori autem dedit afflictionem et curam superfluam Eccle. 2..

¹⁹ + **1.36 Duplici corde.** Vir duplex animo, inconstans est in omnibus viis suis, qui scilicet vult gaudere cum sæculo et regnare cum Christo.

²⁰ + **1.37 Hypocrita.** Aliud corde gestans, et aliud opere monstrans. Unde: Attendite a falsis prophetis, qui veniunt ad vos in vestimentis ovium Matth. 7..

²¹ + **1.38 Attende in illis,** etc. Manifestum est, quod qui sequitur hæreticos, animæ suæ acquirit damnationem, quia in judicio revelabuntur occulta cordium, et reddetur unicuique secundum opera sua, Disperdet enim Deus omnes qui loquuntur mendacium Psal. 61.. Qui abominatur virum sanguinum et dolosum; unde: Attendite a fermento Phariseorum, quod est hypocrisis. Et alibi: Veniet Dominus servi illius, et dividet eum; partemque ejus ponet cum hypocritis, ibi erit fletus et stridor dentium Matth. 24..

animam tuam ad tentationem. ²² ² Deprime cor tuum, et sustine: inclina aurem tuam, et suscipe verba intellectus: et ne festines in tempore obductionis. ³ Sustine sustentationes Dei: conjungere Deo, et sustine, ut crescat in novissimo vita tua. ⁴ Omne quod tibi applicitum fuerit accipe: et in dolore sustine, et in humilitate tua patientiam habe: ²³ ⁵ quoniam in igne probatur aurum et argentum, homines vero receptibiles in camino humiliationis. ⁶ Crede Deo, et recuperabit te: et dirige viam tuam, et spera in illum: serva timorem illius, et in illo veterasce.] ²⁴ ⁷ [Metuentes Dominum, sustinete misericordiam ejus: et non deflectatis ab illo, ne cadatis. ²⁵ ⁸ Qui timetis Dominum, credite illi, et non evacuabitur merces vestra. ²⁶ ⁹ Qui timetis Dominum, sperate in illum, et in oblectationem veniet vobis misericordia. ²⁷ ¹⁰ Qui timetis Dominum, diligite illum, et illuminabuntur corda vestra. ¹¹ Respicite, filii, nationes hominum: et scitote quia nullus speravit in Domino et confusus est. ²⁸ ¹² Quis enim permansit in mandatis ejus, et derelictus est? aut quis invocavit eum, et despexit illum? ¹³ Quoniam pius et misericors est Deus, et remittet in die tribulationis peccata, et protector est omnibus exquirentibus se in veritate.] ¹⁴ [Væ duplici corde, et labiis scelestis, et manibus malefacientibus, et peccatori terram ingredienti duabus viis ! ²⁹ ¹⁵ Væ dissolutis corde, qui non credunt Deo, et ideo non

²² + **2.1 Fili, accedens**, etc. Demonstravit quid sit vitandum, nunc demonstrat quid sit agendum, dicens: Fili, accedens ad servitum Dei sta in justitia et timore. Qui enim vult ab illecebris mundi se abstinere, et in Christo pie vivere, persecutionem patitur. Dum enim accingi divino servitio præparat, bellum diaboli contra se excitat, et dum alia vitia subdit, aliis reluctatur, et divina dispensatione agitur, ut superet et superetur, ne extollatur. Sed quia humilitas et patientia illi necessaria est, sequitur, Deprime cor tuum, et sustine, etc.

²³ + **2.4 Patientiam habe**. Quasi: In patientia vestra possidebitis animas vestras Luc. 21., quia scilicet radix et custos omnium virtutum patientia est. Sciendum autem est, quod patientia tribus modis exercetur. A Deo enim flagellamur, sed cavendum est ne murmuremus; a proximo persecutiones, et damna, et contumelias sustinemus, et cavendum est ne mala pro malis retribuamus; ab adversario tentamur, sed prospiciendum est ne ad delectationem peccati vel consensum flectamur, vel pro his præsentia quæramus, sed futura exspectemus.

²⁴ + **2.6 Crede Deo et recuperabit te**. RAB. Credere oportet afflictum, et dirigere gressus operum in Dei conspectum, et sperare in illum; unde: Revela Domino viam tuam, et spera in eo, et ipse faciet. Psal. 36.. Hinc Jeremias ait: Beatus qui confidit in Domino, et erit Deus fiducia ejus Jer. 17., etc.

²⁵ + **2.7 Metuentes Dominum**, etc. Beneplacitum est Domino super timentes eum, et in eis qui sperant super misericordia ejus Psal. 146.. Qui enim veraciter metuit, patienter sustinet miserationem ejus: Qui autem dereliquerint Deum, confundentur et in terra scribentur Jer. 17..

²⁶ + **2.8 Qui timetis Dominum, credite illi**. Hortatur timentes Dominum ut credant illi, qui ad certam mercedem perveniant; unde: Justus enim ex fide vivit Rom. 1.; unde: Confide, fili, remittuntur tibi peccata tua Matth. 9.. Et alibi: Fides tua te salvum fecit Ibid., 10..

²⁷ + **2.9 Qui timetis Dominum, sperate in illum**. Tria commendat timentibus Deum: credere, sperare, diligere; quia fide, spe et charitate vere colitur Deus, et ad contemplationem pervenitur, quæ est beatitudo æterna.

²⁸ + **2.11 Respicite**, etc. RAB. Hic quoque tria dicit, etc., usque ad quia sacrificium Deo spiritus contribulatus Psal. 50., etc. Et, Prope est Deus omnibus invocantibus se in veritate Psal. 144..

²⁹ + **2.14 Væ duplici corde**, etc. Admonuit, ne quis duplici corde accederet ad Deum; nunc autem dicit, Væ duplici corde et labiis scelestis. Qui enim prava cogitat, et loquitur, et pravis insistit operibus, nisi pœnituerit, in æternum peribit. Duabus viis terram ingredientis qui facit mala, et sperat bona; vel, qui carnis sectatur opera, et spiritus sanctificationem se arbitratur perficere

protegentur ab eo ! ³⁰ ¹⁶ Væ his qui perdiderunt sustinentiam, et qui dereliquerunt vias rectas, et dixerunt in vias pravas ! ¹⁷ Et quid facient cum inspicere cœperit Dominus? ³¹ ¹⁸ Qui timent Dominum non erunt incredibiles verbo illius: et qui diligunt illum conservabunt viam illius. ³² ¹⁹ Qui timent Dominum inquirent quæ beneplacita sunt ei, et qui diligunt eum replebuntur lege ipsius. ²⁰ Qui timent Dominum præparabunt corda sua, et in conspectu illius sanctificabunt animas suas. ³³ ²¹ Qui timent Dominum custodiunt mandata illius, et patientiam habebunt usque ad inspectionem illius, ²² dicentes: Si pœnitentiam non egerimus, incidemus in manus Domini, et non in manus hominum. ²³ Secundum enim magnitudinem ipsius, sic et misericordia illius cum ipso est.]

3[Filii sapientiæ ecclesia justorum, et natio illorum obedientia et dilectio. ² Judicium patris audite, filii, et sic facite, ut salvi sitis. ³⁴ ³ Deus enim honoravit patrem in filiis: et iudicium matris exquirens, firmavit in filios. ⁴ Qui diligit Deum exorabit pro peccatis, et continebit se ab illis, et in oratione dierum exaudietur. ³⁵ ⁵ Et sicut qui thesaurizat, ita et qui honorificat matrem suam. ⁶ Qui honorat patrem suum jucundabitur in filiis, et in die orationis suæ exaudietur. ³⁶ ⁷ Qui honorat patrem suum vita vivet longiore, et qui obedit patri refrigerabit matrem. ⁸ Qui timet Dominum honorat parentes, et quasi dominis serviet his qui se genuerunt. ⁹ In opere,

in timore; vel, quod Dei est opere exhibet, et quod mundi est, cogitatione quærit. Tales vero inconstantes sunt in omnibus viis suis, quia facile in adversis terrentur, et prosperis irretiuntur.

³⁰ + **2.15 Dissolutis corde**, etc. RAB. Adhuc docet errorem cavere, etc., usque ad his, qui non acquiescunt veritati, credunt autem iniquitati, ira et indignatio, etc.

³¹ + **2.17 Inspicere**, etc. Licet omni tempore inspiciat omnia Deus, tunc tamen inspicere dicitur, cum probare vel improbare aliquid dignoscitur.

³² + **2.18 Qui timent Dominum, non erunt incredibiles**, etc. Alternando de amore et dilectione Dei agit, quia timor Domini sanctus, permanens in sæculum sæculi Psal. 18., et omnis qui diligit, ex Deo natus est, et cognoscit Deum I Joan. 4.. Qui vero timet Deum, et diligit, et credit Scripturis, servat operando præcepta Dei, et semper meditando quærit quæ beneplacita sunt illi, replebitur ergo sapientia et charitate Dei. Finis enim præcepti charitas, et qui diligit proximum, legem implevit.

³³ + **2.20 Qui timent Dominum præparabunt**, etc. Felix anima, quæ quotidie mundat cor suum ut suscipiat habitorem Deum, cujus possessor nullo eget bono, quia omnium bonorum auctorem in se habet. Et quia ad hoc necessaria est mandatorum custodia, et boni operis patientia, qua pervenitur ad agnitionem veritatis, sequitur: Qui timent Dominum custodiunt mandata illius, etc. Justus in primis accusator est sui. Sicut enim humilitati præmium, sic superbiam restat supplicium; unde Joannes: Si dixerimus quoniam peccatum non habemus, ipsi nos seducimus II Joan. 1.. Qui vere sapiens est, verus justitiæ cultor est, quia sapientia dicitur justitiæ normam.

³⁴ + **3.2 Judicium patris**. Dei, ex quo omnis paternitas in cœlo et in terra. Quia ex ipsa sunt omnia. Qui diligit ea, quæ fecit, et ut in eo maneant, quo facta sunt, cujus iudicium, qui audierit, et præcepta ejus fecerit, salvus erit: cujus mandatum est, ut etiam patri temporali, et matri reverentia exhibeatur; unde: Honora patrem tuum Deut. 5., etc.; unde sequitur: Qui honorat patrem suum. Cui Deum honorem constituit, non debet a filiis inhonorari: quia Deus iudicio suo exquiret qualiter præceptum suum servetur.

³⁵ + **3.4 Qui diligit**. Qui scilicet mandata servat, et abstinet a peccatis, et tamen pro excusoribus orare non desinit, quia scit misericordem iudicem omni tempore preces exaudire.

³⁶ + **3.6 In filiis**. RAB. In sobole vel in discipulis, etc., usque ad honorare parentes primum mandatum est in promissione.

et sermone, et omni patientia, honora patrem tuum,³⁷ ¹⁰ ut superveniat tibi benedictio ab eo, et benedictio illius in novissimo maneat. ¹¹ Benedictio patris firmat domos filiorum: maledictio autem matris eradicat fundamenta.³⁸ ¹² Ne glories in contumelia patris tui: non enim est tibi gloria ejus confusio. ¹³ Gloria enim hominis ex honore patris sui, et dedecus filii pater sine honore. ¹⁴ Fili, suscipe senectam patris tui, et non contristes eum in vita illius: ¹⁵ et si defecerit sensu, veniam da, et ne spernas eum in virtute tua: eleemosyna enim patris non erit in oblivione. ³⁹ ¹⁶ Nam pro peccato matris restituetur tibi bonum: ¹⁷ et in justitia ædificabitur tibi, et in die tribulationis commemorabitur tui, et sicut in sereno glacies, solventur peccata tua. ¹⁸ Quam malæ famæ est qui derelinquit patrem, et est maledictus a Deo qui exasperat matrem !] ¹⁹ [Fili, in mansuetudine opera tua perface, et super hominum gloriam diligeris. ⁴⁰ ²⁰ Quanto magnus es, humilia te in omnibus, et coram Deo invenies gratiam: ²¹ quoniam magna potentia Dei solius, et ab humilibus honoratur. ⁴¹ ²² Altiora te ne quæsieris, et fortiora te ne scrutatus fueris: sed quæ præcepit tibi Deus, illa cogita semper, et in pluribus operibus ejus ne fueris curiosus. ²³ Non est enim tibi necessarium ea, quæ abscondita sunt, videre oculis tuis. ²⁴ In supervacuis rebus noli scrutari multipliciter, et in pluribus operibus ejus non eris curiosus. ⁴² ²⁵ Plurima enim super sensum hominum ostensa sunt tibi: ²⁶ multos quoque supplantavit suspicio illorum, et in vanitate detinuit sensus illorum. ²⁷ Cor durum habebit male in novissimo, et qui amat periculum in illo peribit. ⁴³ ²⁸ Cor ingrediens duas vias non habebit successus, et pravus corde in illis scandalizabitur. ⁴⁴ ²⁹ Cor nequam gravabitur in doloribus, et peccator adjiciet ad peccandum. ³⁰ Synagogæ superborum non erit sanitas, frutex enim peccati radicabitur in illis, et non intelligetur. ³¹ Cor sapientis

³⁷ + **3.9 In opere et sermone**, non in vulva scilicet unde ostenditur, et spiritualis pater maxime dignus honore; unde Paulus: Per Evangelium ego vos genui I Cor. 4.. Et alibi: Qui bene præsumunt presbyteri, duplici honore digni habeantur, maxime qui laborant in doctrina et verbo I Tim. 5..

³⁸ + **3.11 Benedictio patris**, etc. RAB. Benedixerunt patriarchæ filiis, etc., usque ad illuores sævissime laniaverunt.

³⁹ + **3.15 Eleemosyna**. Scilicet quæ peccatum delet. Hostia enim quæ pro peccato, peccatum vocatur. Qui autem parentibus, vel cæteris pauperibus miseretur, justitiæ præmium recipiet a peccatis absolutus. Beati misericordes, quoniam Matth. 5., etc. Et alibi: Feneratur Domino, qui miseretur pauperis. Prov. 19.. Hinc Daniel ad Nabuchodonosor: Consilium meum, o rex, placeat tibi: peccata tua eleemosynis redime, et iniquitates tuas misericordiis pauperum Dan. 4., si forsitan ignoscat Deus delictis tuis. Hinc Dominus ait: Date eleemosynam, et omnia munda sunt vobis Luc. 11..

⁴⁰ + **3.19 Fili in mansuetudine**. Mansuetudo et humilitas gratiam, superbia et furor pariunt ruinam; unde: Discite a me, quia mitis sum et humilis corde Matth. 11., etc. Et alibi: Qui se exultat, humiliabitur Luc. 14., etc.

⁴¹ + **3.21 Quanto magnus es**, etc. RAB. Docuit superius mansuetudinem, etc., usque ad sufficit homini ea pie cogitare, et opere implere, quæ præcepit Deus.

⁴² + **3.24 In supervacuis rebus**, etc. RAB. Id est, ne scruteris supervacue, etc., usque ad disputantes in errores incidunt, et a veritate recedunt.

⁴³ + **3.27 Cor durum**. Quia secundum durtiam tuam thesaurizas tibi iram in die judicii Rom. 2..

⁴⁴ + **3.28 Cor ingrediens**. Quod non curat, nec studet vitare, et quod ea diligit, quæ ducunt ad interitum, ut hæreses et profanæ novitates; unde sequitur: Cor ingrediens duas vias, non habebit successus, etc.

intelligitur in sapientia, et auris bona audiet cum omni concupiscentia sapientiam. ³² Sapiens cor et intelligibile abstinebit se a peccatis, et in operibus justitiæ successus habebit.] ³³ [Ignem ardentem exstinguit aqua, et eleemosyna resistit peccatis: ³⁴ et Deus prospector est ejus qui reddit gratiam: meminit ejus in posterum, et in tempore casus sui inveniet firmamentum.]

4[Fili, eleemosynam pauperis ne defraudes, et oculos tuos ne transvertas a paupere. ⁴⁵ ² Animam esurientem ne despexeris, et non exasperes pauperem in inopia sua. ³ Cor inopis ne afflixeris, et non protrahas datum angustianti. ⁴⁶ ⁴ Rogationem contribulati ne abjicias, et non avertas faciem tuam ab egeno. ⁵ Ab inope ne avertas oculos tuos propter iram: et non relinquo quærentibus tibi retro maledicere. ⁴⁷ ⁶ Maledicentis enim tibi in amaritudine animæ, exaudietur deprecatio illius: exaudiet autem eum qui fecit illum. ⁷ Congregationi pauperum affabilem te facito: et presbytero humilia animam tuam, et magnato humilia caput tuum. ⁴⁸ ⁸ Declina pauperi sine tristitia aurem tuam, et redde debitum tuum, et responde illi pacifica in mansuetudine. ⁹ Libera eum qui injuriam patitur de manu superbi, et non acide feras in anima tua. ⁴⁹ ¹⁰ In judicando esto pupillis misericors ut pater, et pro viro matri illorum: ⁵⁰ ¹¹ et eris tu velut filius Altissimi obediens, et miserebitur tui magis quam mater.] ¹² [Sapientia filiis suis vitam inspirat: et suscipit inquirentes se, et præibit in via justitiæ. ¹³ Et qui illam diligit, diligit vitam, et qui vigilaverint ad illam complectentur placorem ejus. ⁵¹ ¹⁴ Qui tenuerint illam, vitam hæreditabunt: et quo

⁴⁵ + **4.1 Fili, eleemosynam pauperis,** etc. RAB. Quantum eleemosyna valet, etc., usque ad qui ex corde corripit verbis, vel factis.

⁴⁶ + **4.3 Cor inopis,** etc. Non est eleemosyna differenda, cum adsit tribuendi facultas; unde: Ne dicas amico tuo: Vade et revertere, cum cito possis dare Prov. 3.. Et alibi: Qui despicit proximum, peccat: qui miseretur pauperis, beatus erit Ibid. 14.. Eleemosyna autem facienda est, non ex necessitate, Hilarem enim datorem diligit Deus I Cor. 9.. Et alibi: Vidua pauperula plus omnibus misit in gazophylacium, quia non quantitatem muneris pensat Deus, sed devotionem cordis.

⁴⁷ + **4.5 Ab inope ne avertas,** etc. Non per iram exasperandus est pauper, sed blanda locutione placandus, Ira enim viri justitiam Dei non operatur Jac. 1.. Et, Qui obturat aurem ad clamorem pauperis, clamabit, et non exaudiet Dominus Prov. 21.. Qui enim potest tribuere, debet: quia munus absconditum exstinguit iras, et donum in sinu indignationem maximam. Qui autem non potest, sermo bonus est ei super datum optimum. Qui autem habuerit substantiam mundi: et viderit fratrem suum necesse habentem, et clauserit viscera sua ab eo, quomodo charitas Dei manet in eo? I Joan. 3. Fides enim si non habeat opera, mortua est. Non ergo diligamus lingua et verbo, sed opere et veritate.

⁴⁸ + **4.7 Congregationi pauperum.** In his commendatur mansuetudo et humilitas, quia mansuetudo neminem spernit, humilitas se omnibus subjicit. Decet autem Christianum æqualibus et inferioribus affabilem esse et mitem, senioribus humilem; unde: Domine, non est exaltatum cor meum, neque elati sunt oculi mei Psal. 130..

⁴⁹ + **4.9 Libera,** etc. RAB. Sicut largitionem in pauperes eleemosynam esse dixit, sic liberationem inique oppressi misericordiam esse ostendit; unde, Erue illos qui ducuntur ad mortem.

⁵⁰ + **4.10 In judicando.** RAB. Nullam eleemosynæ speciem, etc., usque ad ita et viduæ viri solatium.

⁵¹ + **4.13 Et qui vigilaverint,** etc. Beatus homo qui audit me, et vigilat ante fores meas quotidie, et observat ad postes ostii mei Prov. 8.. Per fores autem potes Scripturas et eorum doctores intelligit.

introibit benedicet Deus. ¹⁵ Qui serviunt ei obsequentes erunt sancto: et eos qui diligunt illam, diligit Deus. ⁵² ¹⁶ Qui audit illam iudicabit gentes: et qui intuetur illam permanebit confidens. ¹⁷ Si crediderit ei, hæreditabit illam, et erunt in confirmatione creaturæ illius: ¹⁸ quoniam in tentatione ambulat cum eo, et in primis eligit eum. ¹⁹ Timorem, et metum, et probationem inducet super illum: et cruciabit illum in tribulatione doctrinæ suæ, donec tentet eum in cogitationibus suis, et credat animæ illius. ⁵³ ²⁰ Et firmabit illum, et iter adducet directum ad illum, et lætificabit illum: ²¹ et denudabit absconsa sua illi, et thesaurizabit super illum scientiam et intellectum justitiæ. ²² Si autem oberraverit, derelinquet eum, et tradet eum in manus inimici sui.] ²³ [Fili, conserva tempus, et evita a malo. ⁵⁴ ²⁴ Pro anima tua ne confundaris dicere verum: ²⁵ est enim confusio adducens peccatum, et est confusio adducens gloriam et gratiam. ²⁶ Ne accipias faciem adversus faciem tuam, nec adversus animam tuam mendacium. ²⁷ Ne reverearis proximum tuum in casu suo, ²⁸ nec retineas verbum in tempore salutis. Non abscondas sapientiam tuam in decore suo: ⁵⁵ ²⁹ in lingua enim sapientia dignoscitur: et sensus, et scientia, et doctrina in verbo sensati, et firmamentum in operibus justitiæ. ³⁰ Non contradicas verbo veritatis ullo modo, et de mendacio ineruditionis tuæ confundere. ⁵⁶ ³¹ Non confundaris confiteri peccata tua, et ne subicias te omni homini pro peccato. ³² Noli resistere contra faciem potentis, nec coneris contra ictum fluvii. ³³ Pro justitia agonizare pro anima tua, et usque ad mortem certa pro justitia: et Deus expugnabit pro te inimicos tuos. ³⁴ Noli citatus esse in lingua tua, et inutilis, et remissus in operibus tuis. ⁵⁷ ³⁵ Noli esse sicut leo in domo tua, evertens domesticos tuos, et opprimens subjectos tibi. ⁵⁸ ³⁶ Non sit

⁵² + **4.15 Qui serviunt**, etc. Qui diligit eum, qui genuit, diligit eum qui natus est ex Deo, et quem diligit Pater, diligit Filius, unde: Qui diligit me, diligitur a Patre meo, et eum diligam. Sed quia probatio dilectionis exhibitio est operis, sequitur: Qui audit illam, iudicabit gentes. Unde: Cum sederit Filius hominis in sede majestatis suæ, sedebitis et vos super sedes duodecim iudicantes duodecim tribus Israël Matth. 19..

⁵³ + **4.19 Timorem et metum**, etc. Sapientia inhabitans dirigit opera, in variis tentationibus præparat exercendo et probando ad futuræ vitæ gaudia, quod hac sententia confirmatur: Timorem et metum et probationem, etc. Quia tribulatio patientiam operatur, et patientia probationem, probatio vero spem, quod non confundit, quia charitas Dei diffusa est in sanctis per Spiritum sanctum.

⁵⁴ + **4.23 Fili, conserva tempus**, etc. Supra commendavit sapientiæ donum, nunc ostendit ipsius factum. Quicumque enim servat præcepta sapientiæ, cautus est in temporum mutatione, nec deserit viam justitiæ in tempore persecutionis et angustiae. Ideo sapientia exhortatur filios, ut conservent tempus, quia tempus omni rei sub cælo: et tempus est belli, et tempus pacis.

⁵⁵ + **4.28 Non abscondas sapientiam tuam**, etc. RAB. Non est abscondenda sapientia his, qui audire volunt. Qui enim abscondit frumentum, maledicetur in populis, benedictio autem super caput vendentium; unde: Negotia, dum venio Luc. 19..

⁵⁶ + **4.30 Non contradicas**. Obediendum est majoribus, si veritati concordant et justitiæ, nec aliter, sed pro recta fide, et vera religione, in quibus est animæ salus, decertandum est; unde: Si oculus tuus scandalizat te, erue eum et projice abs te Matth. 5.. Et, Si quis vult venire post me, abneget Luc. 9., etc.

⁵⁷ + **4.34 Noli citatus esse in lingua tua**. RAB. Mors et vita, etc., usque ad scriptum est: Non in sermone regnum Dei, sed in virtute I Cor. 4..

⁵⁸ + **4.35 Noli esse sicut leo**. In Ecclesia sunt hæretici quasi leones, qui per linguæ volubilitatem seducunt corda innocentium, et per insolentiam morum conturbant mansuetudinem

porrecta manus tua ad accipiendum, et ad dandum collecta.]

5[Noli attendere ad possessiones iniquas, et ne dixeris: Est mihi sufficiens vita: nihil enim proderit in tempore vindictæ et obductionis. ² Ne sequaris in fortitudine tua concupiscentiam cordis tui, ³ et ne dixeris: Quomodo potui? aut, Quis me subjiciet propter facta mea? Deus enim vindicans vindicabit. ⁴ Ne dixeris: Peccavi: et quid mihi accidit triste? Altissimus enim est patiens redditor. ⁵ De propitiatio peccato noli esse sine metu, neque adjicias peccatum super peccatum. ⁶ Et ne dicas: Miseratio Domini magna est, multitudinis peccatorum meorum miserebitur: ⁷ misericordia enim et ira ab illo cito proximant, et in peccatores respicit ira illius. ⁸ Non tardes converti ad Dominum, et ne differas de die in diem: ⁹ subito enim veniet ira illius, et in tempore vindictæ disperdet te. ¹⁰ Noli anxius esse in divitiis injustis: non enim proderunt tibi in die obductionis et vindictæ.] ¹¹

[Non ventiles te in omnem ventum, et non eas in omnem viam: sic enim omnis peccator probatur in duplici lingua. ⁵⁹ ¹² Esto firmus in via Domini, et in veritate sensus tui et scientia: et prosequatur te verbum pacis et justitiæ. ¹³ Esto mansuetus ad audiendum verbum, ut intelligas, et cum sapientia proferas responsum verum. ⁶⁰ ¹⁴ Si est tibi intellectus, responde proximo: sin autem, sit manus tua super os tuum, ne capiaris in verbo indisciplinato, et confundaris. ¹⁵ Honor et gloria in sermone sensati: lingua vero imprudentis subversio est ipsius. ¹⁶ Non appelleris susurro, et lingua tua ne capiaris et confundaris: ¹⁷ super furem enim est confusio et pœnitentia, et denotatio pessima super bilinguem: susurratori autem odium, et inimicitia, et contumelia. ¹⁸ Justifica pusillum et magnum similiter.]

6[Noli fieri pro amico inimicus proximo: improprium enim et contumeliam malus hæreditabit: et omnis peccator invidus et bilinguis.] ⁶¹
² [Non te extollas in cogitatione animæ tuæ velut taurus, ne forte elidatur virtus tua per stultitiam: ³ et folia tua comedat, et fructus tuos perdat, et relinquare velut lignum aridum in eremo. ⁴ Anima enim nequam disperdet qui se habet, et in gaudium inimicis dat illum, et deducet in sortem impiorum.] ⁶² ⁵ [Verbum dulce multiplicat amicos et mitigat inimicos, et lingua eucharis in bono homine abundat. ⁶ Multi pacifici sint tibi: et

simplicium.

⁵⁹ + **5.11 Non ventiles te**, etc. RAB. Levitatem reprehendit, etc., usque ad duplicitas doctrinæ eorum, in qua modo vera, modo falsa proferunt, peccatores esse ostendit.

⁶⁰ + **5.13 Esto mansuetus**. Bonum est mansuete audire, et suscipere verbum veritatis, et modeste ac prudenter proferre; unde: Sit omnis homo velox ad audiendum, tardus ad loquendum et tardus ad iram. Jac. 1.. Et paulo post: In mansuetudine suscipite insitum verbum, quod potest salvare animas vestras Ibid. In Proverbiis quoque dicitur: Vidisti hominem velocem ad loquendum? stultitia magis speranda est, quam correctio illius Prov. 29..

⁶¹ + **6.1 Nolite fieri**, etc. RAB. Vim veræ charitatis ostendit, etc., usque ad allidetur virtus ipsius.

⁶² + **6.4 Nequam**. Bonæ voluntatis succedit boni operis fructus, et malitiosæ menti nihil prosperitatis. Si enim desit charitas, frustra operam virtuti impendis; unde: Qui in uno offendit, omnium reus est Jac. 2.. Et, ei qui non habet, et hoc quod habet, auferetur ab eo Luc. 19..

consiliarius sit tibi unus de mille. ⁶³ ⁷ Si possides amicum, in tentatione posside eum, et ne facile credas ei. ⁶⁴ ⁸ Est enim amicus secundum tempus suum, et non permanebit in die tribulationis. ⁹ Et est amicus qui convertitur ad inimicitiam, et est amicus qui odium et rixam et convitia denudabit. ¹⁰ Est autem amicus socius mensæ, et non permanebit in die necessitatis. ¹¹ Amicus si permanserit fixus, erit tibi quasi coæqualis, et in domesticis tuis fiducialiter aget. ¹² Si humiliaverit se contra te, et a facie tua absconderit se, unanimum habebis amicitiam bonam. ¹³ Ab inimicis tuis separare, et ab amicis tuis attende. ⁶⁵ ¹⁴ Amicus fidelis protectio fortis: qui autem invenit illum, invenit thesaurum. ⁶⁶ ¹⁵ Amico fideli nulla est comparatio, et non est digna ponderatio auri et argenti contra bonitatem fidei illius. ¹⁶ Amicus fidelis medicamentum vitæ et immortalitatis: et qui metuunt Dominum, invenient illum. ⁶⁷ ¹⁷ Qui timet Deum æque habebit amicitiam bonam, quoniam secundum illum erit amicus illius.] ⁶⁸ ¹⁸ [Fili, a juventute tua excipe doctrinam, et usque ad canos invenies sapientiam. ¹⁹ Quasi is qui arat et seminat accede ad eam, et sustine bonos fructus illius. ²⁰ In opere enim ipsius exiguum laborabis, et cito edes de generationibus illius. ²¹ Quam aspera est nimium sapientia indoctis hominibus! et non permanebit in illa excors. ²² Quasi lapidis virtus probatio erit in illis: et non demorabuntur projicere illam. ²³ Sapientia enim doctrinæ secundum nomen est ejus, et non est multis manifestata: quibus autem cognita est, permanet usque ad conspectum Dei. ²⁴ Audi, fili, et accipe consilium intellectus, et ne abjicias consilium meum. ²⁵ Injice pedem tuum in compedes illius, et in torques illius collum tuum. ²⁶ Subjice humerum tuum, et porta illam, et ne acedieris vinculis ejus. ²⁷ In omni animo tuo accede ad illam, et in omni virtute tua conserva vias ejus. ⁶⁹ ²⁸ Investiga illam, et manifestabitur tibi: et continens factus, ne derelinquas eam: ²⁹ in novissimis enim invenies requiem in ea, et

⁶³ + **6.6 Multi pacifici**, etc. Cum omnibus pax est habenda, quantam permittit nostra fragilitas, sed non cum multis consilium, quia scriptum est: Misericordes vocantur, virum autem fidelem quis inveniet? Prov. 20.

⁶⁴ + **6.7 Si possides amicum**, etc. RAB. Per diversas species falsos amicos exprimens, tandem ad verum pervenit amicum: quia multi amicos se esse profitentur in prosperis, et inimici apparent in adversis. Unde: Si humiliaverit se contra te, etc.

⁶⁵ + **6.13 Attende**. RAB. Id est, discretionem habe, etc., usque ad: Rogo autem vos, fratres, ut observetis eos qui dissensiones et offencula faciunt Rom. 16..

⁶⁶ + **6.14 Amicus fortis**. Amicus amoris consors, cui sic animum tuum applica ut ex duobus unum fiat, cui te tanquam tibi committas, a quo nihil timeas: et nihil inhonestum petas. Non est enim amicitia vectigalis, sed plena decoris; unde: Vos amici mei estis, si feceritis quæ ego præcipio vobis Joan. 15., etc. Dedit nobis Dominus formam amicitiae quam sequamur, ut faciamus amici voluntatem, aperiatur ei secreta, et ipse nobis; unde: Vos autem dixi amicos, quia omnia quæ audivi a Patre meo, nota feci vobis Ibid..

⁶⁷ + **6.16 Amicus fidelis**. Secundum Deum scilicet. Hic ad medicamentum vitæ æternæ et immortalitatis necessaria, cum amico tractat: unde Cicero dicit amicitiam non nisi inter bonos esse posse, et libera debet esse amicitia, et ad omnem felicitatem proclivis.

⁶⁸ + **6.17 Qui timet Dominum**. RAB. Plena et perfecta amicitiae gratia, etc., usque ad ut de hoc mundo credas te quotidie migraturum.

⁶⁹ + **6.27 In omni animo tuo**. RAB. Corde, non corpore accedendum est ad sapientiam, etc., usque ad perceptio veritatis; unde: Hæc est autem vita æterna ut cognoscant te solum verum Deum Joan. 17., etc.

convertetur tibi in oblectationem. ³⁰ Et erunt tibi compedes ejus in protectionem fortitudinis et bases virtutis, et torques illius in stolam gloriæ: ³¹ decor enim vitæ est in illa, et vincula illius alligatura salutaris. ³² Stulam gloriæ indues eam, et coronam gratulationis superpones tibi. ³³ Fili, si attenderis mihi, disces: et si accommodaveris animum tuum, sapiens eris. ⁷⁰ ³⁴ Si inclinaveris aurem tuam, excipies doctrinam: et si dilexeris audire, sapiens eris. ³⁵ In multitudine presbyterorum prudentium sta, et sapientiæ illorum ex corde conjungere, ut omnem narrationem Dei possis audire, et proverbia laudis non effugiant a te. ⁷¹ ³⁶ Et si videris sensatum, evigila ad eum, et gradus ostiorum illius exerat pes tuus. ³⁷ Cogitatum tuum habe in præceptis Dei, et in mandatis illius maxime assiduus esto: et ipse dabit tibi cor, et concupiscentia sapientiæ dabitur tibi.] ⁷²

7[Noli facere mala, et non te apprehendent: ⁷³ ² discede ab iniquo, et deficient mala abs te. ³ Fili, non semines mala in sulcis injustitiæ, et non metes ea in septuplum. ⁴ Noli quærere a Domino ducatum, neque a rege cathedram honoris. ⁷⁴ ⁵ Non te justifies ante Deum, quoniam agnitor cordis ipse est: et penes regem noli velle videri sapiens. ⁷⁵ ⁶ Noli quærere fieri iudex, nisi valeas virtute irrumpere iniquitates: ne forte extimescas faciem potentis, et ponas scandalum in æquitate tua. ⁷⁶ ⁷ Non pecces in multitudinem civitatis, nec te immittas in populum: ⁷⁷ ⁸ neque alliges duplicia peccata, nec enim in uno eris immunis. ⁹ Noli esse pusillanimis in animo tuo: ¹⁰ exorare et facere eleemosynam ne despicias. ¹¹ Ne dicas: In

⁷⁰ + **6.33 Fili, si attenderis.** Monet sapientia, ut in divina lege assidue meditemur. Primum hortatur ut discamus; post, ut animam ad hoc applicemus, tandem, ut inclinemus; demum, ut diligentiam ad audiendum adhibeamus. Sic enim sapientia sapientem esse promittit. Necesses est enim, ut qui veræ sapientiæ, quæ Christus est, agnitionem desiderat, primum catholicis magistris se humiliter subdat, et omnes affectus animæ suæ disciplinæ eorum. Dehinc intentionem cordis ab omni pravo desiderio avertens ad audiendum verbum Dei adhibeat diligenter, caveatque ut meditationem legis non pro terrenarum rerum mercede, vel laudis humanæ, sed pro ipsius boni amore impendat, ut veræ sapientiæ fructum percipiat.

⁷¹ + **6.35 In multitudine.** Quasi: Ne sis sapiens tibi ipsi. Ne confidas proprio ingenio, hæreticos superbiæ fastus maxime supplantavit.

⁷² + **6.37 Cogitatum habe in præceptis.** RAB. Merito illi datur, etc., usque ad et assidue legem meditatur et opere exsequitur.

⁷³ + **7.1 Non metes ea in septuplum.** RAB. Perfectam ultionem, etc., usque ad Assumit septem alios spiritus nequiores se Luc. 11..

⁷⁴ + **7.4 Neque a rege cathedram honoris.** Non potest exercere opus justi regiminis, qui sententiam neglexit veræ pietatis; unde: Reges gentium dominantur eorum, vos autem non sic, sed qui major est in vobis, fiat sicut minor Luc. 22..

⁷⁵ + **7.5 Quoniam agnitor.** Nulla præsumptio perniciosior, quam de propria justitia, aut scientia superbire; unde: Non est homo super terram, qui faciat bonum, et non peccet Eccl. 7.. Et alibi: Vidisti hominem sapientem sibi videri, et magis illo spem habet stultus Prov. 26..

⁷⁶ + **7.6 Noli quærere fieri iudex, nisi valeas.** Debet quisque proprias virtutes perpendere, et pro quantitate virium curam aliorum suscipere: ne dum delectatur loco gloriæ, fiat subditis auctor ruinæ; et qui gravatur pondere suarum, velit fieri iudex alienarum culparum.

⁷⁷ + **7.7 Non pecces in multitudinem.** Qui ratione pollet, et liberi arbitrii potestate prævalet, subditorum insolentia non peccat, sed constanter resistat alienæ nequitiae: nec se putet impune peccare, si plurimorum acquiescit voluntati; unde: Non solum autem qui ea faciunt, sed qui consentiunt facienti Rom. 1., etc.

multitudine munerum meorum respiciet Deus, et offerente me Deo altissimo, munera mea suscipiet. ¹² Non irrideas hominem in amaritudine animæ: est enim qui humiliat et exaltat circumspexit Deus. ¹³ Noli amare mendacium adversus fratrem tuum, neque in amicum similiter facias. ⁷⁸ ¹⁴ Noli velle mentiri omne mendacium: assiduitas enim illius non est bona. ¹⁵ Noli verbosus esse in multitudine presbyterorum, et non iteres verbum in oratione tua. ⁷⁹ ¹⁶ Non oderis laboriosa opera, et rusticationem creatam ab Altissimo. ¹⁷ Non te reposes in multitudine indisciplinatorum. ¹⁸ Memento iræ, quoniam non tardabit. ¹⁹ Humilia valde spiritum tuum, quoniam vindicta carnis impii ignis et vermis.] ⁸⁰ ²⁰ [Noli prævaricari in amicum pecuniam differentem, neque fratrem carissimum auro spreveris. ⁸¹ ²¹ Noli discedere a muliere sensata et bona, quam sortitus es in timore Domini: gratia enim verecundiæ illius super aurum. ⁸² ²² Non lædas servum in veritate operantem, neque mercenarium dantem animam suam. ⁸³ ²³ Servus sensatus sit tibi dilectus quasi anima tua: non defraudes illum libertate, neque inopem derelinquas illum. ⁸⁴ ²⁴ Pecora tibi sunt, attende illis: et si sunt utilia, perseverent apud te. ²⁵ Filii tibi sunt? erudi illos, et curva illos a pueritia illorum. ²⁶ Filiæ tibi sunt? conserva corpus illarum, et non ostendas hilarem faciem tuam ad illas. ⁸⁵ ²⁷ Trade filiam, et grande opus feceris: et homini sensato da illam. ²⁸ Mulier si est tibi secundum animam tuam, non projicias illam: et odibili non credas te. In toto corde tuo ⁸⁶ ²⁹

⁷⁸ + **7.13 Noli amare mendacium.** Omne mendacium malum; et proximis inferre scandalum perniciosum est. Multo magis ergo amico fraudem moliri, crimen imponere: quoniam testis mendax peribit; unde in Proverbiis: Sicut noxius, qui mittit sagittas in mortem, sic qui fraudulentè nocet amico Prov. 20..

⁷⁹ + **7.15 Noli verbosus esse.** Quasi. Noli sensum tuum docere, audi sapientiam seniorum. Tutius est enim audire, quam loqui; unde: Sit omnis homo velox ad audiendum, tardus autem ad loquendum, et tardus ad iram Jac. 1.. Non oderis laboriosa opera. Peccanti homini scientia data est, ut labore manuum quæreret sibi victum; unde: In sudore vultus tui vesceris pane Gen. 3., etc.

⁸⁰ + **7.19 Quoniam vindicta carnis,** etc. Quia caro peccatorum, quæ luxuria defluit, igne inferni et vermibus cruciabitur, ubi vermis non moritur, et ignis non exstinguitur: in verme putredo gehennæ, in igne ardor signatur. Vel vermis, est sera scelerum pœnitentia, quæ in tormentis conscientiam peccatorum mordere non cessat, ut ignis sit pœna extrinsecus sæviens, vermis autem dolor interius accusans.

⁸¹ + **7.20 Noli prævaricari in amicum pecuniam.** RAB. Multi perierunt pro avaritia, etc., usque ad: qui odit munera, vivet Prov. 1..

⁸² + **7.21 Gratia enim verecundiæ.** Oculis non vidit, nec auris audivit, nec in cor hominis ascendit, quæ præparavit Deus diligentibus se. Potest per hanc mulierem sapientia intelligi, quæ alibi pretiosa margarita dicitur, quam spiritualis negotiator inveniens vendit omnia, et emit eam. Unde: Vive vitam cum muliere quam dilexisti; quasi, sapientiam sequere, et scientiam Scripturarum, et quasi conjugem tibi copula.

⁸³ + **7.22 Non lædas servum.** Qualiter servi nutriendi sunt, aperte monstratur, affectu, scilicet, filiorum pro jure naturæ; et disciplinandi pro mentis instabilitate; unde in sequentibus, Cibaria et virga et onus asino; panis et disciplina et opus servo.

⁸⁴ + **7.23 Neque inopem derelinquas illum.** Oppressum violentia servitutis. Sive enim servi, sive liberi, omnes in Christo unum sumus I Cor. 12..

⁸⁵ + **7.26 Filiæ,** etc. Sicut bonos servos affectu filiorum habendos, sic ancillas, quasi filias habendas esse docet, sed cum disciplina: unde, Lacta filium, et paventem te faciet: lude cum eo, et contristabit te. Non irrideas illi, ne doleas, et in novissimo obstupescant dentes tui Eccli. 30..

⁸⁶ + **7.28 Mulier.** Conjugalem commendat pudicitiam, removens omnem detestabilem copulam. Mystice autem admonet ut catholicam fidem in vera religione, quam primum post baptismi

honora patrem tuum, et gemitus matris tuæ ne obliviscaris: ³⁰ memento quoniam nisi per illos natus non fuisses: et retribue illis, quomodo et illi tibi.]
³¹ [In tota anima tua time Dominum, et sacerdotes illius sanctifica. ³² In omni virtute tua dilige eum qui te fecit, et ministros ejus ne derelinquas. ⁸⁷
³³ Honora Deum ex tota anima tua, et honorifica sacerdotes, et propurga te cum brachiis. ³⁴ Da illis partem, sicut mandatum est tibi, primitiarum et purgationis, et de negligentia tua purga te cum paucis. ³⁵ Datum brachiorum tuorum, et sacrificia sanctificationis offeres Domino, et initia sanctorum. ⁸⁸ ³⁶ Et pauperi porrige manum tuam, ut perficiatur propitiatio et benedictio tua. ³⁷ Gratia dati in conspectu omnis viventis, et mortuo non prohibeas gratiam. ⁸⁹ ³⁸ Non desis plorantibus in consolatione, et cum lugentibus ambula. ³⁹ Non te pigeat visitare infirmum: ex his enim in dilectione firmaberis. ⁴⁰ In omnibus operibus tuis memorare novissima tua, et in æternum non peccabis.]

8[Non litiges cum homine potente, ne forte incidas in manus illius. ⁹⁰ ² Non contendas cum viro locuplete, ne forte contra te constituat litem tibi: ⁹¹
³ multos enim perdidit aurum et argentum, et usque ad cor regum extendit et convertit. ⁴ Non litiges cum homine linguato, et non strues in ignem illius ligna. ⁵ Non communices homini indocto, ne male de progenie tua loquatur.
⁶ Ne despicias hominem avertentem se a peccato, neque improperes ei: memento quoniam omnes in correptione sumus. ⁷ Ne spernas hominem in sua senectute, etenim ex nobis senescunt. ⁸ Noli de mortuo inimico tuo gaudere: sciens quoniam omnes morimur, et in gaudium nolumus venire. ⁹ Ne despicias narrationem presbyterorum sapientium, et in proverbiiis eorum conversare: ¹⁰ ab ipsis enim disces sapientiam et doctrinam intellectus, et servire magnatis sine querela. ¹¹ Non te prætereant narratio seniorum, ipsi enim didicerunt a patribus suis: ¹² quoniam ab ipsis disces intellectum, et in tempore necessitatis dare responsum. ¹³ Non incendas carbones peccatorum arguens eos, et ne incendaris flamma ignis peccatorum illorum. ⁹² ¹⁴ Ne contra faciem stes contumeliosi, ne sedeat quasi insidiator ori tuo. ¹⁵ Noli

perceptionem sortiti sumus, firmiter tenentes, hæreticorum perfidiam abjiciamus.

⁸⁷ + **7.32 Dilige,** etc. RAB. Timorem Dei et amorem, etc., usque ad quia charitas operit multitudinem peccatorum.

⁸⁸ + **7.35 Datum brachiorum.** Superius pro his quæ offeruntur ministris Dei promisit peccatorum purgationem: nunc autem pro eleemosynis veniam et benedictionis gratiam, quia sicut aqua exstinguit ignem, ita eleemosyna exstinguit peccata.

⁸⁹ + **7.37 Et mortuo.** Ad eleemosynam pertinet sepultura mortuorum, multo magis ergo consolatio vivorum: unde Paulus docet gaudere cum gaudentibus, flere cum flentibus. Probatio dilectionis exhibitio est operis: unde, Qui habuerit substantiam hujus mundi, et viderit fratrem suum necesse habere, et clausit viscera sua ab eo, quomodo charitas Dei manet in eo? I Joan. 3.

⁹⁰ + **8.1 Non litiges cum homine potente.** RAB. Superbo. Unde, Non respondeas stulto juxta stultitiam suam, ne efficiaris ei similis Prov. 26.: quia inter superbos semper jurgia sunt, servum autem Domini non oportet litigare.

⁹¹ + **8.2 Locuplete.** Qui avaritiæ aestibus anhelat. Inde enim oriuntur invidiæ, contentiones, et hujusmodi, Radix enim omnium malorum est cupiditas I Tim. 6..

⁹² + **8.13 Non incendas carbones.** ID. Unde Apostolus: Si præoccupatus fuerit homo in aliquo delicto, vos qui spirituales estis, instruite hujusmodi in spiritu lenitatis Gal. 6..

fœnerari homini fortiori te: quod si fœneraveris, quasi perditum habe. ⁹³ ¹⁶
 Non spondeas super virtutem tuam: quod si sponderis, quasi restituens cogita. ¹⁷ Non iudices contra iudicem, quoniam secundum quod justum est iudicat. ⁹⁴ ¹⁸ Cum audace non eas in via, ne forte gravet mala sua in te: ipse enim secundum voluntatem suam vadit, et simul cum stultitia illius peries. ¹⁹ Cum iracundo non facias rixam, et cum audace non eas in desertum: quoniam quasi nihil est ante illum sanguis, et ubi non est adjutorium, elidet te. ²⁰ Cum fatuis consilium non habeas: non enim poterunt diligere nisi quæ eis placent. ²¹ Coram extraneo ne facias consilium: nescis enim quid pariet. ²² Non omni homini cor tuum manifestes, ne forte inferat tibi gratiam falsam, et convicietur tibi.]

9[Non zeles mulierem sinus tui, ne ostendat super te malitiam doctrinæ nequam. ⁹⁵ ² Non des mulieri potestatem animæ tuæ, ne ingrediatur in virtutem tuam, et confundaris. ³ Ne respicias mulierem multivolam, ne forte incidas in laqueos illius. ⁹⁶ ⁴ Cum saltatrice ne assiduus sis, nec audias illam, ne forte pereas in efficacia illius. ⁹⁷ ⁵ Virginem ne conspicias, ne forte scandalizeris in decore illius. ⁹⁸ ⁶ Ne des fornicariis animam tuam in ullo, ne perdas te et hæreditatem tuam. ⁷ Noli circumspicere in vicis civitatis, nec oberraveris in plateis illius. ⁹⁹ ⁸ Averte faciem tuam a muliere compta, et ne circumspicias speciem alienam. ⁹ Propter speciem mulieris multi perierunt: et ex hoc concupiscentia quasi ignis exardescit. ¹⁰ Omnis mulier quæ est fornicaria, quasi stercus in via conculcabitur. ¹¹ Speciem mulieris alienæ multi admirati, reprobi facti sunt: colloquium enim illius quasi ignis exardescit. ¹² Cum aliena muliere ne sedeas omnino, nec accumbas cum ea super cubitum: ¹³ et non alterceris cum illa in vino, ne forte declinet cor tuum in illam, et sanguine tuo labaris in perditionem.] ¹⁴
 [Ne derelinquas amicum antiquum: novus enim non erit similis illi. ¹⁰⁰ ¹⁵
 Vinum novum amicus novus: veterascet, et cum suavitate bibes illud. ¹⁰¹ ¹⁶

⁹³ + **8.15 Noli fœnerari.** RAB. Unde: Bibe aquam de cisterna tua, et fluenta putei tui habeto solus.

⁹⁴ + **8.17 Non iudices contra iudicem.** Quasi esto subjectus præpositis et iudicibus, qui secundum Deum iudicant.

⁹⁵ + **9.1 Non zeles mulierem,** etc. RAB. Docet pudicitiam, etc., usque ad non consentit hæreticæ pravitati.

⁹⁶ + **9.3 Mulierem multivolam.** Hæreticorum Synagogam, quæ per diversos errores volitat.

⁹⁷ + **9.4 Cum saltatrice ne assiduus sis.** Hæreticorum turba, quæ per diversos errores dissilit, ut quem eloquentiæ suæ amatorem conspexerit ad se trahat quasi meretrix; unde: Irretivit eum multis sermonibus, et blanditiis labiorum traxit eum Prov. 7., etc.

⁹⁸ + **9.5 Virginem ne conspicias.** Averte oculos tuos, ne videant vanitatem: ne libeat videre quæ non licet concupiscere. Mystice autem non debemus decorem eloquentiæ hæreticæ amare, nec simulatas virtutes attendere.

⁹⁹ + **9.7 In vicis civitatis,** etc. Idem sub alia figura. Vici enim civitatis, hæreticorum conventicula sunt: quæ se a civitate separant, de qua dicitur: Gloriosa dicta sunt de te, civitas Dei Psal. 86..

¹⁰⁰ + **9.14 Ne derelinquas amicum.** Major est fiducia ex parte rei cognitæ, quam ignotæ. Doctrinam quoque sanctorum Patrum non debemus declinare et novos doctores audire.

¹⁰¹ + **9.15 Vinum novum,** etc. Novus doctor studere debet, ut sanam doctrinam et operationem

Non zeles gloriam et opes peccatoris: non enim scis quæ futura sit illius subversio. ¹⁷ Non placeat tibi injuria injustorum, sciens quoniam usque ad inferos non placebit impius. ¹⁸ Longe abesto ab homine potestatem habente occidendi, et non suspicaberis timorem mortis. ¹⁹ Et si accesseris ad illum, noli aliquid committere, ne forte auferat vitam tuam. ²⁰ Communionem mortis scito, quoniam in medio laqueorum ingredieris, et super dolentium arma ambulabis. ²¹ Secundum virtutem tuam cave te a proximo tuo, et cum sapientibus et prudentibus tracta. ²² Viri justii sint tibi convivæ, et in timore Dei sit tibi gloriatio: ²³ et in sensu sit tibi cogitatus Dei, et omnis enarratio tua in præceptis Altissimi. ²⁴ In manu artificum opera laudabuntur, et princeps populi in sapientia sermonis sui, in sensu vero seniorum verbum. ²⁵ Terribilis est in civitate sua homo linguosus: et temerarius in verbo suo odibilis erit.] ¹⁰²

10[Judex sapiens judicabit populum suum, et principatus sensati stabilis erit. ¹⁰³ ² Secundum judicem populi, sic et ministri ejus: et qualis rector est civitatis, tales et inhabitantes in ea. ³ Rex insipiens perdet populum suum: et civitates inhabitabuntur per sensum potentium. ⁴ In manu Dei potestas terræ: et utilem rectorem suscitabit in tempus super illam. ⁵ In manu Dei prosperitas hominis, et super faciem scribæ imponet honorem suum.] ¹⁰⁴ ⁶ [Omnis injuriæ proximi ne memineris, et nihil agas in operibus injuriæ. ⁷ Odibilis coram Deo est et hominibus superbia, et execrabilis omnis iniquitas gentium. ⁸ Regnum a gente in gentem transfertur propter injustitias, et injurias, et contumelias, et diversos dolos. ¹⁰⁵ ⁹ Avaro autem nihil est scelestius. Quid superbit terra et cinis? ¹⁰⁶ ¹⁰ Nihil est iniquius quam amare pecuniam: hic enim et animam suam venalem habet, quoniam in vita sua projecit intima sua. ¹¹ Omnis potentatus brevis vita; languor prolixior gravat medicum. ¹² Brevem languorem præcidit medicus: sic et rex hodie est, et cras morietur. ¹⁰⁷ ¹³ Cum enim morietur homo, hæreditabit serpentes, et bestias, et vermes. ¹⁴ Initium superbiæ hominis apostatare a

firmiter percipiat: et postea sibi et aliis proficiat.

¹⁰² + **9.25 Linguosus.** Hæreticus, qui semper contentiosus, et ideo odibilis Deo et hominibus.

¹⁰³ + **10.1 Judex sapiens,** etc. RAB. Factus est principatus super humerum ejus. Unde: Væ terræ cujus rex puer est Isa. 9., diabolus, scilicet qui semper diligit novitates, et principes cujus primo mane comedunt, id est, ante diem mortis, dicentes: Manducemus et bibamus, cras enim moriemur Isa. 22..

¹⁰⁴ + **10.5 Super faciem scribæ.** ID. Lingua mea calamus scribæ, velociter scribentis, quia vice sua mittit ad prædicandum.

¹⁰⁵ + **10.8 Regnum a gente.** RAB. Hoc fere omnes etc., usque ad: auferetur a vobis regnum Dei, et dabitur genti facienti fructum ejus Matth. 21..

¹⁰⁶ + **10.9 Avaro.** Post mutationem regni agit de avaritia, pro qua vis regiminis maxime negligitur: Radix enim omnium malorum cupiditas I Tim. 6.. Avaritiam autem superbia comitatur, unde, Præcipe divitibus non altum sapere Ibid..

¹⁰⁷ + **10.12 Et rex hodie est.** Potestas et divitiæ non possunt prolongare vitam. Positus est terminus qui præteriri non potest. Jucunditas carnis convertetur in putredinem et fœtores, et tandem in vermes. Mystice autem homo, qui in peccatis vivit et non respiscit, morietur æterna morte: et diabolus serpentem antiquum et bestias ejus, id est, dæmones non evadet.

Deo: ¹⁰⁸ ¹⁵ quoniam ab eo qui fecit illum recessit cor ejus, quoniam initium omnis peccati est superbia. Qui tenuerit illam adimplebitur maledictis, et subvertet eum in finem. ¹⁶ Propterea exhonoravit Dominus conventus malorum, et destruxit eos usque in finem. ¹⁷ Sedes ducum superborum destruxit Deus, et sedere fecit mites pro eis. ¹⁸ Radices gentium superbarum arefecit Deus, et plantavit humiles ex ipsis gentibus. ¹⁹ Terras gentium evertit Dominus, et perdidit eas usque ad fundamentum. ¹⁰⁹ ²⁰ Arefecit ex ipsis, et disperdidit eos, et cessare fecit memoriam eorum a terra. ²¹ Memoria superborum perdidit Deus, et reliquit memoriam humilium sensu. ²² Non est creata hominibus superbia, neque iracundia nationi mulierum.] ¹¹⁰ ²³ [Semen hominum honorabitur hoc, quod timet Deum: semen autem hoc exhonorabitur, quod præterit mandata Domini. ¹¹¹ ²⁴ In medio fratrum rector illorum in honore: et qui timent Dominum erunt in oculis illius. ²⁵ Gloria divitum, honoratorum, et pauperum, timor Dei est. ¹¹² ²⁶ Noli despiciere hominem justum pauperem, et noli magnificare virum peccatorem divitem. ²⁷ Magnus, et judex, et potens est in honore: et non est major illo qui timet Deum. ¹¹³ ²⁸ Servo sensato liberi servient: et vir prudens et disciplinatus non murmurabit correptus, et inscius non honorabitur. ¹¹⁴ ²⁹ Noli extollere te in faciendo opere tuo, et noli cunctari in tempore angustiae. ³⁰ Melior est qui operatur et abundat in omnibus, quam qui gloriatur et eget pane. ¹¹⁵ ³¹ Fili, in mansuetudine conserva animam tuam, et da illi honorem

¹⁰⁸ + **10.14 Initium superbiæ.** Non est enim major apostasia quam creaturam a Creatore recedere, quæ merito ascribitur superbiæ. Superbia enim est si creatura velit æquari Creatori. Hæc et diabolo et homini fuit initium perditionis: unde, Quoniam initium omnis peccati est superbia. Quamvis alibi dicatur: Radix omnium malorum cupiditas I Tim. 6.. Non est cupiditas sine superbia, nemo enim superbus nisi cupidus et e converso. De superbia nascuntur hæreses, schismata, detractiones, invidia, verbositas, jactantia, contentiones et hujusmodi, quæ ex cupiditate procedunt. Gulosos vero, intemperantes, ebriosos, fornicarios et hujusmodi cupiditas facit, quæ sine superbia esse non possunt. Caveamus ergo cupiditatem et superbiam, non duo mala, sed unum a quo omnia trahunt initium.

¹⁰⁹ + **10.19 Terras.** RAB. Quando Jerusalem per Romanos, etc., usque ad deleta est posteritas eorum, et gloria martyrum exaltata est; unde: Custodit Dominus omnes diligentes se, et omnes peccatores disperdet Psal. 144..

¹¹⁰ + **10.22 Non est creata.** ID. Vitia non sunt creata, etc., usque ad surgit iracundia, quam virtutis superat constantia.

¹¹¹ + **10.23 Semen hominum honorabitur.** Doctores sancti in honore sunt apud bonos, maxime qui timent Dominum: unde, Qui bene præsumt presbyteri, duplici honore digni habeantur I Tim. 5., etc.

¹¹² + **10.25 Gloria divitum,** etc. Vere gloria est timere Deum. Qui eum timet, justitiam servat in omnibus: unde, Nolite in personarum acceptione Jesu fidem habere Jacob. 2..

¹¹³ + **10.27 Magnus est judex.** Licet potestas terrena magna sit, timentem Dominum præcellere non valet: timentibus enim Deum, nihil deest, Divites autem eguerunt et esurierunt Psal. 33., etc.

¹¹⁴ + **10.28 Servo sensato.** Hoc ad litteram sæpe evenit, ut ignobilis genere nobilitatis scientia et fide, nobilibus præferatur: unde, Servus sapiens dominabitur filiis stultis Prov. 17.. Mystice autem servus ecclesiasticus, qui devote servat religionem Christianam, præponitur Synagogæ; unde, Major serviet minori. Et, Jacob dilexi, Esau autem odio habui Gen. 25..

¹¹⁵ + **10.30 Melior est.** Quasi dicat: Melius est, ut studeas semper in bono opere laborare, unde reddatur tibi merces justitiæ, quam ut consumas dies tuos in vanitate, et egeas illo pane, qui de cælo descendit. Qui in timore Dei, et observantia religionis, statuet gloriam suam: unde, Qui gloriatur, in Domino gloriatur II Cor. 10..

secundum meritum suum. ³² Peccantem in animam suam quis justificabit? et quis honorificabit exhorantem animam suam? ³³ Pauper gloriatur per disciplinam et timorem suum: et est homo qui honorificatur propter substantiam suam. ³⁴ Qui autem gloriatur in paupertate, quanto magis in substantia ! et qui gloriatur in substantia, paupertatem vereatur.]

11 [Sapientia humiliati exaltabit caput illius, et in medio magnatorum consedere illum faciet. ¹¹⁶ ² Non laudes virum in specie sua, neque spernas hominem in visu suo. ³ Brevis in volatilibus est apis, et initium dulcoris habet fructus illius. ⁴ In vestitu ne glorieris umquam, nec in die honoris tui extollaris: quoniam mirabilia opera Altissimi solius, et gloriosa, et absconsa, et invisata opera illius. ⁵ Multi tyranni sederunt in throno: et insuspicabilis portavit diadema. ¹¹⁷ ⁶ Multi potentes oppressi sunt valide, et gloriosi traditi sunt in manus alterorum. ⁷ Priusquam interrogas, ne vituperes quemquam: et cum interrogaveris, corripe juste.] ⁸ [Priusquam audias, ne respondeas verbum: et in medio sermonum ne adjicias loqui. ¹¹⁸ ⁹ De ea re quæ te non molestat, ne certeris: et in iudicio peccantium ne consistas. ¹⁰ Fili, ne in multis sint actus tui: et si dives fueris, non eris immunis a delicto. Si enim secutus fueris, non apprehendes: et non effugies, si præcucurreris. ¹¹⁹ ¹¹ Est homo laborans et festinans, et dolens: impius, et tanto magis non abundabit. ¹²⁰ ¹² Est homo marcidus egens recuperatione, plus deficiens virtute, et abundans paupertate: ¹³ et oculus Dei respexit illum in bono, et erexit eum ab humilitate ipsius, et exaltavit caput ejus: et mirati sunt in illo multi, et honoraverunt Deum.] ¹⁴ [Bona et mala, vita et mors, paupertas et honestas, a Deo sunt: ¹⁵ sapientia, et disciplina, et scientia legis, apud Deum: dilectio, et viæ bonorum, apud ipsum. ¹⁶ Error et tenebræ peccatoribus

¹¹⁶ + **11.1 Sapientia humiliati exaltabit caput.** Sequitur: Non laudes virum, etc. Quasi: Ne juxta speciem corporis æstimes qualitatem mentis: unde, Non respicias vultum ejus nec altitudinem staturæ ejus, quoniam abjeci eum, nec juxta intuitum hominis iudico I Reg. 16.. Homo enim videt ea quæ patent. Dominus autem intuetur cor. In honoribus mundanis non est superbiendum, quia transit mundus et concupiscentia ejus.

¹¹⁷ + **11.5 Multi tyranni.** RAB. Divina dispensatione fit, etc., usque ad benedictionem patriarcharum hæreditavit.

¹¹⁸ + **11.8 Priusquam audias.** Qui prius respondet quam audiat, id est, qui doctor esse desiderat antequam discat; vel, aliorum causas judicare, priusquam dignoscat: stultum se esse demonstrat.

¹¹⁹ + **11.10 Fili, ne in multis,** etc. Quasi diceret: De superfluis ne sis curiosus, et peccantium pravitati non consentias. Non solum enim qui faciunt mala, sed qui consentiunt facientibus digni sunt morte. Fili, ne in multis, etc. Multi sunt actus hæreticorum, qui unitatem fidei, et tramitem veritatis non custodiunt, et laborem unum in libris componendis expendunt. Rhetorica et dialectica arte copiosi: nec immunes sunt a dilecto, quia meditatio eorum est in dolo. Unde Ecclesiasticus: Fili, ne facias multos libros, quibus non est finis. Omnes autem libri divinæ Scripturæ quia consentiunt unus liber sunt: unde, In capite libri scriptum est de me Psal. 36., etc. Fili, ne in multis, terrenis lucris, vel quibuslibet negotiis, quia pluribus intentus minor est ad singula sensus. Suscepta cura regiminis impar invenitur quisque ad singula, dum dividitur ad multa: nec sua damna considerat, dum aliena pertractat.

¹²⁰ + **11.11 Est homo laborans.** Christiana opera designat, in quibus pauperes spiritu abundant omnibus bonis, et egent qui laborant in acquirendis divitiis: unde, Divites egerunt, et esurierunt, etc.

concreata sunt: qui autem exsultant in malis consenescent in malo. ¹⁷ Datio Dei permanet justis, et profectus illius successus habebit in æternum. ¹⁸ Est qui locupletatur parce agendo, et hæc est pars mercedis illius. ¹²¹ ¹⁹ In eo quod dicit: Inveni requiem mihi, et nunc manducabo de bonis meis solus: ²⁰ et nescit quod tempus præteriet, et mors appropinquet, et relinquit omnia aliis, et morietur. ²¹ Sta in testamento tuo, et in illo colloquere, et in opere mandatorum tuorum veterasce. ²² Ne manseris in operibus peccatorum: confide autem in Deo, et mane in loco tuo. ²³ Facile est enim in oculis Dei subito honestare pauperem. ²⁴ Benedictio Dei in mercedem justis festinat, et in hora veloci processus illius fructificat. ²⁵ Ne dicas: Quid est mihi opus? et quæ erunt mihi ex hoc bona? ²⁶ Ne dicas: Sufficiens mihi sum: et quid ex hoc pessimabor? ²⁷ In die bonorum ne immemor sis malorum, et in die malorum ne immemor sis bonorum: ²⁸ quoniam facile est coram Deo in die obitus retribuere unicuique secundum vias suas. ²⁹ Malitia horæ oblivionem facit luxuriæ magnæ, et in fine hominis denudatio operum illius. ³⁰ Ante mortem ne laudes hominem quemquam: quoniam in filiis suis agnoscitur vir.] ¹²² ³¹ [Non omnem hominem inducas in domum tuam: multæ enim sunt insidiæ dolosi. ³² Sicut enim eructant præcordia foetentium, et sicut perdix inducitur in caveam, et ut caprea in laqueum: sic et cor superborum, et sicut prospector videns casum proximi sui. ¹²³ ³³ Bona enim in mala convertens insidiatur, et in electis imponet maculam. ³⁴ A scintilla una augetur ignis, et ab uno doloso augetur sanguis: homo vero peccator sanguini insidiatur. ³⁵ Attende tibi a pestifero, fabricat enim mala, ne inducat super te subsannationem in perpetuum. ³⁶ Admitte ad te alienigenam: et subvertet te in turbine, et abalienabit te a tuis propriis.]

12[Si benefeceris, scito cui feceris, et erit gratia in bonis tuis multa. ² Benefac justo, et invenies retributionem magnam: et si non ab ipso, certe a Domino. ³ Non est enim ei bene qui assiduus est in malis, et eleemosynas non danti: quoniam et Altissimus odio habet peccatores, et misertus est pœnitentibus. ¹²⁴ ⁴ Da misericordiam, et ne suscipias peccatorem: et impiis et peccatoribus reddet vindictam, custodiens eos in diem vindictæ. ⁵ Da bono, et non receperis peccatorem. ¹²⁵ ⁶ Benefac humili, et non dederis impio:

¹²¹ + **11.18 Est qui locupletatur**, etc. RAB. Thesaurizat, et ignorat, etc., usque ad sed aliis relinquunt qui veritatem et falsitatem dignoscunt.

¹²² + **11.30 Ante mortem**, etc. ID. Stultum est laudare, etc., usque ad qui veniunt in vestimentis ovium, intrinsecus autem sunt lupi rapaces.

¹²³ + **11.32 Sicut enim eructant**, etc. RAB. Similitudinem sagaciorum animalium, etc., usque ad in caveam erroris et laqueum deceptionis præcipitent.

¹²⁴ + **12.3 Non est enim**, etc. Gravissimum peccatum est nolle pœnitere, nec peccata eleemosynis redimere, sed peccata peccatis addere: unde, Super tribus sceleribus Damasci, et super quatuor non convertam eam Amos, 1.. Dubiam et dolosam doctrinam, quam in expositione divinæ Scripturæ expendunt.

¹²⁵ + **12.5 Da bono**, etc. Simile in Tobia legitur: Panem tuum et vinum super sepulturam justis constitue, et noli ex eo manducare et bibere cum peccatoribus Tob. 4.. Id est pro eo quod peccatores sunt, noli communicare; sicut qui nutriunt histriones, cum esuriant Christi pauperes. Qui autem dat indigenti peccatori, non quia peccator est sed quia homo est, non peccatorem sed justum nutrit: quia culpam non diligit, sed naturam. Si peccatorem et impium hæreticum intelligit

prohibe panes illi dari, ne in ipsis potentior te sit: ⁷ nam duplicia mala invenies in omnibus bonis quaecumque feceris illi, quoniam et Altissimus odio habet peccatores, et impiis reddet vindictam.] ⁸ [Non agnoscetur in bonis amicus, et non abscondetur in malis inimicus. ¹²⁶ ⁹ In bonis viri, inimici illius in tristitia: et in malitia illius, amicus agnitus est. ¹⁰ Non credas inimico tuo in æternum: sicut enim ærumentum æruginat nequitia illius: ¹²⁷ ¹¹ et si humiliatus vadat curvus, adjice animum tuum, et custodi te ab illo. ¹² Non statuas illum penes te, nec sedeat ad dexteram tuam, ne forte conversus in locum tuum, inquirat cathedram tuam, et in novissimo agnosces verba mea, et in sermonibus meis stimuleris. ¹³ Quis miserebitur incantatori a serpente percusso, et omnibus qui appropiant bestiis? et sic qui comitatur cum viro iniquo, et obvolutus est in peccatis ejus. ¹⁴ Una hora tecum permanebit: si autem declinaveris, non supportabit. ¹⁵ In labiis suis indulcat inimicus, et in corde suo insidiatur ut subvertat te in foveam. ¹²⁸ ¹⁶ In oculis suis lacrimatur inimicus, et si invenerit tempus, non satiabitur sanguine. ¹⁷ Et si incurrerint tibi mala, invenies eum illic priorem. ¹⁸ In oculis suis lacrimatur inimicus, et quasi adjuvans suffodiet plantas tuas. ¹⁹ Caput suum movebit, et plaudet manu, et multa susurrans commutabit vultum suum.]

13[Qui tetigerit picem inquinabitur ab ea: et qui communicaverit superbo induet superbiam. ¹²⁹ ² Pondus super se tollat qui honestiori se communicat, et ditiori te ne socius fueris. ¹³⁰ ³ Quid communicabit cacabus ad ollam? quando enim se colliserint, confringetur. ⁴ Dives injuste egit, et fremet: pauper autem læsus tacebit. ⁵ Si largitus fueris, assumet te: et si non habueris, derelinquet te. ⁶ Si habes, convivet tecum, et evacuabit te: et ipse non dolebit super te. ⁷ Si necessarius illi fueris, supplantabit te, et subridens spem dabit, narrans tibi bona, et dicet: Quid opus est tibi? ⁸ Et

dum in errore sunt, non est communicandum cum illis: unde, Nolite sanctum dare canibus Matth. 7..

¹²⁶ + **12.8 Non agnoscetur in bonis amicus.** Facilius amicus et inimicus in adversitate probantur, quia multi amici mensæ, qui non permanent in die necessitatis. Verus igitur erat amicus qui dicebat: Quis infirmatur, et ego non infirmor? II Cor. 11.

¹²⁷ + **12.10 Non credas inimico.** Historice de falsis amicis agit, a quibus cavere debemus. Mystice vero hæreticos notat, qui non vere sunt amici, quorum doctrina plena est rubigine erroris, et nequitiae: quorum sermo serpit ut cancer, quamvis fideles et catholicos se fingunt. Non ergo eis obsentiamus, nec potestatem tribuamus, quam significat dextera: ne a loco nostro, id est, statu rectæ fidei nos dejiciant. Nituntur enim cathedram nostram, id est doctrinam, malitiose subvertere. Quis medebitur. Hæretico qui officium doctoris gerit, et dicit se medicum animarum: Si enim sal infatuatum fuerit, ad nihilum valet ultra, nisi ut mittatur foras Matth. 5..

¹²⁸ + **12.15 In labiis suis.** His sententiis notat eos, qui in corde loquuntur et insidiantur ut interficiant innocentem: qui cum aliquem deceperint, movent caput, plaudunt manu, et lætantur cum male fecerint.

¹²⁹ + **13.1 Qui tetigerit picem inquinabitur.** RAB. Per similitudinem ostendit, etc., usque ad ne mala quæ frequenter aspiciunt, imitari velint.

¹³⁰ + **13.2 Pondus super se tollet.** ID. Hæc moraliter nos instruunt, ut humilia sequamur, superba fugiamus: Quia Deus superbis resistit, humilibus autem dat gratiam Jacob. 4.. Mystice autem docet, etc., usque ad quia æterna confusione dignos ostendent, cum in æternum cruciabantur.

confundet te in cibus suis, donec te exinaniat bis et ter: et in novissimo deridebit te, et postea videns derelinquet te, et caput suum movebit ad te. ⁹ Humiliare Deo, et exspecta manus ejus. ¹⁰ Attende ne seductus in stultitiam humiliaris. ¹¹ Noli esse humilis in sapientia tua, ne humiliatus in stultitiam seducaris. ¹³¹ ¹² Advocatus a potentiore, discede: ex hoc enim magis te advocabit. ¹³² ¹³ Ne improbus sis, ne impingaris: et ne longe sis ab eo, ne eas in oblivionem. ¹⁴ Ne retineas ex æquo loqui cum illo, nec credas multis verbis illius: ex multa enim loquela tentabit te, et subridens interrogabit te de absconditis tuis. ¹⁵ Immitis animus illius conservabit verba tua: et non parcat de malitia, et de vinculis. ¹⁶ Cave tibi, et attende diligenter auditui tuo, quoniam cum subversione tua ambulas: ¹³³ ¹⁷ audiens vero illa, quasi in somnis vide, et vigilabis. ¹⁸ Omni vita tua dilige Deum, et invoca illum in salute tua. ¹³⁴ ¹⁹ Omne animal diligit simile sibi, sic et omnis homo proximum sibi. ¹³⁵ ²⁰ Omnis caro ad similem sibi conjungetur, et omnis homo simili sui sociabitur. ²¹ Si communicabit lupus agno aliquando, sic peccator justo. ²² Quæ communicatio sancto homini ad canem? aut quæ pars diviti ad pauperem? ²³ Venatio leonis onager in eremo: sic et pascua divitum sunt pauperes. ²⁴ Et sicut abominatio est superbo humilitas, sic et execratio divitis pauper. ²⁵ Dives commotus confirmatur ab amicis suis: humilis autem cum ceciderit, expelletur et a notis. ¹³⁶ ²⁶ Diviti decepto multi recuperatores: locutus est superbia, et justificaverunt illum. ²⁷ Humilis deceptus est, insuper et arguitur: locutus est sensate, et non est datus ei locus. ²⁸ Dives locutus est, et omnes tacuerunt, et verbum illius usque ad nubes perducent. ²⁹ Pauper locutus est, et dicunt: Quis est hic? et si offenderit, subvertent illum.] ³⁰ [Bona est substantia cui non est peccatum in conscientia: et nequissima paupertas in ore impii. ³¹ Cor hominis immutat faciem illius, sive in bona, sive in mala. ¹³⁷ ³² Vestigium cordis

¹³¹ + **13.11 Noli esse,** etc. Non virtutem humilitatis abhorret: sed auctoritatem firmam contra expugnatores veritatis docet tenere, quibus fortiter resistendum.

¹³² + **13.12 Advocatus.** Modeste agendum est cum potentibus hujus sæculi, qui frequenter derident innocentium simplicitatem: quibus tamen debitum honorem conferre debemus, sed non contra Deum, vel contra mandata ejus. Unde, Omnes honorate, fraternitatem diligite, Deum timete, regem honorificate I Petr. 2..

¹³³ + **13.16 Cave tibi, et attende.** Quasi: nihil tutum apud amatores mundi, qui mutabilia sequuntur et cum illis mutantur. Unde: Stultus ut luna mutatur Eccle. 27.. Possunt in his hæretici et falsi Christiani intelligi, quibus non est credendum, quia inconstantes sunt in omnibus viis suis.

¹³⁴ + **13.18 Omni vita.** RAB. Cæteris refutatis, etc., usque ad quia prope est Dominus omnibus invocantibus eum in veritate.

¹³⁵ + **13.19 Omne animal.** Ad superiora respicit, ut divitum, scilicet, et potentum societatem declines, et ei jungaris, qui studio et religione tibi consors est. Hæc est enim amicitia firma, quam similitudo virtutum sociat. Si communicabit. Rapacitas lupi cum agni innocentia non convenit, nec avari rabies cum modestia simplicis. Nulla enim communicatio munditiæ cum immunditia: Sicut enim canis revertitur ad vomitum, ita qui iterat stultitiam suam Prov. 6.. Nulla ergo parilitas superbi divitis cum humilitate pauperis Christi.

¹³⁶ + **13.25 Dives commotus.** Quod de divite et paupere increpat, exsequitur: quia multi sunt qui divitis facta et dicta extollunt: pauci qui doctrinam humilium et virtutem intelligunt. Arrogantes inveniunt prædicatores, humiles vero contemptores. Unde: Divitiæ addunt amicos plurimos, a paupere vero, et hi, quos habuit, separantur Prov. 19..

¹³⁷ + **13.31 Cor hominis immutat.** In judicio vultus, mentis mutatio deprehenditur: unde,

boni et faciem bonam difficile invenies, et cum labore.] ¹³⁸

14[Beatus vir qui non est lapsus verbo ex ore suo, et non est stimulatus in tristitia delicti. ¹³⁹ ² Felix qui non habuit animi sui tristitiam, et non excidit a spe sua. ³ Viro cupido et tenaci sine ratione est substantia: et homini livido ad quid aurum? ¹⁴⁰ ⁴ Qui acervat ex animo suo injuste, aliis congregat, et in bonis illius alius luxuriabitur. ⁵ Qui sibi nequam est, cui alii bonus erit? et non jucundabitur in bonis suis. ¹⁴¹ ⁶ Qui sibi invidet, nihil est illo nequius: et hæc redditio est malitiæ illius. ⁷ Et si bene fecerit, ignoranter et non volens facit: et in novissimo manifestat malitiam suam. ¹⁴² ⁸ Nequam est oculus lividi: et avertens faciem suam, et despiciens animam suam. ⁹ Insatiabilis oculus cupidi in parte iniquitatis: non satiabitur donec consumat arefaciens animam suam. ¹⁴³ ¹⁰ Oculus malus ad mala, et non saturabitur pane, sed indigens et in tristitia erit super mensam suam. ¹⁴⁴ ¹¹ Fili, si habes, benefac tecum, et Deo dignas oblationes offer. ¹⁴⁵ ¹² Memor esto quoniam mors non tardat, et testamentum inferorum, quia demonstratum est tibi: testamentum enim hujus mundi morte morietur. ¹³ Ante mortem benefac amico tuo, et secundum vires tuas exporrigens da pauperi. ¹⁴ Non defrauderis a die bono, et particula boni doni non te prætereat. ¹⁵ Nonne aliis relinques dolores et labores tuos in divisione sortis? ¹⁶ Da et accipe, et justifica animam tuam. ¹⁷ Ante obitum tuum operare justitiam, quoniam non est apud inferos invenire cibum. ¹⁸ Omnis caro sicut fœnum veterascet, et sicut folium fructificans in arbore viridi. ¹⁴⁶ ¹⁹ Alia generantur, et alia dejiciuntur: sic generatio carnis et sanguinis, alia finitur, et alia nascitur. ²⁰ Omne opus corruptibile in fine deficient, et qui

Cor gaudens exhilarat faciem, in mœrore animi dejicitur spiritus.

¹³⁸ + **13.32 Vestigium cordis boni.** Quia multi simulati et ficti: ideo difficile invenitur in quo cor et facies, id est cogitatio et operatio atque doctrina, in bono convenient: cum autem hoc invenies, da gloriam Deo, quia hoc ejus donum est.

¹³⁹ + **14.1 Beatus vir,** etc. RAB. Peccando. Hinc Jacobus ait: Qui in verbo non offendit, perfectus est Jacob. 3. Illo, scilicet verbo cujus offensionem humana potest vitare fragilitas.

¹⁴⁰ + **14.3 Viro cupido et tenaci.** Avaritiæ pestem describit quæ excruciat avarum ne consequatur laboris sui fructum, Qui thesaurizat et ignorat cui congregabit ea Psal. 38.

¹⁴¹ + **14.5 Qui sibi nequam.** Hæc ad litteram mentem avari et invidi describunt, qui de bonis suis non lætantur. Allegorice vero significant philosophos et hæreticos qui sine fide Christi congregant divitias pravi dogmatis, quæ nihil proficiunt eis, imo pœnam conferunt æternam.

¹⁴² + **14.7 Et si bene.** ID. Dixerat nihil esse nequius, etc., usque ad nunc vero idem repetit.

¹⁴³ + **14.9 Insatiabilis oculus.** Quia sine fructu bonorum consumit vitam, et sterilem animam gehennæ ignibus tradit cruciendam.

¹⁴⁴ + **14.10 Oculus malus ad mala.** Hæreticorum oculus semper malis est intentus, et panem cœlestem, id est intellectum divinæ sapientiæ non meretur, et in Scripturæ mensa marcescit indigentia.

¹⁴⁵ + **14.11 Fili, si habes.** Hortatur ut, contempta mundi luxuria, bonorum operum oblationes Deo offeramus: quia breve est spatium vitæ in quo operari possumus: post mortem enim, quæ festinat, non est tempus operandi, sed mercedem recipiendi: Unde, Operamini dum dies est: venit enim nox, quando jam non licet operari.

¹⁴⁶ + **14.18 Omnis caro.** Sicut fenum in terra vel folium in arbore nascitur, crescit, virescit, siccatur et dejicitur, ita caro nostra nascitur ex progenie parentum, crescit infantia et pueritia, florescit in adolescentia, maturescit in juventute, arescit in senectute, dejicitur in morte.

illud operatur ibit cum illo. ²¹ Et omne opus electum justificabitur, et qui operatur illud honorabitur in illo.] ²² [Beatus vir qui in sapientia morabitur, et qui in iustitia sua meditabitur, et in sensu cogitabit circumspectionem Dei: ¹⁴⁷ ²³ qui excogitat vias illius in corde suo, et in absconditis suis intelligens, vadens post illam quasi investigator, et in viis illius consistens: ²⁴ qui respicit per fenestras illius, et in januis illius audiens: ²⁵ qui requiescit iuxta domum illius, et in parietibus illius figens palum, statuet casulam suam ad manus illius, et requiescent in casula illius bona per ævum. ¹⁴⁸ ²⁶ Statuet filios suos sub tegmine illius, et sub ramis ejus morabitur. ²⁷ Protegetur sub tegmine illius a fervore, et in gloria ejus requiescet.]

15[Qui timet Deum faciet bona, et qui continens est justitiæ apprehendet illam: ² et obviabit illi quasi mater honorificata, et quasi mulier a virginitate suscipiet illum. ³ Cibabit illum pane vitæ et intellectus, et aqua sapientiæ salutaris potabit illum: et firmabitur in illo, et non flectetur: ¹⁴⁹ ⁴ et continebit illum, et non confundetur: et exaltabit illum apud proximos suos, ⁵ et in medio ecclesiæ aperiet os ejus, et adimplebit illum spiritu sapientiæ et intellectus, et stola gloriæ vestiet illum. ¹⁵⁰ ⁶ Jucunditatem et exultationem thesaurizabit super illum, et nomine æterno hæreditabit illum. ⁷ Homines stulti non apprehendent illam, et homines sensati obviabunt illi. Homines stulti non videbunt eam: longe enim abest a superbia et dolo. ¹⁵¹ ⁸ Viri mendaces non erunt illius memores: et viri veraces invenientur in illa, et successum habebunt usque ad inspectionem Dei. ¹⁵² ⁹ Non est speciosa laus in ore peccatoris, ¹⁵³ ¹⁰ quoniam a Deo profecta est sapientia. Sapientiæ enim Dei astabit laus, et in ore fideli abundabit, et Dominator dabit eam illi.] ¹¹ [Non dixeris: Per Deum abest: quæ enim odit ne feceris. ¹² Non dicas: Ille me implanavit: non enim necessarii sunt ei homines impii. ¹⁵⁴ ¹³ Omne execrumentum erroris odit Dominus, et non erit amabile timentibus eum. ¹⁴ Deus ab initio constituit hominem, et reliquit illum in manu consilii sui: ¹⁵⁵ ¹⁵ adjecit mandata et præcepta sua. ¹⁶ Si volueris mandata

¹⁴⁷ + **14.22 Beatus vir**, etc. Beati immaculati in via, qui ambulant in lege Domini. Beati qui scrutantur testimonia ejus. Psal. CXVIII.

¹⁴⁸ + **14.25 Statuet casulam**. Id est doctoris officium agens, sanæ doctrinæ opera justitiæ conjunget, ut auditores verbo et exemplo instruat.

¹⁴⁹ + **15.3 Aqua sapientiæ**. RAB. gratia Spiritus sancti: unde, Qui biberit aquam quam ego dabo vobis, fiet in eo fons aquæ salientis in vitam æternam Joan. 14., id est non cedit persecutioni, vel hæreticæ pravitati.

¹⁵⁰ + **15.5 Et in medio Ecclesiæ**. Apostolos, prædicatores Evangelii significat, quos Dei sapientia, id est Christus, Ecclesiæ præposuit.

¹⁵¹ + **15.7 Homines stulti**, etc. Pagani, et idololatræ et Judæi, qui crucifigunt Filium Dei, sequentes umbram legis, et respuentes veritatem Evangelii: vel hæretici, qui Scripturas pervertunt.

¹⁵² + **15.8 Et viri veraces**. Omnis qui est ex veritate, audit vocem meam.

¹⁵³ + **15.9 In ore peccatoris**. Hæreticorum, qui doctrinam Patrum despiciunt, et simplices decipiunt. Donum largitatis non invidet Deus alicui, qui vult omnes homines salvos fieri.

¹⁵⁴ + **15.12 Non dicas**. ID. Non sunt mala nostra Deo imputanda, cui non sunt necessaria: Deus intentator malorum est Jacob. 1..

¹⁵⁵ + **15.14 Constituit hominem** ad imaginem et similitudinem suam, et liberum arbitrium dedit ei.

servare, conservabunt te, et in perpetuum fidem placitam facere. ¹⁵⁶ ¹⁷
 Apposuit tibi aquam et ignem, ad quod volueris porrige manum tuam. ¹⁸
 Ante hominem vita et mors, bonum et malum: quod placuerit ei dabitur illi:
¹⁹ quoniam multa sapientia Dei, et fortis in potentia, videns omnes sine
 intermissione. ¹⁵⁷ ²⁰ Oculi Domini ad timentes eum, et ipse agnoscit
 omnem operam hominis. ²¹ Nemini mandavit impie agere, et nemini dedit
 spatium peccandi: ¹⁵⁸ ²² non enim concupiscit multitudinem filiorum
 infidelium et inutilium.]

16[Ne jucunderis in filiis impiis, si multiplicentur: nec oblecteris super ipsos, si non est timor Dei in illis. ² Non credas vitæ illorum, et ne respexeris in labores eorum. ³ Melior est enim unus timens Deum, quam mille filii impii: ⁴ et utile est mori sine filiis, quam relinquere filios impios. ⁵ Ab uno sensato inhabitabitur patria: tribus impiorum deseretur. ¹⁵⁹ ⁶ Multa talia vidit oculis meus, et fortiora horum audivit auris mea. ¹⁶⁰ ⁷ In synagoga peccantium exardebit ignis, et in gente incredibili exardescet ira. ⁸ Non exoraverunt pro peccatis suis antiqui gigantes, qui destructi sunt confidentes suæ virtuti. ¹⁶¹ ⁹ Et non pepercit peregrinationi Lot, et execratus est eos præ superbia verbi illorum. ¹⁰ Non misertus est illis, gentem totam perdens, et extollentem se in peccatis suis. ¹¹ Et sicut sexcenta millia peditum, qui congregati sunt in duritia cordis sui: et si unus fuisset cervicatus, mirum si fuisset immunis. ¹² Misericordia enim et ira est cum illo: potens exoratio, et effundens iram. ¹⁶² ¹³ Secundum misericordiam suam, sic correptio illius homines secundum opera sua judicat. ¹⁴ Non effugiet in rapina peccator, et non retardabit sufferentia misericordiam facientis. ¹⁵ Omnis misericordia faciet locum unicuique, secundum meritum operum suorum, et secundum intellectum peregrinationis ipsius.] ¹⁶ [Non dicas: A Deo abscondar: et ex summo, quis mei memorabitur? ¹⁶³ ¹⁷ in populo magno non agnoscar: quæ

¹⁵⁶ + **15.16 Si volueris.** Id est si volueris implere opera et mandata Dei, habebis consolationem: si contempseris gehennæ ardorem.

¹⁵⁷ + **15.19 Quoniam multa sapientia.** ID. Nullus potest præscientiam Dei, etc., usque ad nihil faciat homo, nisi quod dignum sit conspectui divino.

¹⁵⁸ + **15.21 Nemini mandavit.** Non est auctor Deus peccandi, nec spatium concedit in quo homo impune peccare possit; semper bona præcipit, et mala interdicit. Solummodo placet ei quod bonum est, infidelitas autem et inutilitas displicet, quoniam justus Deus, et justitias dilexit. Psal. 10.

¹⁵⁹ + **16.5 Ab uno sensato inhabitabitur patria.** RAB. Qui secundum sanam regulam Scripturæ fide et opere permanet in semita justitiæ. A tribus impiis deseretur. Scilicet qui cogitatione, locutione, opere seipsum sequestrant a societate bonorum.

¹⁶⁰ + **16.6 Multa talia vidit oculus.** Quanto quis ardentius legem Dei discit, tanto magis illustratur lumine scientiæ: unde, Qui habet mandata mea et servat ea, ille est qui me diligit. Qui autem diligit me, diligetur a Patre meo: et ego diligam eum, et manifestabo ei meipsum Joan. 14..

¹⁶¹ + **16.8 Non exoraverunt pro peccatis.** RAB. Antiqui gigantes, desideriis terrenis irretiti, et sarcina peccatorum gravati; vel hæretici, qui confidunt in virtute sua, et in divitiis dialecticæ et rhetoricæ gloriantur.

¹⁶² + **16.12 Misericordia enim et ira cum illo.** RAB. Divina censura æqualitatem servat, etc., usque ad: Qui sequitur justitiam et misericordiam, inveniet vitam et justitiam et gloriam Prov. 21.

¹⁶³ + **16.16 Non dicas: A Deo abscondar.** Reprehendit eos, qui Deum credunt non curare mortalia: unde Eliphaz, Quid enim novit Deus? Et quasi per caliginem judicat. Nubes latibulum

est enim anima mea in tam immensa creatura? ¹⁸ Ecce cælum et cæli cælorum, abyssus, et universa terra, et quæ in eis sunt, in conspectu illius commovebuntur. ¹⁶⁴ ¹⁹ Montes simul, et colles, et fundamenta terræ, cum conspexerit illa Deus, tremore concutientur. ²⁰ Et in omnibus his insensatum est cor, et omne cor intelligitur ab illo. ²¹ Et vias illius quis intelligit, et procellam quam nec oculus videbit hominis? ²² Nam plurima illius opera sunt in absconsis: sed opera justitiæ ejus quis enuntiabit, aut quis sustinebit? longe enim est testamentum a quibusdam, et interrogatio omnium in consummatione est. ¹⁶⁵ ²³ Qui minoratur corde cogitat inania, et vir imprudens et errans cogitat stulta.] ²⁴ [Audi me, fili, et discite disciplinam sensus, et in verbis meis attende in corde tuo: ²⁵ et dicam in æquitate disciplinam, et scrutabor enarrare sapientiam: et in verbis meis attende in corde tuo, et dico in æquitate spiritus virtutes quas posuit Deus in opera sua ab initio, et in veritate enuntio scientiam ejus. ¹⁶⁶ ²⁶ In judicio Dei opera ejus ab initio, et ab institutione ipsorum distinxit partes illorum, et initia eorum in gentibus suis. ¹⁶⁷ ²⁷ Ornavit in æternum opera illorum: nec esurierunt, nec laboraverunt, et non destiterunt ab operibus suis. ²⁸ Unusquisque proximum sibi non angustiabit in æternum: ²⁹ non sis incredibilis verbo illius. ¹⁶⁸ ³⁰ Post hæc Deus in terram respexit, et implevit illam bonis suis: ³¹ anima omnis vitalis denunciavit ante faciem ipsius, et in ipsam iterum reversio illorum.] ¹⁶⁹

17[Deus creavit de terra hominem, et secundum imaginem suam fecit illum: ¹⁷⁰ ² et iterum convertit illum in ipsam, et secundum se vestivit illum virtute. ¹⁷¹ ³ Numerum dierum et tempus dedit illi, et dedit illi

ejus, nec nostra considerat Job. 22.. Hinc Paulus ait, Vivus est sermo Dei et efficax, et penetrabilior omni gladio ancipiti, et pertingens usque ad divisionem animæ ac spiritus, compagum quoque ac medullarum, et discretor cogitationum et intentionum cordis Hebr. 4..

¹⁶⁴ + **16.18 Ecce cælum, et cæli cælorum.** Quasi: Si majora pro voluntate sua dispensat, et comprehendit: minora eum latere non possunt, ad cujus nutum omnia pavent et contremiscunt; et non est qui possit ejus resistere voluntati.

¹⁶⁵ + **16.22 Et opera justitiæ.** Nemo enuntiare potest altitudinem justitiæ ejus, nec sustinere justitiæ distractionem. A quibusdam; et interrogatio hominum, etc. Idololatris, hæreticis, vel falsis catholicis: unde, Non enim auditores legis justificantur, sed factores Rom. 2..

¹⁶⁶ + **16.25 Et dicam in æquitate.** RAB. Qui intento corde desiderat, etc., usque ad sed statum sanctæ Ecclesiæ aperte manifestat.

¹⁶⁷ + **16.26 Distinxit partes illorum.** Singularum gentium originem per diversas partes mundi discevit, ut quæque gens parentis sui vocabulo denominata proprias sedes possideret. Mystice autem divina sapientia Ecclesiam instituens, per totius orbis partes dilatavit, et in singulis gentibus collocavit: ut in diversis locis diversa nomina vindicaret sibi, unde Joannes in Apocalypsi: Angelo Smyrnæ Ecclesiæ scribe Apoc. 2., et Pergami et Thyatiræ et cæteris.

¹⁶⁸ + **16.29 Non sis incredibilis verbo illius.** Dixit superius, quomodo ab initio Deus in scientia et judicio ordinavit opera sua: nunc interposita sententia auditorem hortatur, ne incredibilis verbo illius a statu rectitudinis flectatur, et ad narrationem redit, ostendens quomodo clementia Dei genus humanum reparavit sic: Post hæc Deus in terram respexit, etc.

¹⁶⁹ + **16.31 Denuntiavit,** cogitationis arcana: unde, Intellexisti cogitationes meas de longe Psal. 138.. Et, Dominus novit cogitationes hominum Psal. 93..

¹⁷⁰ + **17.1 Deus creavit.** RAB. Ut sic vivat, sapiat, etc., usque ad ita homo charitatem habeat, ut sit bonus et justus; etc.

¹⁷¹ + **17.2 Et secundum se vestivit,** etc. Unde: Induite novum hominem, qui secundum Deum

potestatem eorum quæ sunt super terram. ¹⁷² ⁴ Posuit timorem illius super omnem carnem, et dominatus est bestiarum et volatilium. ⁵ Creavit ex ipso adjutorium simile sibi: consilium, et linguam, et oculos, et aures, et cor dedit illis excogitandi, et disciplina intellectus replevit illos. ¹⁷³ ⁶ Creavit illis scientiam spiritus, sensu implevit cor illorum, et mala et bona ostendit illis. ⁷ Posuit oculum suum super corda illorum, ostendere illis magnalia operum suorum: ⁸ ut nomen sanctificationis collaudent, et gloriari in mirabilibus illius; ut magnalia enarrent operum ejus. ⁹ Addidit illis disciplinam, et legem vitæ hæreditavit illos. ¹⁷⁴ ¹⁰ Testamentum æternum constituit cum illis, et justitiam et judicia sua ostendit illis. ¹¹ Et magnalia honoris ejus vidit oculus illorum, et honorem vocis audierunt aures illorum. Et dixit illis: Attendite ab omni iniquo. ¹² Et mandavit illis unicuique de proximo suo. ¹³ Viæ illorum coram ipso sunt semper: non sunt absconsæ ab oculis ipsius. ¹⁷⁵ ¹⁴ In unamquamque gentem præposuit rectorem: ¹⁷⁶ ¹⁵ et pars Dei Israël facta est manifesta. ¹⁶ Et omnia opera illorum velut sol in conspectu Dei: et oculi ejus sine intermissione inspicientes in viis eorum. ¹⁷ Non sunt absconsa testamenta per iniquitatem illorum, et omnes iniquitates eorum in conspectu Dei. ¹⁸ Eleemosyna viri quasi signaculum cum ipso, et gratiam hominis quasi pupillam conservabit. ¹⁹ Et postea resurget, et retribuet illis retributionem, unicuique in caput ipsorum, et convertet in interiores partes terræ. ²⁰ Pœnitentibus autem dedit viam justitiæ, et confirmavit deficientes sustinere, et destinavit illis sortem veritatis.] ²¹ [Convertere ad Dominum, et relinque peccata tua: ¹⁷⁷ ²² precare ante faciem Domini, et minue offendicula. ²³ Revertere ad Dominum, et avertere ab injustitia tua, et nimis odito execrationem: ²⁴ et cognosce justitias et judicia Dei, et sta in sorte propositionis, et orationis altissimi Dei. ²⁵ In partes vade sæculi sancti, cum vivis et dantibus confessionem Deo. ²⁶ Non demoreris in errore impiorum:

creatus est in justitia et veritatis sanctitate Ephes. 9..

¹⁷² + **17.3 Et dedit illi potestatem.** Quia in hoc quoque factus est homo ad imaginem Dei, quo irrationabilibus ratione antecellit, et ea regit et dominatur in eis, et omnium creatorem agnoscit. Sed quia honorem suum non intellexit, comparatus est jumentis insipientibus Psal. 48..

¹⁷³ + **17.5 Creavit ex ipso.** Sicut de latere Adæ dormientis formata est Eva, sic de latere Christi in cruce morientis exivit sanguis et aqua, de quibus formatur Ecclesia.

¹⁷⁴ + **17.9 Et legem vitæ.** Naturalem, quam dedit omni homini, ut subjiceretur suo creatori, et bonorum operum in se honorificentiam custodiret. Vel, legem litteræ, quam ad correctionem morum, et reparationem naturalis legis, scribi voluit; hoc enim naturalis lex et litteralis insinuat, ut Deum toto corde, tota anima, tota virtute diligamus: et mandata ejus in Dei et proximi dilectione custodiamus.

¹⁷⁵ + **17.13 Coram illo.** RAB. Unde: Novit Dominus viam justorum, et iter impiorum peribit Psal. 1..

¹⁷⁶ + **17.14 Rectorem.** Angelos, quibus commisit Deus custodiam singularum gentium! Unde, Statuit terminos gentium juxta numerum angelorum Dei. Deut. 32. Vel, doctores quos ad prædicandum misit.

¹⁷⁷ + **17.21 Convertere.** Ostensa conditione hominis, quomodo scilicet ad imaginem Dei creatus sit, et cæteris prælatus creaturis: hortatur ut post lapsum peccati revertatur ad factorem suum, relinquens errorem, quo semetipsum decepit; et deprecetur Deum pro offensionibus suis, et tota mente refugiat ad divinam misericordiam, spernens idololatriam, et diabolicæ servitutis fallaciam. Discat et mandatorum Dei regulam, ut in sorte sanctitatis, qua electus est, permaneat, et in laudibus Altissimi perseveret.

ante mortem confitere: a mortuo, quasi nihil, perit confessio. ²⁷ Confiteberis vivens, vivus et sanus confiteberis: et laudabis Deum, et gloriaberis in miserationibus illius. ¹⁷⁸ ²⁸ Quam magna misericordia Domini, et propitiatio illius convertentibus ad se ! ²⁹ Nec enim omnia possunt esse in hominibus, quoniam non est immortalis filius hominis, et in vanitate malitiæ placuerunt. ³⁰ Quid lucidius sole? et hic deficiet; aut quid nequius quam quod excogitavit caro et sanguis? et hoc arguetur. ¹⁷⁹ ³¹ Virtutem altitudinis cæli ipse conspicit: et omnes homines terra et cinis.]

18[Qui vivet in æternum creavit omnia simul. Deus solus justificabitur, et manet invictus rex in æternum. ¹⁸⁰ ² Quis sufficit enarrare opera illius? ³ quis enim investigabit magnalia ejus? ⁴ virtutem autem magnitudinis ejus quis enuntiabit? aut quis adjiciet enarrare misericordiam ejus? ⁵ Non est minuere neque adjicere, nec est invenire magnalia Dei. ¹⁸¹ ⁶ Cum consummaverit homo, tunc incipiet: et cum quieverit, aporiabitur. ⁷ Quid est homo? et quæ est gratia illius? et quid bonum aut quid nequam illius? ⁸ Numerus dierum hominum, ut multum centum anni, quasi gutta aquæ maris deputati sunt: et sicut calculus arenæ, sic exigui anni in die ævi. ¹⁸² ⁹ Propter hoc patiens est Deus in illis, et effundit super eos misericordiam suam. ¹⁰ Vidit præsumptionem cordis eorum, quoniam mala est: et cognovit subversionem illorum, quoniam nequam est. ¹¹ Ideo adimplevit propitiationem suam in illis, et ostendit eis viam æquitatis. ¹² Miseratio hominis circa proximum suum: misericordia autem Dei super omnem carnem. ¹⁸³ ¹³ Qui misericordiam habet, docet et erudit quasi pastor gregem suum. ¹⁴ Misereatur excipientis doctrinam miserationis, et qui festinat in judiciis ejus.] ¹⁸⁴ ¹⁵ [Fili, in bonis non des querelam, et in omni dato non des tristitiam verbi mali. ¹⁸⁵ ¹⁶ Nonne ardorem refrigerabit ros?

¹⁷⁸ + **17.27 Confiteberis vivens.** RAB. In præsentī vita, postquam non est tempus operandi, sed præmium recipiendi: Unde, Currite dum lucem habetis, ne tenebræ vos comprehendant Joan. 12..

¹⁷⁹ + **17.30 Quid lucidius sole?** ID. Ostendit mundi machinam transitoriam esse: nec lux corporalis perpetuo eadem manet; quanto minus vana cogitatio humanæ fragilitatis.

¹⁸⁰ + **18.1 Qui vivit in æternum.** RAB. Rerum substantia simul creata est, etc., usque ad magnitudinem virtutis scire vel enarrare: unde, Nemo novit Filium nisi Pater, neque Patrem quis novit nisi Filius, et cui voluerit Filius revelare Matth. 11..

¹⁸¹ + **18.5 Non est minuere.** ID. Nihil de Scripturis sanctis est minuendum, nihil addendum: unde, Si quis apposuerit ad hæc, apponet super illum Deus plagas scriptas in libro isto Apoc. 22., etc.

¹⁸² + **18.8 Centum anni.** ID. Paucitatem dierum nostrorum comparat guttæ maris, et calculo arenæ: quia ad comparisonem æternæ felicitatis nimia est brevitatis, et miseria maxima: unde, Homo natus de muliere, brevi vivens tempore, repletur multis miseriis Job. 14..

¹⁸³ + **18.12 Miseratio hominis.** Pauci sunt, qui misereantur proximo: cum misericordia Dei redundat per universum mundum, qui solem suum facit oriri super bonos et malos.

¹⁸⁴ + **18.14 Excipiens doctrinam.** Hortatur eos qui doctrinam Evangelii accipiunt, ut misericordiam proximis impendant: et festinent diem judicii misericordiæ operibus prævenire; unde: Beati misericordes, quoniam ipsi misericordiam consequentur Matth. 5..

¹⁸⁵ + **18.15 Verbi mali.** Lingua eucharis gratiosum hominem facit; unde: Qui moderatur sermones suos doctus et prudens est Prov. 17..

sic et verbum melius quam datum. ¹⁸⁶ ¹⁷ Nonne ecce verbum super datum bonum? sed utraque cum homine justificato. ¹⁸ Stultus acriter improperebit: et datus indisciplinati tabescere facit oculos. ¹⁸⁷ ¹⁹ Ante iudicium para justitiam tibi, et antequam loquaris, disce. ¹⁸⁸ ²⁰ Ante languorem adhibe medicinam: et ante iudicium interroga teipsum, et in conspectu Dei invenies propitiationem. ¹⁸⁹ ²¹ Ante languorem humilia te, et in tempore infirmitatis ostende conversationem tuam. ²² Non impediaris orare semper, et ne verearis usque ad mortem justificari, quoniam merces Dei manet in æternum. ²³ Ante orationem præpara animam tuam, et noli esse quasi homo qui tentat Deum. ¹⁹⁰ ²⁴ Memento iræ in die consummationis, et tempus retributionis in conversatione faciei. ¹⁹¹ ²⁵ Memento paupertatis in tempore abundantiae, et necessitatum paupertatis in die divitiarum. ¹⁹² ²⁶ A mane usque ad vesperam immutabitur tempus, et hæc omnia citata in oculis Dei. ¹⁹³ ²⁷ Homo sapiens in omnibus metuet, et in diebus delictorum attendet ab inertia. ¹⁹⁴ ²⁸ Omnis astutus agnoscit sapientiam, et inveniendi eam dabit confessionem. ¹⁹⁵ ²⁹ Sensati in verbis et ipsi sapienter egerunt, et intellexerunt veritatem et justitiam, et impleverunt proverbia et iudicia.] ¹⁹⁶ ³⁰ [Post concupiscentias tuas non eas, et a voluntate tua avertere. ³¹ Si præstes animæ tuæ concupiscentias ejus, faciat te in gaudium inimicis tuis. ³² Ne oblecteris in turbis nec in modicis: assidua enim est commissio illorum. ³³ Ne fueris mediocris in contentione ex fœnore, et est tibi nihil in sacco: eris enim invidus vitæ tuæ.] ¹⁹⁷

19[Operarius ebriosus non locupletabitur: et qui spernit modica paulatim

¹⁸⁶ + **18.16 Nonne ardorem.** Segetes defendit ros ab ardore solis: et verbum bonum largientem a nequitia irascentis; unde: Sermo durus suscitatur rixas, lenis mitigat suscitatas Prov. 15..

¹⁸⁷ + **18.18 Stultus acriter improperebit.** RAB. In ore stulti iurgia, etc., usque ad polluunt verbo mendaci.

¹⁸⁸ + **18.19 Para justitiam.** Ut videas quid in te Deo placeat vel displiceat, et delicta corrigas.

¹⁸⁹ + **18.20 Ante iudicium.** RAB. Hæc monent ut semper parati simus, nec stulta securitate nobis blandiamur: sed in Dei servitute laboremus usque ad finem vitæ.

¹⁹⁰ + **18.23 Ante orationem.** Cum stabis ad orandum, dimitte si quid habeas adversus aliquem.

¹⁹¹ + **18.24 Memento.** Unde: Justus Dominus, et justitias dilexit: æquitatem vidit vultus ejus Psal. 10..

¹⁹² + **18.25 Paupertatis.** Futuræ post hanc vitam, ut facias amicos qui recipiant te in æterna tabernacula.

¹⁹³ + **18.26 Hæc omnia.** Ver, æstas, autumnus, hiems, dies et nox, nunquam omnia requiescunt; et tamen omnia æternitati comparata cito transeunt: et omnia coram oculis Domini certo fine clauduntur. Ipse autem semper idem est, et anni ejus non deficient.

¹⁹⁴ + **18.27 Homo sapiens.** Beatus est homo qui semper est pavidus ut a peccatis suis caveat, et præcepta Domini impleat: Quia initium sapientiæ timor Domini. Intellectus bonus omnibus facientibus eum Psal. CX..

¹⁹⁵ + **18.28 Inveniendi.** Id est, cum invenerit, et agnitionem ejus perceperit, ipsa dabit confessionem rectæ prædicationis, et studium bonæ operationis.

¹⁹⁶ + **18.29 Sensati.** Quasi astuti agnoscunt sapientiam, et sensati in verbis opere demonstrant prudentiam.

¹⁹⁷ + **18.33 Ne fueris mediocris.** Provocat nos ad opera misericordiæ. Si enim pigri fuerimus, non modo deerunt nobis solatia temporalia, imo animæ nostræ bona futura: quando temporalis eleemosyna remunerabitur mercede æterna.

decidet. ¹⁹⁸ ² Vinum et mulieres apostatare faciunt sapientes, et arguent sensatos. ¹⁹⁹ ³ Et qui se jungit fornicariis erit nequam: putredo et vermes hæreditabunt illum: et extolletur in exemplum majus, et tolletur de numero anima ejus.] ²⁰⁰ ⁴ [Qui credit cito levis corde est, et minorabitur: et qui delinquit in animam suam, insuper habebitur. ⁵ Qui gaudet iniquitate, denotabitur: et qui odit correptionem, minuetur vita: et qui odit loquacitatem, extinguit malitiam. ⁶ Qui peccat in animam suam, pœnitebit: et qui jucundatur in malitia, denotabitur. ⁷ Ne iteres verbum nequam et durum, et non minoraberis. ²⁰¹ ⁸ Amico et inimico noli narrare sensum tuum: et si est tibi delictum, noli denudare: ²⁰² ⁹ audiet enim te, et custodiet te, et quasi defendens peccatum, odiet te, et sic aderit tibi semper. ¹⁰ Audisti verbum adversus proximum tuum? commoriatur in te, fidens quoniam non te dirumpet. ²⁰³ ¹¹ A facie verbi parturit fatuus, tamquam gemitus partus infantis. ¹² Sagitta infixæ femori carnis, sic verbum in corde stulti. ¹³ Corripe amicum, ne forte non intellexerit, et dicat: Non feci: aut, si fecerit, ne iterum addat facere. ¹⁴ Corripe proximum, ne forte non dixerit: et si dixerit, ne forte iteret. ¹⁵ Corripe amicum, sæpe enim fit commissio: ²⁰⁴ ¹⁶ et non omni verbo credas. Est qui labitur lingua, sed non ex animo: ²⁰⁵ ¹⁷ quis est enim qui non deliquerit in lingua sua?] [Corripe proximum antequam commineris, ¹⁸ et da locum timori Altissimi: quia omnis sapientia timor Dei, et in illa timere Deum, et in omni sapientia dispositio legis. ¹⁹ Et non est sapientia nequitiae disciplina, et non est cogitatus peccatorum prudentia. ²⁰ Est nequitia, et in ipsa execratio, et est insipiens qui minuitur sapientia. ²⁰⁶ ²¹ Melior est homo qui minuitur sapientia, et deficiens sensu,

¹⁹⁸ + **19.1 Operarius ebriosus.** RAB. Ad superiora respicit ubi ait, Non oblecteris in turbis, quibus scilicet ebrietatis vitium leve esse putatur, cum sit detrimentum bonarum rerum, et multiplicatio scelerum. Modica. Verbum otiosum, risum, comessationes, potationes, et hujusmodi.

¹⁹⁹ + **19.2 Et mulieres.** RAB. Fornicatio, qua derelicta veritate fidei, junguntur dæmoniis.

²⁰⁰ + **19.3 Jungit fornicariis.** Reprehensibiles ostendit; quia relicta vera sapientia stulti facti sunt, et fornicariis se jungunt. Qui credit, etc. Levitas animi describitur, quæ infirma et mutabilis est: unde, Stultus ut luna mutatur. Qui credit. De charitate dicit Apostolus, Omnia credit, omnia sperat, omnia sustinet I Cor. 12.. Sed ibi perfectio bonæ voluntatis, quæ semper prompta est ad omne opus bonum. Hic autem Levitas animi describitur, quæ statum firmitatis non habet.

²⁰¹ + **19.7 Ne iteres verbum durum et nequam.** RAB. Id est, post fletum, etc., usque ad factum ne replices pessimo.

²⁰² + **19.8 Amico et inimico.** Hortatur ut cautelam et discretionem habeamus: ne amico et inimico, id est catholico et hæretico nostra pandamus occulta: quia inimicus, licet blandiatur, decipere tentat.

²⁰³ + **19.10 Audisti,** etc. Non æqualiter stultum et sapientem commovet stultum verbum. Stultus enim perturbat sensum, ut gemitum doloris exprimat per actum nefandum: sed non conturbat ictum quidquid acciderit. Sed cavendum est illi, qui de firmitate cordis confidit, ne memoriam retineat verbi duri.

²⁰⁴ + **19.15 Corripe amicum.** Corripere debemus amicos delinquentes cum omni patientia, quia aliquando per ignorantiam, aliquando per negligentiam, aliquando per inobedientiam et contemptum peccant, si forte cum discretionem correpti agant pœnitentiam, et in futuro habeant diligentiam et cautelam: unde, Instruite hujusmodi in spiritu lenitatis Gal. 6..

²⁰⁵ + **19.16 Est qui labitur lingua sua.** Magna differentia est inter eum, qui peccat per simplicitatem vel ignorantiam, et eum qui peccat per malitiam. Potest enim fieri, ut quis offendant in verbo, quod tamen non putat esse malum; sed magis peccat qui plenus est dolo et nequitia.

²⁰⁶ + **19.20 Minuitur sapientia.** Mysteriorum intelligentia, non tamen a mandatorum Dei

in timore, quam qui abundat sensu, et transgreditur legem Altissimi. ²⁰⁷ ²²
 Est solertia certa, et ipsa iniqua: ²⁰⁸ ²³ et est qui emittit verbum certum
 enarrans veritatem. Est qui nequiter humiliat se, et interiora ejus plena sunt
 dolo: ²⁴ et est qui se nimium submittit a multa humilitate: et est qui inclinat
 faciem suam, et fingit se non videre quod ignoratum est: ²⁵ et si ab
 imbecillitate virium vetetur peccare, si invenerit tempus malefaciendi,
 malefaciet. ²⁶ Ex visu cognoscitur vir, et ab occurso faciei cognoscitur
 sensatus. ²⁰⁹ ²⁷ Amictus corporis, et risus dentium, et ingressus hominis,
 enuntiant de illo. ²⁸ Est correptio mendax in ira contumeliosi, et est
 iudicium quod non probatur esse bonum: et est tacens, et ipse est prudens.]

20[Quam bonum est arguere, quam irasci, et confitentem in oratione non
 prohibere ! ²¹⁰ ² Concupiscentia spadonis devirginabit juvenculam: ²¹¹ ³
 sic qui facit per vim iudicium iniquum. ⁴ Quam bonum est correptum
 manifestare pœnitentiam ! sic enim effugies voluntarium peccatum. ⁵ Est
 tacens qui invenitur sapiens: et est odibilis qui procax est ad loquendum. ²¹²
⁶ Est tacens non habens sensum loquelæ: et est tacens sciens tempus aptum.
⁷ Homo sapiens tacebit usque ad tempus: lascivus autem et imprudens non
 servabunt tempus. ²¹³ ⁸ Qui multis utitur verbis lædet animam suam: et
 qui potestatem sibi sumit injuste, odietur. ⁹ Est processio in malis viro
 indisciplinato, et est inventio in detrimentum. ¹⁰ Est datum quod non est
 utile, et est datum cuius retributio duplex. ¹¹ Est propter gloriam minoratio,
 et est qui ab humilitate levabit caput. ¹² Est qui multa redimat modico
 pretio, et restituens ea in septuplum. ²¹⁴ ¹³ Sapiens in verbis seipsum
 amabilem facit: gratiæ autem fatuorum effundentur. ¹⁴ Datus insipientis
 non erit utilis tibi: oculi enim illius septemplices sunt. ²¹⁵ ¹⁵ Exigua dabit,

custodia. Unde sequitur:

²⁰⁷ + **19.21 Melior est**, etc. Qui scilicet timore Dei implet quod novit: unde, Qui enim scit
 voluntatem domini et non facit, vapulabit paucis Luc. 12.: exiguo enim conceditur misericordia.

²⁰⁸ + **19.22 Est solertia certa**, etc. Incipit dare differentiam inter sanctos et hypocritas.
 RAB. Sic hæretici et hypocritæ ostendunt virtutum speciem, sed veritatem ejus non habent: et ut
 peccandi locum invenerint, ostendunt quod in corde habebant.

²⁰⁹ + **19.26 Ex visu**. ID. Exterioribus indicibus cognoscitur affectus animi, unde: Non est arbor
 bona, quæ fructus malos facit Luc. 6., etc. Et ex abundantia cordis os loquitur Matth. 12..

²¹⁰ + **20.1 Quam bonum est**. RAB. Prohibuit iracundiam in iudicio, etc., usque ad et doctrina
 omnis per patientiam dignoscitur.

²¹¹ + **20.2 Concupiscentia**. Probat exemplo, quod bonum sit non irasci: quia sicut concupis-
 centia spadonis maculat virginem, nec generat sobolem: ita violentia iniqui simulat iudicium, sed
 non servat æquitatis modum.

²¹² + **20.5 Est tacens**. Hic laudatur modestus, et culpatur temerarius. Est autem tacens, etc.
 Exponit quam taciturnitatem laudet. Alii enim tacent, quia nesciunt loqui: alii autem quia sciunt
 esse tempus tacendi, et tempus loquendi.

²¹³ + **20.7 Homo sapiens**, etc. Prudentes moderantur sermones suos, et tempus servant: stultus
 vero totum spiritum suum profert.

²¹⁴ + **20.12 Est qui multa**, etc. RAB. Qui scilicet per confessionem humilitatis ab omni reatu
 solvitur. Et restituens, etc. Quando in locum vitiorum subrogat multiplicem numerum virtutum:
 Ut ubi abundavit delictum, superabundet gratia Rom. 5..

²¹⁵ + **20.14 Oculi enim**, etc. Id est, intentio, scilicet variis nequitiis maculata, semper ad
 nocendum parata. Septenarius enim universitatem significat.

et multa improperebit: et apertio oris illius inflammatio est. ¹⁶ Hodie fœneratur quis, et cras expetit: odibilis est homo hujusmodi. ²¹⁶ ¹⁷ Fatuo non erit amicus, et non erit gratia bonis illius: ²¹⁷ ¹⁸ qui enim edunt panem illius, falsæ linguæ sunt. Quoties et quanti irridebunt eum ! ²¹⁸ ¹⁹ neque enim quod habendum erat directo sensu distribuit; similiter et quod non erat habendum. ²⁰ Lapsus falsæ linguæ quasi qui in pavimento cadens: sic casus malorum festinanter veniet. ²¹⁹ ²¹ Homo acharis quasi fabula vana, in ore indisciplinatorum assidua erit. ²²⁰ ²² Ex ore fatui reprobabitur parabola: non enim dicit illam in tempore suo.] ²²¹ ²³ [Est qui vetatur peccare præ inopia, et in requie sua stimulabitur. ²²² ²⁴ Est qui perdet animam suam præ confusione, et ab imprudenti persona perdet eam: persona autem acceptione perdet se. ²²³ ²⁵ Est qui præ confusione promittit amico, et lucratus est eum inimicum gratis. ²²⁴ ²⁶ Opprobrium nequam in homine mendacium: et in ore indisciplinatorum assidue erit. ²⁷ Potior fur quam assiduitas viri mendacis: perditionem autem ambo hæreditabunt. ²²⁵ ²⁸ Mores hominum mendacium sine honore, et confusio illorum cum ipsis sine intermissione. ²⁹ Sapiens in verbis producet seipsum, et homo prudens placebit magnatis. ²²⁶ ³⁰ Qui operatur terram suam inaltabit acervum frugum, et qui operatur justitiam, ipse exaltabitur: qui vero placet magnatis effugiet iniquitatem. ³¹ Xenia et dona excæcant oculos iudicum, et quasi mutus, in ore avertit correptiones eorum. ³² Sapientia absconsa, et

²¹⁶ + **20.16 Hodie fœneratur**, etc. Instabilitatem hæreticorum ostendit: quia sensum sui erroris violenter ab auditoribus extorquent, et ideo odibiles sunt Deo et hominibus. Vel, qui de eleemosyna in præsentem retributionem quærit, odibilem se facit: unde, Voca pauperes et debiles, cæcos, claudos, et beatus eris: quia non habent retribuere tibi. Retribuetur autem tibi in resurrectione iustorum Luc. 14..

²¹⁷ + **20.17 Fatuo non erit amicus**, etc. Quia laboris præmium in vita hac quærit, vel hæreticus qui gloriam humanam appetit.

²¹⁸ + **20.18 Quoties et quanti**, etc. Detestabilis est cœtus hæreticorum, quia Scripturam Dei pravo sensu interpretantur, et expositionem suam inique prædicant.

²¹⁹ + **20.20 Lapsus falsæ linguæ**, etc. Sicut in planitie pavimenti, ubi offendicula non sunt, frustra quis cadit: sic hæreticorum sensus propria nequitia excæcatus, in semita veritatis quæ aperta est, casum invenit.

²²⁰ + **20.21 Homo acharis**, etc. Sine gratia Spiritus sancti; vel amarus, quia amarum ex noxium sensum ingerit auditoribus.

²²¹ + **20.22 Fatui reprobabitur parabola**, etc. RAB. Judæi, qui adhuc putant, etc., usque ad hæretici, qui sophisticis argumentis nituntur evertere veritatem Evangelii.

²²² + **20.23 Est qui vetatur**. Reprehensa falsitate hæreticorum, intentionem pravæ voluntatis vituperat. Sunt enim, qui cum non possunt actu peccare, nolunt in voluntate quiescere.

²²³ + **20.24 Est qui perdet animam suam**. Quia timens hujus mundi potestatem, non audet profiteri Evangelii veritatem: unde, Qui erubuerit me et meos sermones, hunc erubescet Filius hominis Luc. 9..

²²⁴ + **20.25 Est qui præ confusione**, etc. Sunt qui plura promittunt, et pauca reddunt, et eos quibus mentiendo promittunt, inimicos sibi faciunt.

²²⁵ + **20.27 Potior fur**. Non excusat furem, sed ejus comparatione ingravat mentiendi assiduitatem. Mystice autem fures, sunt Judæi, quibus dicitur, Qui prædicas non furandum, furaris Rom. 2.. Hæretici vero mendaces qui peiores sunt, quia post perceptam baptismi gratiam ad vomitum redierunt, et Spiritui gratiæ contumeliam fecerunt.

²²⁶ + **20.29 Sapiens in verbis**, etc. Quia sapientiam mentis demonstrat in bene dictis: unde, Bonus homo de bono thesauro cordis sui profert bonum Matth. 12..

thesaurus invisus, quæ utilitas in utrisque? ²²⁷ ³³ Melior est qui celat insipientiam suam, quam homo qui abscondit sapientiam suam.]

21 [Fili, peccasti, non adjicias iterum: sed et de pristinis deprecare, ut tibi dimittantur. ²²⁸ ² Quasi a facie colubri fuge peccata: et si accesseris ad illa, suscipient te. ²²⁹ ³ Dentes leonis dentes ejus, interficientes animas hominum. ²³⁰ ⁴ Quasi rhomphæa bis acuta omnis iniquitas: plagæ illius non est sanitas. ⁵ Objurgatio et injuriæ annullabunt substantiam, et domus quæ nimis locuples est annullabitur superbia: sic substantia superbi eradicabitur. ²³¹ ⁶ Deprecatio pauperis ex ore usque ad aures ejus perveniet, et judicium festinato adveniet illi. ²³² ⁷ Qui odit correptionem vestigium est peccatoris, et qui timet Deum convertetur ad cor suum. ²³³ ⁸ Notus a longe potens lingua audaci, et sensatus scit labi se ab ipso. ²³⁴ ⁹ Qui ædificat domum suam impendiis alienis, quasi qui colligat lapides suos in hieme. ²³⁵ ¹⁰ Stupa collecta synagoga peccantium, et consummatio illorum flamma ignis. ¹¹ Via peccatorum complanata lapidibus: et in fine illorum inferi, et tenebræ, et pœnæ.] ²³⁶ ¹² [Qui custodit justitiam, continebit sensum ejus. ¹³ Consummatio timoris Dei, sapientia et sensus. ¹⁴ Non erudietur qui non est sapiens in bono. ²³⁷ ¹⁵ Est autem sapientia quæ abundat in malo, et non est sensus ubi est amaritudo. ¹⁶ Scientia sapientis tamquam inundatio abundabit, et consilium illius sicut fons vitæ permanet. ¹⁷ Cor fatui quasi vas confractum, et omnem sapientiam non tenebit. ¹⁸ Verbum sapiens quodcumque audierit sciens, laudabit, et ad se adjiciet: audivit luxuriosus, et displicebit illi, et projiciet illud post dorsum suum. ²³⁸ ¹⁹ Narratio fatui quasi sarcina in via: nam in labiis sensati invenietur gratia. ²⁰

²²⁷ + **20.32 Sapientia absconsa.** Nulla est utilitas thesauri, qui absconditus est et non scitur, et sapientiæ sine discretione absconsæ.

²²⁸ + **21.1 Fili, peccasti,** etc. RAB. Consilium dat, cum peccamus: Non est enim qui faciat bonum, et non peccet Eccle. 7., ne iterum peccemus; sed de præteritis pœnitentiam agamus, deprecantes ut nobis dimittantur.

²²⁹ + **21.2 Colubri.** ID. Diaboli qui semper colit umbras peccati, et regnat in filiis tenebrarum. ²³⁰ + **21.3 Dentes leonis,** etc. Adversarius noster diabolus, tanquam leo rugiens, circuit quærens quem devoret I Petr. 5..

²³¹ + **21.5 Objurgatio et injuriæ,** etc. ID. Concordia minimæ res crescunt, etc., usque ad quia veritatem fidei et unitatem pacis abominatur.

²³² + **21.6 Deprecatio pauperis,** etc. Quia judicabit Deus impios, qui affligunt sanctos.

²³³ + **21.7 Correptionem.** Id est, judicium sui peccati, quia mentem suam induravit, ne obediret veritati.

²³⁴ + **21.8 Notus a longe.** Manifestatur præsumptio hæretica in lingua temeraria, quæ loquitur adversus Deum iniquitatem.

²³⁵ + **21.9 Qui ædificat domum,** etc. Hæreticum significat, qui Scripturæ testimonia a pravo sensu aliena, ad confirmationem sui erroris congregat. Sed vindicta ultionis justæ dissolvetur duritia nefandæ actionis; vel tropologice: Avarum raptorem, qui ex alienis rebus auget divitias, et vacuum omnibus bonis in die judicii pro iniquitate sua punietur.

²³⁶ + **21.11 Via peccantium.** Ideo velox malorum interitus, quia via, id est vita illorum plena est doloribus: et duris peccatorum operibus.

²³⁷ + **21.14 Non erudietur,** etc. RAB. His sententiis confundit, etc., usque ad et ipse immiscuit se infinitis quæstionibus.

²³⁸ + **21.18 Displicet illi,** etc. Unde: Filii hujus sæculi prudentiores filiis lucis in generatione sua sunt Luc. 16..

Os prudentis quæritur in ecclesia, et verba illius cogitabunt in cordibus suis.
²¹ Tamquam domus exterminata, sic fatuo sapientia: et scientia insensati inenarrabilia verba. ²² Compedes in pedibus, stulto doctrina: et quasi vincula manuum super manum dextram. ²³⁹ ²³ Fatuus in risu exaltat vocem suam: vir autem sapiens vix tacite ridebit. ²⁴⁰ ²⁴ Ornamentum aureum prudenti doctrina, et quasi brachiale in brachio dextro. ²⁵ Pes fatui facilis in domum proximi: et homo peritus confundetur a persona potentis. ²⁴¹ ²⁶ Stultus a fenestra respiciet in domum: vir autem eruditus foris stabit. ²⁴² ²⁷ Stultitia hominis auscultare per ostium: et prudens gravabitur contumelia. ²⁸ Labia imprudentium stulta narrabunt; verba autem prudentium statera ponderabuntur. ²⁹ In ore fatuorum cor illorum, et in corde sapientium os illorum. ³⁰ Dum maledicit impius diabolium, maledicit ipse animam suam. ²⁴³ ³¹ Susurro coinquinabit animam suam, et in omnibus odietur, et qui cum eo manserit odiosus erit: tacitus et sensatus honorabitur.]

22[In lapide luteo lapidatus est piger: et omnes loquentur super aspersionem illius. ²⁴⁴ ² De stercore boum lapidatus est piger: et omnis qui tetigerit eum excutiet manus.] ³ [Confusio patris est de filio indisciplinato: filia autem in deminoratione fiet. ⁴ Filia prudens hæreditas viro suo: nam quæ confundit, in contumeliam fit genitoris. ⁵ Patrem et virum confundit audax, et ab impiis non minorabitur: ab utrisque autem inhonorabitur. ⁶ Musica in luctu importuna narratio: flagella et doctrina in omni tempore sapientia.] ²⁴⁵ ⁷ [Qui docet fatuum, quasi qui conglutinat testam. ²⁴⁶ ⁸ Qui narrat verbum non audienti, quasi qui excitat dormientem de gravi somno. ⁹ Cum dormiente loquitur qui enarrat stulto sapientiam: et in fine narrationis dicit: Quis est hic? ¹⁰ Supra mortuum plora, defecit enim lux ejus: et supra fatuum plora, defecit enim sensus. ²⁴⁷ ¹¹ Modicum plora super mortuum, quoniam requievit: ¹² nequissimi enim nequissima vita super mortem fatui. ¹³ Luctus mortui septem dies: fatui

²³⁹ + **21.22 Compedes in pedibus**, etc. ID. Quia gressibus eorum, quibus incedunt, ruina iniquitatis contradicit, actiones eorum damnando reprehendit.

²⁴⁰ + **21.23 Fatuus in risu**, etc. Cœtus hæreticorum plausibili operatione per rhetoricam artem docendo quærit auditorum favorem. Sancti vero doctores jucunditatem locutione sic intermiscerent prædicationi, ut non recedant a tramite veritatis.

²⁴¹ + **21.25 Pes fatui**, etc. Quia hæretici auctorum suorum sectam in domicilio scriptorum suorum latitantem student imitari.

²⁴² + **21.26 Stultus a fenestra**. ID. Notat hæreticorum calliditatem, et catholicorum simplicitatem.

²⁴³ + **21.30 Dum maledicit**. Non quia maledictum dicit diabolium, sed quia quem maledictum novit, non cessat imitari. Dum enim mavult diabolium imitari, quam Christum, jure damnatur.

²⁴⁴ + **22.1 In lapide**, etc. RAB. Quando peccatorum duris Scripturarum sententiis fœditas, etc., usque ad a prædicatoribus impropèratur.

²⁴⁵ + **22.6 Musica**. Eos notat, qui in Ecclesia plausum populi et favorem quærunt, nec magis compunctionem lacrymarum excitant.

²⁴⁶ + **22.7 Qui docet fatuum**. Testa multo labore confecta fragilitatem suam non evadit. Fatuus quoque quamvis sollicitè erudiatur, vix ad perfectionem perducitur.

²⁴⁷ + **22.10 Supra mortuum**. ID. Altera est mors corporis, etc., usque ad mors enim corporis, finis laboris mundani

autem et impii omnes dies vitæ illorum. ¹⁴ Cum stulto ne multum loquaris, et cum insensato ne abieris. ²⁴⁸ ¹⁵ Serva te ab illo, ut non molestiam habeas, et non coinquinaberis peccato illius. ¹⁶ Deflecte ab illo, et invenies requiem, et non acediaberis in stultitia illius. ¹⁷ Super plumbum quid gravabitur? et quod illi aliud nomen quam fatuus? ²⁴⁹ ¹⁸ Arenam, et salem, et massam ferri facilius est ferre quam hominem imprudentem, et fatuum, et impium.] ¹⁹ [Loramentum ligneum colligatum in fundamento ædificii non dissolvitur, sic et cor confirmatum in cogitatione consilii. ²⁵⁰ ²⁰ Cogitatus sensati in omni tempore metu non depravabitur. ²¹ Sicut pali in excelsis, et cæmenta sine impensa posita, contra faciem venti non permanebunt: ²⁵¹ ²² sic et cor timidum in cogitatione stulti contra impetum timoris non resistet. ²³ Sicut cor trepidum in cogitatione fatui omni tempore non metuet, sic et qui in præceptis Dei permanet semper.] ²⁵² ²⁴ [Pungens oculum deducit lacrimas, et qui pungit cor profert sensum. ²⁵ Mittens lapidem in volatilia, dejiciet illa: sic et qui conviciatur amico, dissolvit amicitiam. ²⁵³ ²⁶ Ad amicum etsi produxeris gladium, non desperes: est enim regressus. Ad amicum ²⁵⁴ ²⁷ si aperueris os triste, non timeas: est enim concordatio: excepto convitio, et improprio, et superbia, et mysterii revelatione, et plaga dolosa: in his omnibus effugiet amicus. ²⁵⁵ ²⁸ Fidem posside cum amico in paupertate illius, ut et in bonis illius læteris. ²⁹ In tempore tribulationis illius permane illi fidelis, ut et in hæreditate illius cohæres sis. ²⁵⁶ ³⁰ Ante ignem camini vapor et fumes ignis inaltatur: sic et ante sanguinem maledicta, et contumeliæ, et minæ. ²⁵⁷ ³¹ Amicum salutare non confundar, a facie

²⁴⁸ + **22.14 Cum stulto.** ID. Docet cum stultis sermonem non esse protrahendum, etc., usque ad: Qui enim dixerit ei ave, communicat ejus operibus malignis II Joan. 1..

²⁴⁹ + **22.17 Super plumbum.** Hinc Salomon ait: Grave est saxum et onerosa arena, sed ira stulti utroque gravior Prov. 27.. Pejus peccat hæreticus quam catholicus, in multitudine multorum malorum; vel philosophus qui humana nititur sapientia; vel gentilis, qui non pervenit ad fidem, et ignoranter peccat: unde, Servus enim qui scit voluntatem domini sui, et non facit: vapulabit multis Luc. 12.. Qui autem nescit, paucis.

²⁵⁰ + **22.19 Loramentum.** Ligna justos signant, qui fructum dant in tempore, quorum folia non decidunt: et omnia quæ faciunt prosperantur; fundamentum autem ædificii, apostolos vel prophetas, quorum prædicatio Ecclesiam sustinet. Loramentum ergo ligneum colligatum fundamento ædificii non dissolvitur: quia fides passionis Christi in cordibus hominum adjuncta doctrinæ apostolorum, indissolubile facit Ecclesiæ ædificium.

²⁵¹ + **22.21 Sicut paleæ,** etc. Unde: Qui audit verba mea, et non facit ea, similis est viro stulto, qui ædificat domum suam super arenam.

²⁵² + **22.23 Sicut cor.** RAB. Sicut limpidus paries, etc., usque ad sic cor fatui spernit scelerum recordationem nec poenas timet æternas.

²⁵³ + **22.25 Mittens lapidem.** Ostendit quid amicum bonum conservet, vel potius alienet. Mittens lapidem. Sicut lapidis ictu volatus avium dejicitur, ita convicii verbo vis amicitiae dissolvitur.

²⁵⁴ + **22.26 Non desperes.** De amicitia ejus, quia agnita correctionis utilitate regreditur ad jus pristinae amicitiae.

²⁵⁵ + **22.27 Effugiet amicus.** Non rediturus, nec post reconciliationem; unde: Amico reconciliatione credas in æternum.

²⁵⁶ + **22.29 In tempore tribulationis.** In adversitate magis probatur amicus. Multi enim amici mensæ, et non permanent in die necessitatis.

²⁵⁷ + **22.30 Ante ignem,** etc. Sicut fumes præcedit ignis incendium, sic dura verba homicidium; unde, Sermo durus suscitatur rixas Prov. 15.. Et alibi: Qui irascitur fratri suo, reus erit iudicio Matth.

illius non me abscondam: et si mala mihi evenerint per illum, sustinebo. ²⁵⁸
³² Omnis qui audiet cavebit se ab eo.] ²⁵⁹ ³³ [Quis dabit ori meo
 custodiam, et super labia mea signaculum certum, ut non cadam ab ipsi, et
 lingua mea perdat me?]

23[Domine, pater et dominator vitæ meæ, ne derelinquas me in consilio
 eorum, nec sinas me cadere in illis. ²⁶⁰ ² Quis superponet in cogitatu meo
 flagella, et in corde meo doctrinam sapientiæ, ut ignorantibus eorum non
 parcant mihi, et non appareant delicta eorum, ²⁶¹ ³ et ne adincrescant
 ignorantia meæ, et multiplicentur delicta mea, et peccata mea abundant, et
 incidam in conspectu adversariorum meorum, et gaudeat super me inimicus
 meus? ⁴ Domine, pater et Deus vitæ meæ, ne derelinquas me in cogitatu
 illorum. ⁵ Extollentiam oculorum meorum ne dederis mihi, et omne
 desiderium averte a me. ⁶ Aufer a me ventris concupiscentias, et concubitus
 concupiscentiæ ne apprehendant me, et animæ irreverenti et infrunitæ ne
 tradas me.] ⁷ [Doctrinam oris audite, filii: et qui custodierit illam non periet
 labiis, nec scandalizabitur in operibus nequissimis. ⁸ In vanitate sua
 apprehenditur peccator: et superbus et maledicus scandalizabitur in illis. ²⁶²
⁹ Jurationi non assuescat os tuum: multi enim casus in illa. ²⁶³ ¹⁰
 Nominatio vero Dei non sit assidua in ore tuo, et nominibus sanctorum non
 admiscearis, quoniam non erit immunis ab eis. ¹¹ Sicut enim servus
 interrogatus assidue a livore non minuitur, sic omnis jurans et nominans in
 toto a peccato non purgabitur. ¹² Vir multum jurans implebitur iniquitate, et
 non discedet a domo illius plaga. ¹³ Et si frustraverit, delictum illius super
 ipsum erit: et si dissimulaverit, delinquit dupliciter: ²⁶⁴ ¹⁴ et si in vacuum
 juraverit, non justificabitur: replebitur enim retributione domus illius. ¹⁵ Est
 et alia loquela contraria morti: non inveniatur in hæreditate Jacob. ²⁶⁵ ¹⁶
 Etenim a misericordibus omnia hæc auferentur, et in delictis non
 volutabuntur. ¹⁷ Indisciplinatæ loquelæ non assuescat os tuum: est enim in
 illa verbum peccati. ²⁶⁶ ¹⁸ Memento patris et matris tuæ: in medio enim

5..

²⁵⁸ + **22.31 Amicum salutare.** Multa bona sunt in amicitia vera: congaudet enim verus
 amicus in bonis tuis, et contristatur in malis.

²⁵⁹ + **22.32 Omnis qui audiet.** Id est, qui cognoscit quanta bona sint in amicitia vera, cavebit
 ne injuria, vel convicio amicum lædat.

²⁶⁰ + **23.1 Domine pater.** RAB. Quasi: Tuo munere defendar a voragine vitiorum.

²⁶¹ + **23.2 Quis superponet.** Desiderat in cogitatu suo flagella disciplinæ, et in corde doc-
 trinam sapientiæ: ne forte per ignorantiam non agnoscat delictorum pericula, et multiplicentur ei
 crimina, pro quibus cadat in manus adversariorum.

²⁶² + **23.8 In vanitate.** ID. Quia illam præponit amoris Dei et desiderio æternæ beatitudinis.

²⁶³ + **23.9 Jurationi,** etc. Vetat juramentum, ne fiat perjurium; unde: Nolite jurare, neque per
 cælum neque per terram Jacob. 5..

²⁶⁴ + **23.13 Dupliciter.** ID. Quia per simulationem celat veritatem, et alios per falsitatem
 mittit in errorem.

²⁶⁵ + **23.15 Est alia loquela.** Blasphemia, quæ supradictis pejor est: unde oportet ut non
 inveniatur in hæreditate Jacob, id est, populo Ecclesiæ, qui supplantat vitia, et in virtutibus servit
 Deo.

²⁶⁶ + **23.17 Indisciplinatæ.** Quasi: Disciplinam ne deseras, et indiscipulato ore sermones

magnatorum consistis: ¹⁹ ne forte obliviscatur te Deus in conspectu illorum, et assiduitate tua infatuatus, improprium patiaris, et maluisses non nasci, et diem nativitatis tuæ maledicas. ²⁰ Homo assuetus in verbis improprii in omnibus diebus suis non erudietur.] ²¹ [Duo genera abundant in peccatis, et tertium adducit iram et perditionem. ²² Anima calida quasi ignis ardens, non extinguetur donec aliquid glutiat: ²⁶⁷ ²³ et homo nequam in ore carnis suæ non desinet donec incendat ignem. ²⁴ Homini fornicario omnis panis dulcis: non fatigabitur transgrediens usque ad finem. ²⁵ Omnis homo qui transgreditur lectum suum, contemnens in animam suam, et dicens: Quis me videt? ²⁶ Tenebræ circumdant me, et parietes cooperiunt me, et nemo circumspicit me: quem vereor? delictorum meorum non memorabitur Altissimus. ²⁶⁸ ²⁷ Et non intelligit quoniam omnia videt oculus illius, quoniam expellit a se timorem Dei hujusmodi hominis timor, et oculi hominum timentes illum: ²⁸ et non cognovit quoniam oculi Domini multo plus lucidiores sunt super solem, circumspicientes omnes vias hominum, et profundum abyssi, et hominum corda, intuentes in absconditas partes. ²⁶⁹ ²⁹ Domino enim Deo antequam crearentur omnia sunt agnita: sic et post perfectum respicit omnia. ³⁰ Hic in plateis civitatis vindicabitur, et quasi pullus equinus fugabitur, et ubi non speravit apprehendetur. ²⁷⁰ ³¹ Et erit dedecus omnibus, eo quod non intellexerit timorem Domini. ³² Sic et mulier omnis relinquens virum suum, et statuens hæreditatem ex alieno matrimonio: ²⁷¹ ³³ primo enim in lege Altissimi incredibilis fuit: secundo in virum suum deliquit: tertio in adulterio fornicata est, et ex alio viro filios statuit sibi. ³⁴ Hæc in ecclesiam adducetur, et in filios ejus respicietur: ²⁷² ³⁵ non tradent filii ejus radices, et rami ejus non dabunt fructum: ²⁷³ ³⁶ derelinquet in maledictum memoriam ejus, et dedecus illius non delebitur. ³⁷ Et agnoscent qui derelicti sunt, quoniam nihil melius est quam timor Dei, et nihil dulcius quam respicere in mandatis Domini. ³⁸ Gloria magna est sequi Dominum: longitudo enim dierum assumetur ab eo.] ²⁷⁴

tuos ne proferas.

²⁶⁷ + **23.22 Anima callida.** ID. Hæretici et schismatici ardentem animam habent, etc., usque ad sed virum priorem relinquentes, cum idolis fornicati sunt.

²⁶⁸ + **23.26 Tenebræ circumdant.** ID. Qui castitatis virtutem perdit, etc., usque ad cum vultus Domini sit super facientes mala.

²⁶⁹ + **23.28 Oculi Domini.** Quia illi nihil præteritum, et nihil futurum est: omnia præsentia sunt.

²⁷⁰ + **23.30 Hic in plateis.** Adulter libidinosus, de quo superius dictum est, qui quasi equus et mulus lasciviendo discurrit per latam et spatiosam viam, quæ ducit ad mortem.

²⁷¹ + **23.32 Sic et mulier.** Æqualiter et in viro et in femina damnatur adulterium, et germen hujus copulæ abominabile est Deo. Mystice autem hæreticorum Synagoga, vel anima hæretica pravitate decepta, abominabilis est Deo, quia relinquit virum priorem, qui sibi eam in baptisate copulavit, et ornamento virtutum decoravit.

²⁷² + **23.34 Hæc in Ecclesia.** Quia ejus perversitas in conventu fidelium, per solertiam doctorum declaratur.

²⁷³ + **23.35 Et rami.** Quia secta illius fundamentum veritatis non habet, fructum bonorum operum gignere non potest.

²⁷⁴ + **23.38 Longitudo,** etc. Quia in æterna beatitudine in æternum permanebunt qui sequuntur Deum.

24[Sapientia laudabit animam suam, et in Deo honorabitur, et in medio populi sui gloriabitur, ² et in ecclesiis Altissimi aperiet os suum, et in conspectu virtutis illius gloriabitur, ²⁷⁵ ³ et in medio populi sui exaltabitur, et in plenitudine sancta admirabitur, ⁴ et in multitudine electorum habebit laudem, et inter benedictos benedicetur, dicens: ⁵ Ego ex ore Altissimi prodivi, primogenita ante omnem creaturam. ²⁷⁶ ⁶ Ego feci in cælis ut oriretur lumen indeficiens, et sicut nebula texi omnem terram. ²⁷⁷ ⁷ Ego in altissimis habitavi, et thronus meus in columna nubis. ²⁷⁸ ⁸ Gyrum cæli circuii sola, et profundum abyssi penetravi: in fluctibus maris ambulavi. ⁹ Et in omni terra steti: et in omni populo, ¹⁰ et in omni gente primatum habui: ¹¹ et omnium excellentium et humilium corda virtute calcavi. Et in his omnibus requiem quæsi, et in hæreditate Domini morabor. ¹² Tunc præcepit, et dixit mihi Creator omnium: et qui creavit me, requievit in tabernaculo meo. ²⁷⁹ ¹³ Et dixit mihi: In Jacob inhabita, et in Israël hæreditare, et in electis meis mitte radices.] ²⁸⁰ ¹⁴ [Ab initio et ante sæcula creata sum, et usque ad futurum sæculum non desinam: et in habitatione sancta coram ipso ministravi. ²⁸¹ ¹⁵ Et sic in Sion firmata sum, et in civitate sanctificata similiter requievi, et in Jerusalem potestas mea. ²⁸² ¹⁶ Et radicavi in populo honorificato, et in parte Dei mei hæreditas illius, et in plenitudine sanctorum detentio mea.] ¹⁷ [Quasi cedrus exaltata sum in Libano, et quasi cypressus in monte Sion: ²⁸³ ¹⁸ quasi palma exaltata sum in Cades, et quasi plantatio rosæ in Jericho: ²⁸⁴ ¹⁹ quasi oliva speciosa in campis, et quasi platanus exaltata sum juxta aquam in plateis. ²⁸⁵ ²⁰ Sicut

²⁷⁵ + **24.2 Et in medio populi,** etc. RAB. Quia in ostensione miraculorum ad laudem Dei provocabat populum. Virtutis illius, etc. Angelorum, religiosorum.

²⁷⁶ + **24.5 Ego ex ore.** Quia Verbum consubstantiale, coæternum. Quia non sum creatura. Dicitur tamen primogenitus omnis creaturæ, non tempore, scilicet, sed honore Exod. 4..

²⁷⁷ + **24.6 Ego feci in cælis.** RAB. In cælis oritur lumen, nebula tegitur caro, quia sicut claritate sua præcellit obscuritatem nebulae, sic spiritualis creatura corporalem præcellit dignitatem.

²⁷⁸ + **24.7 Thronus meus.** ID. Humanum corpus nullo pondere peccati prægravatum, sed Dei virtute sublimatum, in quo potentia divinitatis judicia sua exercuit.

²⁷⁹ + **24.12 Creavit me,** etc. Secundum humanitatem singulari puritate de Spiritu sancto conceptam, de Virgine editam.

²⁸⁰ + **24.13 In Jacob.** Incarnatione Salvatoris specialiter Judæis uti concessum est, et specialiter ad Judæos venit. Unde per Jacob figurantur Judæi; per Israël vero, Gentiles.

²⁸¹ + **24.14 Ab initio.** Sacramentum incarnationis ante sæcula præscitum et prædestinatum, permanet in sæculum sæculi. Et inhabitationes Ecclesiæ, id est ritum veræ religionis disposuit.

²⁸² + **24.15 Et sic in Sion.** RAB. Sion Ecclesia, quæ et Jerusalem, quæ a primo justo usque ad novissimum ædificatur, et in qua sapientia quotidie fructificat.

²⁸³ + **24.17 In Libano.** RAB. Libanus mons est Phœnicis, etc., usque ad constantiam et actionem eorum exprimens, qui altioribus Ecclesiam ornant virtutibus.

²⁸⁴ + **24.18 Quasi palma.** Arbor diuturnus foliis, et suavibus pomis; palma dicta quia victricis manus est ornatus: vel quia in modum humanæ palmæ ramus expandit, hanc Græci dicunt, quia Phœnix avis multo tempore vivit. Huic comparatur Ecclesia, quæ incurvari ad terrena despiciens, ad, cœlestia se sustollit: ut finito agone cœlestem palmam suscipiat, et quasi folia diuturna, verba rectæ confessionis perpetuo conservat.

²⁸⁵ + **24.19 Quasi oliva.** Græce, fructus scilicet: enim arbor dicitur, succus oleum. Est autem arbor pacis insignis: per hanc Ecclesia signatur, quæ campos totius mundi decore illustrat, et speciali gratia per unctionem chrismatis sanctificat. Quasi platanus. Platanus ab altitudine dicta, vel quia patula et ampla. Nam Græci amplum vocant. Nomen ergo, et formam arboris expressit

cinnamomum et balsamum aromatizans odorem dedi; quasi myrrha electa dedi suavitatem odoris: ²⁸⁶ ²¹ et quasi storax, et galbanus, et ungula, et gutta, et quasi Libanus non incisus vaporavi habitationem meam, et quasi balsamum non mistum odor meus. ²⁸⁷ ²² Ego quasi terebinthus extendi ramos meos, et rami mei honoris et gratiæ. ²⁸⁸ ²³ Ego quasi vitis fructificavi suavitatem odoris: et flores mei fructus honoris et honestatis. ²⁴ Ego mater pulchræ dilectionis, et timoris, et agnitionis, et sanctæ spei. ²⁵ In me gratia omnis viæ et veritatis: in me omnis spes vitæ et virtutis. ²⁶ Transite ad me, omnes qui concupiscitis me, et a generationibus meis implemini: ²⁷ spiritus enim meus super mel dulcis, et hæreditas mea super mel et favum. ²⁸ Memoria mea in generatione sæculorum. ²⁹ Qui edunt me, adhuc esurient, et qui bibunt me, adhuc sitient. ²⁸⁹ ³⁰ Qui audit me non confundetur, et qui operantur in me non peccabunt: ³¹ qui elucidant me, vitam æternam habebunt.] ³² [Hæc omnia liber vitæ, et testamentum Altissimi, et agnitio veritatis. ³³ Legem mandavit Moyses in præceptis justitiarum, et hæreditatem domui Jacob, et Israël promissiones. ³⁴ Posuit David, puero suo, excitare regem ex ipso fortissimum, et in throno honoris sedentem in sempiternum. ²⁹⁰ ³⁵ Qui implet quasi Phison sapientiam, et sicut Tigris in diebus novorum: ²⁹¹ ³⁶ qui adimplet quasi Euphrates

dicens: Quasi platanus dilatata sum in plateis. Est autem tenerrima, et mollis foliis, et vitibus similis, et Christum significat, qui per membra sua in orbe dilatatur mitis et mansuetus.

²⁸⁶ + **24.20 Sicut cinnamomum.** Cinnamomum et balsamum aromaticæ arbores sunt. Cinnamomum dictum, quia cortex ejus in modum cannæ rotundus et gracilis. Gignitur in India et Ethiopia, frutice brevi duorum tantum cubitorum, colore subnigro vel cinereo, tenuissimarum virgarum. Nam quod crassum est despicitur; gracilius vero charius: quod cum frangitur, visibile spiramentum emittit in modum nebulæ vel pulveris.

²⁸⁷ + **24.21 Balsamum.** RAB. Aspaltum dicit Plinius, in eodem curriculo coeli nascitur, etc., usque ad memores Dominicæ passionis pro Domino parati sunt pati. Quasi myrrha. Myrrha est in Arabia arbor quinque cubitis alta, spinæ similis, quam vocant Græci, cujus gutta viridis et amara, unde et nomen accepit: quæ omnia conveniunt mortificationi carnis, quæ amara ad tempus sentitur, sed in spe semper virentis patriæ libenter suscipitur. Spinæ autem comparatur, quia ut mentem salvet corpus affligit. Gutta sponte manans pretiosior est; elicita corticis vulnere vilior, quia majoris est virtutis corpus sanum cui aridet copia rerum mortificare, quam ægrotum, vel paupertate afflictum. Quasi storax. ID. Storax, galbanus, etc., usque ad storax dicta, quia est gutta arboris profluens et congelata, nam Græci guttam dicunt. Et galbanus. Galbanum ID. etc., usque ad ad similitudinem ammoniaci minimeque lignosum. Ungula. Ungula est quæ in Exodo onycha dicitur. Græce enim, Latine ungula, quia humano ungui assimilatur. Gutta. ID. Gutta quæ et ammoniaca dicitur, etc., usque ad quanto virtus virtuti jungitur, tanto incensum sincerius exhibetur. Libanus. Libanus, ut aiunt, arbor est ID. etc., usque ad incisis arboribus lacryma fluit, quia puncta humilium corda puram Deo orationem emittunt. Libanus in Hebræo candorem significat: in Græco, unde in Canticis, ubi legimus ad collem thuris Cant. 4., quidam codices habent ad collem libani. Balsamum non mistum. ID. Balsami arbor in Judæa, etc., usque ad et salutis sacramenta profudit. Unde, Et quasi balsamum non mistum odor meus.

²⁸⁸ + **24.22 Terebinthus,** etc. ID. Arbor est, etc., usque ad et sine macula sunt ante thronum Dei.

²⁸⁹ + **24.29 Qui edunt me,** etc. ID. Edimus sapientiam, etc., usque ad: Gustate et videte, quoniam suavis est Dominus Psal. 33., etc.

²⁹⁰ + **24.34 Posuit David.** ID. Quatuor paradisi flumina, etc., usque ad qui mittit disciplinam sicut lucem, quia præcepta ejus vitam æternam tribuunt, unde: Docete omnes gentes, baptizantes eos in nomine Patris, et Filii, et Spiritus sancti; docentes servare omnia quæcunque mandavi vobis Matth. 27..

²⁹¹ + **24.35 Quasi Phison.** ID. Phison, qui et Ganges, etc., usque ad et fertur sicut Nilus super

sensum, qui multiplicat quasi Jordanis in tempore messis: ²⁹² ³⁷ qui mittit disciplinam sicut lucem, et assistens quasi Gehon in die vindemiæ. ²⁹³ ³⁸ Qui perficit primus scire ipsam, et infirmior non investigabit eam. ²⁹⁴ ³⁹ A mari enim abundavit cogitatio ejus, et consilium illius ab abyssu magna. ²⁹⁵ ⁴⁰ Ego sapientiam effudi flumina: ⁴¹ ego quasi trames aquæ immensæ de fluvio: ego quasi fluvii dioryx, et sicut aquæductus exivi de paradiso. ²⁹⁶ ⁴² Dixi: Rigabo hortum meum plantationum, et inebriabo prati mei fructum. ⁴³ Et ecce factus est mihi trames abundans, et fluvius meus appropinquavit ad mare: ⁴⁴ quoniam doctrinam quasi antelucanum illumino omnibus, et enarrabo illam usque ad longinquum. ⁴⁵ Penetrabo omnes inferiores partes terræ, et inspiciam omnes dormientes, et illuminabo omnes sperantes in Domino. ⁴⁶ Adhuc doctrinam quasi prophetiam effundam, et relinquam illam quærentibus sapientiam, et non desinam in progenies illorum usque in ævum sanctum. ²⁹⁷ ⁴⁷ Videte quoniam non soli mihi laboravi, sed omnibus exquirentibus veritatem.] ²⁹⁸

25[In tribus placitum est spiritui meo, quæ sunt probata coram Deo et hominibus: ² concordia fratrum, et amor proximorum, et vir et mulier bene sibi consentientes. ²⁹⁹ ³ Tres species odivit anima mea, et aggravor valde animæ illorum: ³⁰⁰ ⁴ pauperem superbum, divitem mendacem, senem

Orientis terras exundare. Sicut Tigris, etc. ID. Tigris fluvius Mesopotamiæ, etc., usque ad quia sicut Tigris bestia velociter fertur.

²⁹² + **24.36 Quasi Euphrates.** ID. Euphrates fluvius Mesopotamiæ, etc., usque ad terraque quæ ab ipsis ambitur, Mesopotamia dicitur. Quasi Jordanis. Jordanis fluvius Judææ, a duobus fontibus nominatur: Jor, scilicet et Dan, quibus fœderatis colligitur. Oritur sub Libano monte, et dividit Judæam et Arabiam, et juxta Jericho influit mari Mortuo.

²⁹³ + **24.37 Quasi Geon.** Geon hic Æthiopiæ cingit, sic vocatus quia irrigat terram Ægypti. Ge enim Græce terram significat: qui apud Ægyptios Nilus vocatur propter limum quem trahit, qui fecunditatem efficit, unde et Nilus dictus est.

²⁹⁴ + **24.38 Non investigabit.** RAB. Christus auctor est sapientiæ, etc., usque ad: Nemo novit Filium nisi Pater, nec Patrem quis novit, nisi Filius Matth. 11., etc.

²⁹⁵ + **24.39 A mari enim.** Mare significat profunditatem sapientiæ inæstimabilem, et incomprehensibilem esse: quoniam nemo penetrare potest nisi unus et solus Deus Pater et Filius et Spiritus sanctus, qui seipsum vere novit, et consilium suum, et dat tantum nosse creaturæ suæ, quantum expedit.

²⁹⁶ + **24.41 Quasi trames.** ID. Quia Deus de Deo, lumen de lumine. Tropice dicitur Pater origo Divinitatis: quia de Patre gignitur Filius et procedit Spiritus sanctus, qui per aquam significatur: unde, Flumina de ventre ejus fluent aquæ vivæ Job. 7.. Aqua sapientiæ salutaris potavit illum Eccli. 15.. Ego quasi fluvius Dorix. Sapientia comparatur fluvio rapidissimo, etc., usque ad unde tertia lingua Græcorum Dorica dicitur.

²⁹⁷ + **24.46 Adhuc doctrinam.** RAB. Significat hujus operis scriptor librum esse mysticum, et utilem ad legendum. Historice enim moralitatem docet, et allegorice fidei sacramentum.

²⁹⁸ + **24.47 Videte,** etc. Ecclesiasticus doctor non solum sibi, sed et aliis scribendo et docendo proficit: unde, Qui docti fuerint, fulgebunt sicut splendor firmamenti, et qui ad justitiam erudiumultos, quasi stellæ in perpetuas æternitates Dan. 12..

²⁹⁹ + **25.2 Vir et mulier.** RAB. Unde Paulus, Viri, diligite uxores vestras, sicut et Christus Ecclesiam Eph. 5.. Possumus in viro spiritum, in muliere animam accipere, qui si in timore et dilectione Dei consenserint, quidquid petierint fiet eis, unde: Si duo consenserint ex vobis, fiet illis Matth. 18..

³⁰⁰ + **25.3 Tres species.** ID. Possunt hæc ad diabolum transferri, etc., usque ad quia Conditori suo subjici noluit.

fatuum et insensatum.] ⁵ [Quæ in juventute tua non congregasti, quomodo in senectute tua invenies? ³⁰¹ ⁶ Quam speciosum canitie iudicium, et presbyteris cognoscere consilium ! ³⁰² ⁷ Quam speciosa veteranis sapientia, et gloriosus intellectus et consilium ! ⁸ Corona senum multa peritia, et gloria illorum timor Dei.] ⁹ [Novem insuspabilia cordis magnificavi: et decimum dicam in lingua hominibus: ³⁰³ ¹⁰ homo qui jucundatur in filiis, vivens et videns subversionem inimicorum suorum. ¹¹ Beatus qui habitat cum muliere sensata, et qui lingua sua non est lapsus, et qui non servivit indignis se. ¹² Beatus qui invenit amicum verum, et qui enarrat justitiam auri audienti. ¹³ Quam magnus qui invenit sapientiam et scientiam ! sed non est super timentem Dominum. ³⁰⁴ ¹⁴ Timor Dei super omnia se superposuit. ¹⁵ Beatus homo cui donatum est habere timorem Dei: qui tenet illum, cui assimilabitur? ¹⁶ Timor Dei initium dilectionis ejus: fidei autem initium agglutinandum est ei.] ³⁰⁵ ¹⁷ [Omnis plaga tristitia cordis est, et omnis malitia nequitia mulieris. ³⁰⁶ ¹⁸ Et omnem plagam, et non plagam videbit cordis: ³⁰⁷ ¹⁹ et omnem nequitiam, et non nequitiam mulieris: ²⁰ et omnem obductum, et non obductum odientium: ²¹ et omnem vindictam, et non vindictam inimicorum. ²² Non est caput nequius super caput colubri, ³⁰⁸ ²³ et non est ira super iram mulieris. Commorari leoni et draconi placebit, quam habitare cum muliere nequam. ²⁴ Nequitia mulieris immutat faciem ejus: et obcæcat vultum suum tamquam ursus, et quasi saccum ostendit. In medio proximorum ejus ²⁵ ingemuit vir ejus, et audiens suspiravit modicum. ²⁶ Brevis omnis malitia super malitiam mulieris: sors peccatorum cadat super illam. ³⁰⁹ ²⁷ Sicut ascensus arenosus in pedibus veterani, sic mulier linguata homini quieto. ²⁸ Ne respicias in mulieris speciem, et non conpiscas mulierem in specie. ²⁹ Mulieris ira, et irreverentia, et confusio magna. ³⁰ Mulier si primatum habeat, contraria est viro suo. ³¹⁰ ³¹ Cor

³⁰¹ + **25.5 Quæ in juventute.** Qui in juventute non discit sapientiam, in senectute fructum ejus non habet. Unde, Egrestatem operata est manus remissa, manus autem fortium divitias parat Prov. 10.. Qui autem meditatur in lege Domini, dabit fructum in tempore suo Psal. 1..

³⁰² + **25.6 Quam speciosum.** ID. Canum caput decet, etc., usque ad non licet eis ignorare legis scientiam et sapientiam.

³⁰³ + **25.9 Novem insuspabilia,** etc. Corde creditur ad justitiam, ore autem confessio fit ad salutem Rom. 10.. Novem ergo sunt insuspabilia, id est ab omni suspitione falsitatis aliena, quæ parit homini fides recta.

³⁰⁴ + **25.13 Sapientiam.** Quæ est malum cavere. Unde, Et ecce timor Domini ipse est sapientia, et recedere a malo intelligentiam Job. 28.. Hinc est quod unum speciebus virtutum superadditur.

³⁰⁵ + **25.16 Timor Dei.** RAB. Quia sicut novenarius imperfectus est, etc., usque ad sed ne te deserat præsentia Dei, quam amplecteris, et in æternum frui desideras.

³⁰⁶ + **25.17 Omnis plaga.** Non est major gratia quam vera lætitia mentis, nec major plaga quam tristitia fraudulentis cordis in idololatria vel in hæresi, quia in ejus nequitia omnis malitia est.

³⁰⁷ + **25.18 Et omnem plagam.** Videt plagam cordis qui intelligit injuriam suæ pravitatis, sed non videt, qui per poenitentiam non corrigit.

³⁰⁸ + **25.22 Non est caput,** etc. RAB. Nequitia hæreticorum comparata, etc., usque ad ideo ejus cohabitatio omnibus noxia est.

³⁰⁹ + **25.26 Brevis omnis malitia.** Parva est omnis malitia ad comparisonem idololatriæ et pravitatis hæreticæ, quia peccant, non per fragilitatem carnis, sed per superbiam mentis.

³¹⁰ + **25.30 Mulier si primatum habeat.** Historice ostendit, quam noxius sit primatus mulieris,

humile, et facies tristis, et plaga cordis, mulier nequam. ³² Manus debiles et genua dissoluta, mulier quæ non beatificat virum suum. ³³ A muliere initium factum est peccati, et per illam omnes morimur. ³⁴ Non des aquæ tuæ exitum, nec modicum: nec mulieri nequam veniam prodeundi. ³⁵ Si non ambulaverit ad manum tuam, confundet te in conspectu inimicorum. ³⁶ A carnibus tuis abscinde illam, ne semper te abutatur.]

26[Mulieris bonæ beatus vir: numerus enim annorum illius duplex. ³¹¹ ² Mulier fortis oblectat virum suum, et annos vitæ illius in pace implebit. ³ Pars bona mulier bona, in parte timentium Deum dabitur viro pro factis bonis: ⁴ divitis autem et pauperis cor bonum, in omni tempore vultus illorum hilaris. ³¹² ⁵ A tribus timuit cor meum, et in quarto facies mea metuit: ³¹³ ⁶ delaturam civitatis, et collectionem populi: ³¹⁴ ⁷ calumniam mendacem super mortem omnia gravia: ⁸ dolor cordis et luctus, mulier zelotypa. ⁹ In muliere zelotypa flagellum linguæ, omnibus communicans. ¹⁰ Sicut boum jugum quod movetur, ita et mulier nequam: qui tenet illam quasi qui apprehendit scorpionem. ¹¹ Mulier ebriosa ira magna, et contumelia: et turpitudine illius non tegetur. ³¹⁵ ¹² Fornicatio mulieris in extollentia oculorum, et in palpebris illius agnosceretur. ³¹⁶ ¹³ In filia non avertente se, firma custodiam, ne inventa occasione utatur se. ¹⁴ Ab omni irreverentia oculorum ejus cave, et ne mireris si te neglexerit. ¹⁵ Sicut viator sitiens ad fontem os aperiet, et ab omni aqua proxima bibet, et contra omnem palum sedebit, et contra omnem sagittam aperiet pharetram donec deficiat. ¹⁶ Gratia mulieris sedulæ delectabit virum suum, et ossa illius impinguabit. ³¹⁷ ¹⁷ Disciplina illius datum Dei est. ¹⁸ Mulier sensata et tacita, non est immutatio eruditæ animæ. ³¹⁸ ¹⁹ Gratia super gratiam mulier sancta et

etc., usque ad contraria erit viro, id est doctori catholico perversa sentiendo et prava docendo.

³¹¹ + **26.1 Mulieris bonæ.** RAB. Sicut prius mulierem nequam vituperavit, etc., usque ad et in futuro gaudebit de perceptione præmiorum.

³¹² + **26.4 Divitis autem.** Dives vel pauper ad gratiam Christi devota mente perveniens, jucunditate visionis Dei perpetuo fruatur, quia non est personarum acceptor Deus.

³¹³ + **26.5 Tribus.** His similitudinibus vocat eos, qui ab unitate veræ religionis separati sunt, id est, Judæos, paganos, hæreticos, et falsos Christianos.

³¹⁴ + **26.6 Delaturam civitatis.** Insipientia stultorum. Sicut enim bruta animalia nesciunt discernere inter amicum et inimicum, et inter bonum et malum; ita insipientes ignorant distantiam catholicæ doctrinæ et hæreticæ, sed veris et falsis doctoribus obediunt æque. Contra quos dicitur alibi, Statim eam sequitur quasi bos ad victimam, et quasi agnus lascivens, et ignorat quod ad victimam pertrahatur Prov. 7.. Sed hæreticorum astutia non aperta fronte, sed dolose incautos decipit.

³¹⁵ + **26.11 Mulier ebriosa.** Habitum meretricis describit, quæ motu corporis et motu oculorum ostentat libidinem. Mystice autem hæreticum significat, qui in superbia sensus et facundia verborum fornicationem suam jactat, ut novitatum amatores facilius attrahat prurientes auribus, qui a veritate auditum avertunt et ad fabulas convertuntur.

³¹⁶ + **26.12 Fornicatio mulieris.** RAB. Per hæc tria curiositatem humanæ mentis ostendit, etc., usque ad per superbiam vitæ, cum adderet, Eritis sicut dii Gen. 3..

³¹⁷ + **26.16 Ossa illius impinguabit.** Charitate scilicet, unde: Qui servat mandata mea, ille est qui diligit me, et diligitur a Patre meo, et ego diligam eum Joan. 14..

³¹⁸ + **26.18 Mulier,** etc. Quia sapientia Dei animas electorum imbuit, et tribuit eis custodiam oris et efficaciam operis, nec eos a se declinare permittit, quia omnis qui natus est ex Deo, non

pudorata. ²⁰ Omnis autem ponderatio non est digna continentis animæ. ²¹
 Sicut sol oriens mundo in altissimis Dei, sic mulieris bonæ species in
 ornamentum domus ejus. ²² Lucerna splendens super candelabrum sanctum,
 et species faciei super ætatem stabilem. ²³ Columnæ aureæ super bases
 argenteas, et pedes firmi super plantas stabilis mulieris. ³¹⁹ ²⁴ Fundamenta
 æterna supra petram solidam, et mandata Dei in corde mulieris sanctæ.] ²⁵
 [In duobus contristatum est cor meum, et in tertio iracundia mihi advenit: ³²⁰
²⁶ vir bellator deficiens per inopiam; et vir sensatus contemptus; ²⁷ et qui
 transgreditur a justitia ad peccatum: Deus paravit eum ad rhomphæam.] ²⁸
 [Duæ species difficiles et periculosæ mihi apparuerunt: difficile exiit
 negotians a negligentia, et non justificabitur caupo a peccatis laborum.] ³²¹

²⁷[Propter inopiam multi deliquerunt: et qui quærit locupletari avertit
 oculum suum. ³²² ² Sicut in medio compaginis lapidum palus figitur, sic et
 inter medium venditionis et emptionis angustiabitur peccatum: ³ conteretur
 cum delinquente delictum. ⁴ Si non in timore Domini tenueris te instanter,
 cito subvertetur domus tua.] ⁵ [Sicut in percussura cribri remanebit pulvis,
 sic aporia hominis in cogitatu illius. ³²³ ⁶ Vasa figuli probat fornax, et
 homines justos tentatio tribulationis. ⁷ Sicut rusticatio de ligno ostendit
 fructum illius, sic verbum ex cogitatu cordis hominis. ³²⁴ ⁸ Ante sermonem
 non laudes virum: hæc enim tentatio est hominum. ³²⁵ ⁹ Si sequaris
 justitiam, apprehendes illam, et indues quasi poderem honoris: et inhabitabis
 cum ea, et proteget te in sempiternum, et in die agnitionis invenies
 firmamentum. ¹⁰ Volatilia ad sibi similia conveniunt: et veritas ad eos qui
 operantur illam revertetur. ¹¹ Leo venationi insidiatur semper: sic peccata
 operantibus iniquitates. ¹² Homo sanctus in sapientia manet sicut sol: nam
 stultus sicut luna mutatur. ¹³ In medio insensatorum conserva verbum tempori:
 in medio autem cogitantium assiduus esto. ³²⁶ ¹⁴ Narratio peccantium
 odiosa, et risus illorum in deliciis peccati. ¹⁵ Loquela multum jurans

peccat, fidem, scilicet violando, vel charitatem: Quia semen Dei, id est verbum, quo renatus est,
 in se habet.

³¹⁹ + **26.23 Columnæ aureæ.** Doctores sapientia fulgentes, super bases argenteas locantur,
 cum in sancta Scriptura prædicatione sua insigniuntur.

³²⁰ + **26.25 In duobus.** RAB. Notat sapientia, etc., usque ad vel deserto tramite veritatis
 sequitur devia erroris.

³²¹ + **26.28 Difficile exiit.** RAB. Actus pessimus, non res honesta damnatur. Ille negotiator
 abominandus, qui per immoderatam ambitionem merces suas plus perjurio onerat quam pretio.

³²² + **27.1 Propter inopiam,** etc., RAB. Sicut in medio. Hic comparatione, etc., usque ad et in
 futuro poena æterna manet.

³²³ + **27.5 Sicut in percussura cribri.** ID. Sicut cribrum, etc., usque ad: Satanæ expetivit
 vos, ut cribraret sicut triticum.

³²⁴ + **27.7 Sicut rusticatio de ligno.** ID. Unaquæque arbor, etc., usque ad cultura ergo ligni
 in fructu manifestat qualitatem ejus.

³²⁵ + **27.8 Ante sermonem.** Quia sermo indicat cogitationem. Quasi dicat: Nemo laudet
 eum, quem manifestis indiciis non cognovit laude dignum. Potest autem sermo pro bono opere
 accipi, ut neminem ante probationem bonorum operum laudemus. Unde: Non laudes ante mortem
 quemquam.

³²⁶ + **27.13 In medio.** RAB. Temperantiam et cautelam loquendi docet, etc., usque ad: Qui
 autem fecerit et docuerit, hic magnus vocabitur in regno cœlorum Matth. 5..

horripilationem capiti statuet, et irreverentia ipsius obturatio aurium. ³²⁷
¹⁶ Effusio sanguinis in rixa superbiorum, et maledictio illorum auditus gravis.
¹⁷ Qui denudat arcana amici fidem perdit, et non inveniet amicum ad
animum suum. ³²⁸ ¹⁸ Dilige proximum, et conjungere fide cum illo. ¹⁹
Quod si denudaveris absconsa illius, non persequeris post eum. ²⁰ Sicut
enim homo qui perdit amicum suum, sic et qui perdit amicitiam proximi sui.
²¹ Et sicut qui dimittit avem de manu sua, sic dereliquisti proximum tuum, et
non eum capies. ²² Non illum sequaris, quoniam longe abest: effugit enim
quasi caprea de laqueo, quoniam vulnerata est anima ejus: ³²⁹ ²³ ultra eum
non poteris colligare. Et maledicti est concordatio: ²⁴ denudare autem amici
mysteria, desperatio est animæ infelicis.] ³³⁰ ²⁵ [Annuens oculo fabricat
iniqua, et nemo eum abjiciet. ²⁶ In conspectu oculorum tuorum condulcabit
os suum, et super sermones tuos admirabitur: novissime autem pervertet os
suum, et in verbis tuis dabit scandalum. ²⁷ Multa odivi, et non coæquavi ei,
et Dominus odiet illum. ²⁸ Qui in altum mittit lapidem, super caput ejus
cadet: et plaga dolosa dolosi dividet vulnera. ²⁹ Et qui foveam fodit incidet
in eam: et qui statuit lapidem proximo offendet in eo: et qui laqueum alii
ponit, peribit in illo. ³⁰ Facienti nequissimum consilium, super ipsum
devolvetur, et non agnoscet unde adveniat illi. ³³¹ ³¹ Illusio et
improperium superbiorum, et vindicta sicut leo insidiabitur illi. ³² Laqueo
peribit qui oblectantur casu justorum, dolor autem consumet illos antequam
morianantur.] ³³ [Ira et furor utraque execrabilia sunt, et vir peccator
continens erit illorum.]

28[Qui vindicari vult, a Domino inveniet vindictam, et peccata illius
servans servabit. ² Relinque proximo tuo nocenti te, et tunc deprecanti tibi
peccata solventur. ³ Homo homini reservat iram, et a Deo quærit medelam:
⁴ in hominem similem sibi non habet misericordiam, et de peccatis suis
deprecatur. ⁵ Ipse cum caro sit reservat iram, et propitiationem petit a Deo:
quis exorabit pro delictis illius? ⁶ Memento novissimorum, et desine
inimicari: ⁷ tabitudo enim et mors imminent in mandatis ejus. ⁸ Memorare
timorem Dei, et non irascaris proximo. ³³² ⁹ Memorare testamentum

³²⁷ + **27.15 Loquela**, etc. Quia sicut actio eorum bonis contraria: et loquela ad mala dicendum
prona, ad audiendum gravis.

³²⁸ + **27.17 Qui denudat**. Ostendit in quo maxime læditur amicitia, in malo, scilicet proditi-
onis, quæ fidem, scilicet perdit, nec amicitiae æquitatem custodit, et ideo dissipat charitatem.

³²⁹ + **27.22 Quasi caprea**. Caprea, capra sylvestris, dicta quasi capiens ardua. Capreae
autem ibices vel avices dicuntur, eo quod ad instar avium alta et excelsa teneant: et in sublimibus
habitent, ita ut de sublimitate vix humanis obtutibus pateant. Hæ si quando adversitatem ferarum,
vel hominum præsenferint: de altis cacuminibus sese præcipitantes, suis se cornibus in ramis
arborum recipiunt illæsas.

³³⁰ + **27.24 Denudare autem**, etc. RAB. Proditoris inconstantiam morum ostendit, etc., usque
ad: Homo apostata, vir inutilis graditur ore perverso, annuit oculis, terit pede, etc. Prov. 6..

³³¹ + **27.30 Facienti nequissimum consilium**. Quia non prospicit quod veniat dies ejus.
Æstimat enim hæreticus vel schismaticus, quod melior sit ejus secta quam veritas catholica: unde
illudit seipsum.

³³² + **28.8 Memorare**. RAB. Qui Deum timet, iram vel furorem compescit, et non obliviscitur
testamenti Dei, qui ait: Dimittite et dimittetur vobis Luc. 9..

Altissimi, et despice ignorantiam proximi. ¹⁰ Abstine te a lite, et minues peccata. ¹¹ Homo enim iracundus incendit litem, et vir peccator turbabit amicos, et in medio pacem habentium immittet inimicitiam. ¹² Secundum enim ligna silvæ sic ignis exardescit: et secundum virtutem hominis sic iracundia illius erit, et secundum substantiam suam exaltabit iram suam. ¹³ Certamen festinatum incendit ignem, et lis festinans effundit sanguinem: et lingua testificans adducit mortem. ³³³ ¹⁴ Si sufflaveris in scintillam, quasi ignis exardebit: et si exspueris super illam, extinguetur: utraque ex ore proficiscuntur.] ¹⁵ [Susurro et bilinguis maledictus, multos enim turbabit pacem habentes. ¹⁶ Lingua tertia multos commovit, et dispersit illos de gente in gentem. ¹⁷ Civitates muratas divitum destruxit, et domus magnatorum effodit. ¹⁸ Virtutes populorum concidit, et gentes fortes dissolvit. ¹⁹ Lingua tertia mulieres viratas eiecit, et privavit illas laboribus suis. ³³⁴ ²⁰ Qui respicit illam non habebit requiem, nec habebit amicum in quo requiescat. ²¹ Flagelli plaga livorem facit: plaga autem linguæ comminuet ossa. ³³⁵ ²² Multi ceciderunt in ore gladii: sed non sic quasi qui interierunt per linguam suam. ²³ Beatus qui tectus est a lingua nequam, qui in iracundiam illius non transivit, et qui non attraxit jugum illius, et in vinculis ejus non est ligatus: ²⁴ jugum enim illius jugum ferreum est, et vinculum illius vinculum æreum est; ²⁵ mors illius mors nequissima: et utilis potius infernus quam illa. ²⁶ Perseverantia illius non permanebit, sed obtinebit vias injustorum, et in flamma sua non comburet justos. ²⁷ Qui relinquunt Deum incident in illam, et exardebit in illis, et non extinguetur, et immittetur in illos quasi leo, et quasi pardus lædet illos. ²⁸ Sepi aures tuas spinis: linguam nequam noli audire: et ori tuo facito ostia et seras. ³³⁶ ²⁹ Aurum tuum et argentum tuum confla, et verbis tuis facito stateram, et frenos ori tuo rectos: ³⁰ et attende ne forte labaris in lingua, et cadas in conspectu inimicorum insidiantium tibi, et sit casus tuus insanabilis in mortem.]

29[Qui facit misericordiam fœneratur proximo suo: et qui prævalet manu mandata servat. ² Fœnerare proximo tuo in tempore necessitatis illius: et iterum redde proximo in tempore suo. ³ Confirma verbum, et fideliter age cum illo: et in omni tempore invenies quod tibi necessarium est. ⁴ Multi quasi inventionem æstimaverunt fœnus, et præstiterunt molestiam his qui se adjuverunt. ⁵ Donec accipiant, osculantur manus dantis, et in promissionibus humiliant vocem suam: ³³⁷ ⁶ et in tempore redditionis

³³³ + **28.13 Certamen.** Indiscreta actio: unde, Noli esse nimium justus, neque plus sapias quam necesse est, ne obstupescas. Disciplina ergo immoderata excitat furoris ardorem, et procax loquela effusionem sanguinis.

³³⁴ + **28.19 Lingua tertia.** Hæretica doctrina, quæ nec Veteri nec Novo Testamento concordat, et auditorum corda conturbat, et de gente in gentem pergens, seditionem excitat.

³³⁵ + **28.21 Plaga autem.** Pejor est interitus animæ quam occidunt hæretici, quam quilibet cruciatus corporis. Beatus qui tectus. Beatus, qui non consentit hæreticis, et cujus cor eorum eloquentia non subvertit, quia sicut alienus est ab eorum malitia, ita separatur a pœna.

³³⁶ + **28.28 Sepi aures.** Postquam malum linguæ extirpavit, ad doctrinam auditoris se convertit.

³³⁷ + **29.5 Donec accipiant.** RAB. Hujusmodi morbum melius curat timor Dei. Qui enim

postulabit tempus, et loquetur verba tædii et murmurationum, et tempus causabitur. ⁷ Si autem potuerit reddere, adversabitur: solidi vix reddet dimidium, et computabit illud quasi inventionem: ⁸ sin autem, fraudabit illum pecunia sua, et possidebit illum inimicum gratis: ⁹ et convitia et maledicta reddet illi, et pro honore et beneficio reddet illi contumeliam. ¹⁰ Multi non causa nequitiae non fœnerati sunt, sed fraudari gratis timuerunt. ³³⁸

¹¹ Verumtamen super humilem animo fortior esto, et pro eleemosyna non trahas illum. ¹² Propter mandatum assume pauperem, et propter inopiam ejus ne dimittas eum vacuum. ³³⁹ ¹³ Perde pecuniam propter fratrem et amicum tuum, et non abscondas illam sub lapide in perditionem. ³⁴⁰ ¹⁴ Pone thesaurum tuum in præceptis Altissimi, et proderit tibi magis quam aurum. ¹⁵ Conclude eleemosynam in corde pauperis, et hæc pro te exorabit ab omni malo. ¹⁶ Super scutum potentis ³⁴¹ ¹⁷ et super lanceam ¹⁸ adversus inimicum tuum pugnabit.] ¹⁹ [Vir bonus fidem facit pro proximo suo: et qui perdidit confusionem derelinquet sibi. ²⁰ Gratiam fidejussoris ne obliviscaris: dedit enim pro te animam suam. ³⁴² ²¹ Repromissorem fugit peccator et immundus. ²² Bona repromissoris sibi ascribit peccator: et ingratus sensu derelinquet liberantem se. ²³ Vir repromittit de proximo suo: et cum perdidit reverentiam, derelinquetur ab eo. ³⁴³ ²⁴ Repromissio nequissima multos perdidit dirigentes, et commovit illos quasi fluctus maris. ²⁵ Viros potentes gyrans migrare fecit, et vagati sunt in gentibus alienis. ²⁶ Peccator transgrediens mandatum Domini incidet in promissionem nequam: et qui conatur multa agere incidet in iudicium. ²⁷ Recupera proximum secundum virtutem tuam, et attende tibi ne incidas.] ³⁴⁴ ²⁸ [Initium vitæ hominis, aqua et panis, et vestimentum, et domus protegens turpitudinem. ³⁴⁵ ²⁹ Melior est victus pauperis sub tegmine asserum quam epulæ splendidæ in peregre sine domicilio. ³⁴⁶ ³⁰ Minimum pro magno placeat

Deum quasi semper præsentem pertimescit, neminem fraudare intendit.

³³⁸ + **29.10 Multis**, etc. ID. Illos notat, qui neminem lædere volunt, sed præ timore periturarum rerum prodesse nolunt. Contra quos dicitur: Nolite thesaurizare vobis thesauros in terra Matth. 6..

³³⁹ + **29.12 Propter mandatum**. Omnibus indigentibus misericordia est facienda, nec pro avaritia charitas proximi amittenda.

³⁴⁰ + **29.13 Et non abscondas**. Qui enim viderit fratrem suum necesse habere, et clausurit viscera sua ab eo, quomodo charitas Dei manet in eo?

³⁴¹ + **29.16 Super scutum potentis**, etc. Magis valet eleemosyna contra jacula inimici, quam arma terrena: quia hæc dubiam, illa certissimam parit victoriam, ut absorbeatur mors in victoria.

³⁴² + **29.20 Gratiam fidejussoris**, etc. Doctorem scilicet qui pro fide et bonis operibus promittit vitam æternam. Hæc sententia Pelagium reprehendit qui liberum arbitrium gratiæ præponit, cum per solam gratiam liberentur electi.

³⁴³ + **29.23 Qui perdidit**, etc. Id est, qui unitatem fidei, et sinceritatem legis non custodit, sed implicatur erroribus variis.

³⁴⁴ + **29.27 Recupera proximum**. Consulit, ut secundum vires proximo præbeas solatium, et sic tibi prævideas, ne in laqueum cadas.

³⁴⁵ + **29.28 Initium vitæ**, etc. RAB. Fragilitatem, et hospitalitatem et honestatem docet, etc., usque ad et Dominus primis parentibus pelliceas tunicas post peccatum fecit.

³⁴⁶ + **29.29 Melior est victus pauperis**, etc. Ad litteram. Melius est tenuem victum sub vili tugurio sumere in securitate, quam splendidas epulas cum fatigatione in incertis locis quærere. ID. Allegorice. Melior est victus, etc., usque ad ubi labor et superflua cura.

tibi, et improperium peregrinationis non audies. ³⁴⁷ ³¹ Vita nequam hospitandi de domo in domum: et ubi hospitabitur non fiducialiter aget, nec aperiet os. ³² Hospitabitur, et pascet, et potabit ingratos, et ad hæc amara audiet: ³³ transi, hospes, et orna mensam, et quæ in manu habes ciba ceteros. ³⁴⁸ ³⁴ Exi a facie honoris amicorum meorum: necessitudine domus meæ hospitio mihi factus est frater. ³⁴⁹ ³⁵ Gravia hæc homini habenti sensum: correptio domus, et improperium fœneratoris.]

30[Qui diligit filium suum assiduat illi flagella, ut lætetur in novissimo suo, et non palpet proximorum ostia. ³⁵⁰ ² Qui docet filium suum laudabitur in illo, et in medio domesticorum in illo gloriabitur. ³ Qui docet filium suum in zelum mittit inimicum, et in medio amicorum gloriabitur in illo. ⁴ Mortuus est pater ejus, et quasi non est mortuus: similem enim reliquit sibi post se. ⁵ In vita sua vidit, et lætatus est in illo: in obitu suo non est contristatus, nec confusus est coram inimicis: ⁶ reliquit enim defensorem domus contra inimicos, et amicis reddentem gratiam. ⁷ Pro animabus filiorum colligabit vulnera sua, et super omnem vocem turbabuntur viscera ejus. ⁸ Equus indomitus evadit durus, et filius remissus evadet præceps. ³⁵¹ ⁹ Lacta filium, et paventem te faciet: lude cum eo, et contristabit te. ¹⁰ Non corrideas illi, ne doleas, et in novissimo obstupescent dentes tui. ¹¹ Non des illi potestatem in juventute, et ne despicias cogitatus illius. ¹² Curva cervicem ejus in juventute, et tunde latera ejus dum infans est, ne forte induret, et non credat tibi, et erit tibi dolor animæ. ¹³ Doce filium tuum, et operare in illo, ne in turpitudinem illius offendas.] ¹⁴ [Melior est pauper sanus, et fortis viribus, quam dives imbecillis et flagellatus malitia. ³⁵² ¹⁵ Salus animæ in sanctitate justitiæ melior est omni auro et argento: et corpus validum quam census immensus. ³⁵³ ¹⁶ Non est census super censum salutis corporis, et non est oblectamentum super cordis gaudium. ¹⁷ Melior est mors quam vita amara, et requies æterna quam languor perseverans. ¹⁸ Bona abscondita in ore clauso, quasi appositiones epularum circumpositæ sepulchro. ³⁵⁴ ¹⁹ Quid proderit libatio idolo? nec enim manducabit, nec

³⁴⁷ + **29.30 Minimum.** ID. Sufficiat tibi quod habes, etc., usque ad melius est nomen bonum quam deliciæ multæ.

³⁴⁸ + **29.33 Transi.** Quasi: Qui alieno delectaris hospitio, redi ad propria, et de labore tuo te et alios pasce. Noli de aliena domo pastum tibi superfluum quærere. Sufficit tibi susceptio proximorum.

³⁴⁹ + **29.34 Improperium.** RAB. Mystice autem monetur vir ecclesiasticus, etc., usque ad in futuro autem examine æternum confusionis improperium sustineat.

³⁵⁰ + **30.1 Qui diligit filium.** RAB. Patres tam carnales quam spirituales monet, ut filios suos diligenter erudiant, ut honeste vivant, ne lascivendo per aliorum dogmata discurrant.

³⁵¹ + **30.8 Equus indomitus.** Equus indomitus in præcipitium vadit; filius indisciplinatus in peccatum ruit. Docet ergo spirituales patres, ut filios suos erudiant et corrigant; ne eis immoderate frena relaxent, ne cadant in turpitudinem vitiorum, et ipsi ignominiam sustineant sempiternam.

³⁵² + **30.14 Melior est pauper.** Dulcis est somnus operanti, sive multum comedat, sive parum. Saturitas enim divitis non sinit dormire eum.

³⁵³ + **30.15 Salus animæ.** Vera salus animæ justitia est, cui aurum et argentum non valent comparari, quia non proderunt divitiæ in die ultionis. Justitia autem animam liberabit a morte.

³⁵⁴ + **30.18 Bona abscondita.** RAB. Contra eos loquitur, qui talentum verbi abscondunt;

odorabit. ²⁰ Sic qui effugatur a Domino, portans mercedes iniquitatis: ²¹ videns oculis et ingemiscens, sicut spado complectens virginem, et suspirans. ³⁵⁵ ²² Tristitiam non des animæ tuæ, et non affligas temetipsum in consilio tuo. ²³ Jucunditas cordis, hæc est vita hominis, et thesaurus sine defectione sanctitatis: et exsultatio viri est longævitas. ³⁵⁶ ²⁴ Miserere animæ tuæ placens Deo, et contine: congrega cor tuum in sanctitate ejus, et tristitiam longe repelle a te. ²⁵ Multos enim occidit tristitia, et non est utilitas in illa. ²⁶ Zelus et iracundia minuunt dies, et ante tempus senectam adducet cogitatus. ³⁵⁷ ²⁷ Splendidum cor et bonum in epulis est: epulæ enim illius diligenter fiunt.]

³¹[Vigilia honestatis tabefaciet carnes, et cogitatus illius auferet somnum. ³⁵⁸ ² Cogitatus præscientiæ avertit sensum, et infirmitas gravis sobriam facit animam. ³ Laboravit dives in congregatione substantiæ, et in requie sua replebitur bonis suis. ⁴ Laboravit pauper in diminutione victus, et in fine inops fit. ⁵ Qui aurum diligit non justificabitur, et qui insequitur consumptionem replebitur ex ea. ⁶ Multi dati sunt in auri casus, et facta est in specie ipsius perditio illorum. ⁷ Lignum offensionis est aurum sacrificantium: væ illis qui sectantur illud ! et omnis imprudens deperiet in illo. ⁸ Beatus dives qui inventus est sine macula, et qui post aurum non abiit, nec speravit in pecunia et thesauris. ⁹ Quis est hic? et laudabimus eum: fecit enim mirabilia in vita sua. ¹⁰ Qui probatus est in illo, et perfectus est, erit illi gloria æterna: qui potuit transgredi, et non est transgressus; facere mala, et non fecit. ¹¹ Ideo stabilita sunt bona illius in Domino, et elemosynas illius enarrabit omnis ecclesia sanctorum.] ¹² [Supra mensam magnam sedisti? non aperias super illam faucem tuam prior. ³⁵⁹ ¹³ Non dicas sic: Multa sunt, quæ super illam sunt. ³⁶⁰ ¹⁴ Memento quoniam malus est oculus nequam. ¹⁵ Nequius oculo quid creatum est? ideo ab omni facie sua lacrimabitur, cum viderit. ¹⁶ Ne extendas manum tuam prior, et invidia contaminatus erubescas. ¹⁷ Ne comprimar in convivio. ¹⁸ Intellige quæ sunt proximi tui ex teipso. ¹⁹ Utere quasi homo frugi his quæ tibi apponuntur: ne, cum manducas multum, odio habearis. ³⁶¹ ²⁰ Cessa prior

quorum scientia virtutibus inutilis, sicut epulæ mortuis et thesaurus.

³⁵⁵ + **30.21 Sicut spado.** Non facit ad complexum virginis, sic adoratio idoli, adorantibus incongrua et inutilis.

³⁵⁶ + **30.23 Jucunditas cordis.** Quia nulla virtus sine ea consistit. Major autem horum est charitas I Cor. 13..

³⁵⁷ + **30.26 Minuunt dies,** etc. Viri sanguinum non dimidiabunt dies suos Psal. 54.. ID. Id est, prosperitatem, quam sibi promittunt, non possunt habere in perpetuum.

³⁵⁸ + **31.1 Lignum offensionis.** RAB. Sicut Adam in ligno vetito, etc., usque ad quæ splendore eloquentiæ nitet, et curiosos seducit.

³⁵⁹ + **31.12 Supra mensam.** ID. Ad litteram, continentiam, etc., usque ad sed sanctorum doctorum viam teneamus.

³⁶⁰ + **31.13 Non dicas,** etc. ID. Quasi diceret: Ne præsumptione aliquid agas, vel antequam discas ad scribendum manum mittas.

³⁶¹ + **31.19 Utere,** etc. Quasi: Sobrietatem dilige, temperanter age, et ne quid nimis, ne in scandalum confusionis incidas. Convenit ergo Christiano ante omnia humilitatem diligere, in lectione Scripturæ cautum esse, rectam fidem tenere, modum in scientia servare, et charitatis

causa disciplinæ: et noli nimius esse, ne forte offendas. ²¹ Et si in medio multorum sedisti, prior illis ne extendas manum tuam, nec prior poscas bibere. ²² Quam sufficiens est homini eruditio vinum exiguum ! et in dormiendo non laborabis ab illo, et non senties dolorem. ³⁶² ²³ Vigilia, cholera et tortura viro infrunito, ²⁴ somnus sanitatis in homine parco: dormiet usque mane, et anima illius cum ipso delectabitur. ³⁶³ ²⁵ Et si coactus fueris in edendo multum, surge e medio, evome, et refrigerabit te, et non adduces corpori tuo infirmitatem. ³⁶⁴ ²⁶ Audi me, fili, et ne spernas me, et in novissimo invenies verba mea. ²⁷ In omnibus operibus tuis esto velox, et omnis infirmitas non occurret tibi. ³⁶⁵ ²⁸ Splendidum in panibus benedicient labia multorum, et testimonium veritatis illius fidele. ³⁶⁶ ²⁹ Nequissimo in pane murmurabit civitas, et testimonium nequitiae illius verum est. ³⁰ Diligentes in vino noli provocare: multos enim exterminavit vinum. ³⁶⁷ ³¹ Ignis probat ferrum durum: sic vinum corda superbiorum arguet in ebrietate potatum. ³⁶⁸ ³² Æqua vita hominibus vinum in sobrietate: si bibas illud moderate, eris sobrius. ³⁶⁹ ³³ Quæ vita est ei qui minuitur vino? ³⁴ Quid defraudat vitam? mors. ³⁵ Vinum in jucunditatem creatum est, et non in ebrietatem ab initio. ³⁶ Exsultatio animæ et cordis vinum moderate potatum. ³⁷ Sanitas est animæ et corpori sobrius potus. ³⁸ Vinum multum potatum irritationem, et iram, et ruinas multas facit. ³⁹ Amaritudo animæ vinum multum potatum. ⁴⁰ Ebrietatis animositas, imprudentis offensio, minorans virtutem, et faciens vulnera. ⁴¹ In convivio vini non arguas proximum, et non despicias eum in jucunditate illius. ⁴² Verba impropertii non dicas illi, et non premas illum repetendo.]

32[Rectorem te posuerunt? noli extolli: esto in illis quasi unus ex ipsis. ³⁷⁰

regulam, ut probatus sit coram Deo et hominibus.

³⁶² + **31.22 Quam sufficiens.** Tenuis victus tam animæ quam corpori utilis est, superfluo vero e contra. Vinum quoque spirituale sumptum moderate, utile est tam corpori quam animæ: immoderate enim insanire facit, et a Deo disjungit, unde anxia cura, et turbatio maxima, et perpetua tortura.

³⁶³ + **31.24 Somnus sanitatis.** Subtilior est somnus in parvo victu. Mystice autem qui sobrius est in spiritali vino, in contemplatione veritatis quiescit usque in mane resurrectionis.

³⁶⁴ + **31.25 Et vomere,** etc. Aiunt medici, quod vomitus stomachum purgat: choleram minuit. Mystice autem qui transgreditur mensuram et gravatur carnalibus delictis, per confessionem peccati fœditatem evomat, et per corporis castigationem ad sanitatem redeat.

³⁶⁵ + **31.27 In omnibus operibus.** Monet ne tempus perdamus, bene operemur, ut mandata Dei custodientes requiem inveniamus animabus nostris.

³⁶⁶ + **31.28 Splendidum.** Ad litteram: ad eleemosynam invitat: Quia qui seminat in benedictionibus, de benedictionibus et metet II Cor. 9.. Mystice autem qui panem verbi fideliter dispensat, et testimonium veritatis non occultat, in præsentia, et in futuro benedicetur.

³⁶⁷ + **31.30 Multos enim,** etc. RAB. Id est ebrietas multos subvertit, quæ sensum minuit, iram excitat, libidinem inflammat, animi secreta revelat.

³⁶⁸ + **31.31 Ignis.** Id est sicut ignis ferri duritiam mollit, et candescere facit; sic vinum corda superbiorum inflammans, ad facinus impellit.

³⁶⁹ + **31.32 Æqua vita.** Vinum sobrie potatum vitam æquitatis non tollit; sed sobrietatem, et cætera virtutum ornamenta adducit. Vinum. Patet irritationem, iram, et ruinas multas ebrietate nasci, et amaritudinem animæ, et scelerum vulnera multiplicari.

³⁷⁰ + **32.1 Rectorem.** RAB. Qui dignitate præest, non debet superbire: Qui major est vestrum,

² Curam illorum habe, et sic conside, et omni cura tua explicita recumbe: ³ ut læteris propter illos, et ornamentum gratiæ accipias coronam, et dignationem consequaris corrogationis. ⁴ Loquere major natu: decet enim te ⁵ primum verbum diligenti scientia, et non impediās musicam. ⁶ Ubi auditus non est, non effundas sermonem, et importune noli extolli in sapientia tua. ⁷ Gemmula carbunculi in ornamento auri, et comparatio musicorum in convivio vini. ³⁷¹ ⁸ Sicut in fabricatione auri signum est smaragdi, sic numerus musicorum in jucundo et moderato vino. ⁹ Audi tacens, et pro reverentia accedet tibi bona gratia. ¹⁰ Adolescens, loquere in tua causa vix. ¹¹ Si bis interrogatus fueris, habeat caput responsum tuum. ¹² In multis esto quasi inscius, et audi tacens simul et quærens. ¹³ In medio magnatorum non præsumas: et ubi sunt senes non multum loquaris. ¹⁴ Ante grandinem præibit coruscatio: et ante verecundiam præibit gratia, et pro reverentia accedet tibi bona gratia. ³⁷² ¹⁵ Et hora surgendi non te trices: præcurre autem prior in domum tuam, et illic avocare, et illic lude, ³⁷³ ¹⁶ et age conceptiones tuas, et non in delictis et verbo superbo: ¹⁷ et super his omnibus benedicito Dominum, qui fecit, et inebriantem te ab omnibus bonis suis.] ¹⁸ [Qui timet Dominum excipiet doctrinam ejus: et qui vigilaverint ad illum invenient benedictionem. ¹⁹ Qui quærit legem replebitur ab ea, et qui insidiose agit scandalizabitur in ea. ²⁰ Qui timent Dominum invenient iudicium justum, et justitias quasi lumen accendent. ²¹ Peccator homo vitabit correptionem, et secundum voluntatem suam invenient comparisonem. ²² Vir consilii non disperdet intelligentiam: alienus et superbus non pertimescet timorem: ³⁷⁴ ²³ etiam postquam fecit cum eo sine consilio, et suis insectationibus arguetur. ²⁴ Fili, sine consilio nihil facias, et post factum non poenitebis. ³⁷⁵ ²⁵ In via ruinæ non eas, et non offendes in lapides: nec credas te viæ laboriosæ, ne ponas animæ tuæ scandalum. ²⁶ Et a filiis tuis cave, et a domesticis tuis attende. ²⁷ In omni opere tuo crede ex fide animæ tuæ, hoc est enim conservatio mandatorum. ²⁸ Qui credit Deo attendit mandatis: et qui confidit in illo non minorabitur.]

33[Timenti Dominum non occurrent mala: sed in tentatione Deus illum conservabit, et liberabit a malis. Sapiens non odit mandata et justitias, ² et non illidetur quasi in procella navis. ³ Homo sensatus credit legi Dei, et lex

fiat sicut minor, etc. Matth. 10..

³⁷¹ + **32.7 Gemmula carbunculi.** RAB. Ardentium gemmarum principatum tenet, etc., usque ad et mysteria Dominicæ passionis digno veneratur sacramento.

³⁷² + **32.14 Ante grandinem.** ID. Fulgor coruscationis præibit pondus grandinis; sic nitor gratiæ verecundiam.

³⁷³ + **32.15 Hora surgenti.** ID. Admonet ne simus tristes, etc., usque ad qui per gratiam nos fecit, et bonis [operibus] omnibus replevit.

³⁷⁴ + **32.22 Vir consilii.** Quanto quis prudentior, tanto utitur proximorum consilio, ut addat sibi intelligentiam.

³⁷⁵ + **32.24 Fili, sine consilio.** Possunt hæc de catholico et hæretico accipi. Catholicus enim Deum timens omnia agit doctorum consilio et Scripturarum documento. Hæreticus vero propria confidens sapientia, et propriis instat inventionibus: sed cum stultitia ejus apparuerit, per sanctos prædicatores divinis arguetur sententiis

illi fidelis.] ⁴ [Qui interrogationem manifestat parabit verbum, et sic deprecatus exaudietur: et conservabit disciplinam, et tunc respondebit. ⁵ Præcordia fatui quasi rota carri, et quasi axis versatilis cogitatus illius. ³⁷⁶ ⁶ Equus emissarius, sic et amicus subsannator: sub omni supra sedente hinnit.] ³⁷⁷ ⁷ [Quare dies diem superat, et iterum lux lucem, et annus annum a sole? ³⁷⁸ ⁸ A Domini scientia separati sunt, facto sole, et præceptum custodiende. ³⁷⁹ ⁹ Et immutavit tempora, et dies festos ipsorum, et in illis dies festos celebraverunt ad horam. ¹⁰ Ex ipsis exaltavit et magnificavit Deus, et ex ipsis posuit in numerum dierum: et omnes homines de solo et ex terra unde creatus est Adam. ³⁸⁰ ¹¹ In multitudine disciplinæ Dominus separavit eos, et immutavit vias eorum. ¹² Ex ipsis benedixit et exaltavit, et ex ipsis sanctificavit, et ad se applicavit, et ex ipsis maledixit, et humiliavit, et convertit illos a separatione ipsorum. ¹³ Quasi lutum figuli in manu ipsius, plasmare illud et disponere. ³⁸¹ ¹⁴ Omnes viæ ejus secundum dispositionem ejus: sic homo in manu illius qui se fecit, et reddet illi secundum iudicium suum. ¹⁵ Contra malum bonum est, et contra mortem vita: sic et contra virum justum peccator, et sic intuere in omnia opera Altissimi, duo et duo, et unum contra unum.] ³⁸² ¹⁶ [Et ego novissimus evigilavi, et quasi qui colligit acinos post vindemiatos. ¹⁷ In benedictione Dei et ipse speravi, et quasi qui vindemiat replevi torcular. ¹⁸ Respicite quoniam non mihi soli laboravi, sed omnibus exquirentibus disciplinam. ³⁸³ ¹⁹ Audite me, magnates et omnes populi: et rectores ecclesiæ, auribus percipite.] ³⁸⁴ ²⁰ [Filio et mulieri, fratri et amico, non des potestatem super te in vita tua: et non dederis alii possessionem tuam, ne forte pœniteat te, et depreceris pro

³⁷⁶ + **33.5 Præcordia fatui.** RAB. Sicut rota carri et axis, etc., usque ad: Cor stultorum dissimile erit Prov. 15..

³⁷⁷ + **33.6 Equus,** etc. ID. Sicut jumento nulla est ratio, etc., usque ad sed per oris officia æqualiter utrique pandit secreta.

³⁷⁸ + **33.7 Quare dies.** ID. Quia superius stultum vituperavit, etc., usque ad ut sint in signa et tempora, et dies, et annos.

³⁷⁹ + **33.8 Facto sole.** ID. Præcepit Deus in lege, etc., usque ad et maxime placere quod ordine et ratione fit.

³⁸⁰ + **33.10 Ex ipsis exaltavit.** ID. Id est, sua discretione illos distinxit, quos pro benefactis remuneravit, et quibus pro malefactis dignam mercedem retribuit. Et omnes homines. Post dispositionem siderum, etc., usque ad impios vero æterna maledictione damnavit.

³⁸¹ + **33.13 Quasi lutum,** etc. RAB. In manu sua habet conditor massam humani generis, etc., usque ad et quem debeat indurare secundum justitiam.

³⁸² + **33.15 Contra malum.** Investigator operum Dei invenit in ipsis quamdam contrarietatem, sed mirabiliter a Deo ordinatam. Non est ergo mali conditor Deus, qui fecit omnia bona valde; nec mortem fecit, nec lætatur in perditione mortuorum, sed universitatis est mirabilis ordinator. Naturæ ergo bonæ sunt, et a Deo sunt: vitia vero non ex Deo.

³⁸³ + **33.18 Respicite.** Omnes communiter admonet, ut juris sui rationem non omittant, quia non aliter potest habere pacem et quietem. Qui enim primatus sui auctoritatem perdit, in despectionem et angustiam se mittit: qui autem locum suum sapienter custodit, se et suos ad profectum virtutis dirigit.

³⁸⁴ + **33.19 Audite.** Ad litteram patres docet, ut filios regant, et cum disciplina nutriant, donec veniant ad ætatem perfectam, ut digni hæredes patrum suorum possint esse. Spiritualiter vero instruit rectores Ecclesiæ, ut dignitatem suam usque ad finem teneant et discipulos suos bene nutritos hæredes sui laboris relinquunt. Tenere debent rectores exterius quod pro aliorum utilitate suscipiunt.

illis. ²¹ Dum adhuc superes et aspiras, non immutabit te omnis caro. ²² Melius est enim ut filii tui te rogent, quam te respicere in manus filiorum tuorum. ²³ In omnibus operibus tuis præcellens esto. ²⁴ Ne dederis maculam in gloria tua. In die consummationis dierum vitæ tuæ, et in tempore exitus tui, distribue hæreditatem tuam.] ²⁵ [Cibaria, et virga, et onus asino: panis, et disciplina, et opus servo. ³⁸⁵ ²⁶ Operatur in disciplina, et quærit requiescere: laxa manus illi, et quærit libertatem. ²⁷ Jugum et lorum curvant collum durum, et servum inclinant operationes assiduæ. ²⁸ Servo malevolo tortura et compedes: mitte illum in operationem, ne vacet: ²⁹ multam enim malitiam docuit otiositas. ³⁰ In opera constitue eum: sic enim condecet illum. Quod si non obaudierit, curva illum compedibus, et non amplifices super omnem carnem: verum sine iudicio nihil facias grave. ³¹ Si est tibi servus fidelis, sit tibi quasi anima tua: quasi fratrem sic eum tracta, quoniam in sanguine animæ comparasti illum. ³⁸⁶ ³² Si læseris eum injuste, in fugam convertetur: ³³ et si extollens discesserit, quem quæras et in qua via quæras illum nescis.]

34[Vana spes et mendacium viro insensato: et somnia extollunt imprudentes. ² Quasi qui apprehendit umbram et persequitur ventum, sic et qui attendit ad visa mendacia. ³⁸⁷ ³ Hoc secundum hoc visio somniorum, ante faciem hominis similitudo hominis. ⁴ Ab immundo, quid mundabitur? et a mendace, quid verum dicetur? ⁵ Divinatio erroris, et auguria mendacia, et somnia malefacientium, vanitas est: ⁶ et sicut parturientis, cor tuum phantasias patitur. Nisi ab Altissimo fuerit emissa visitatio, ne dederis in illis cor tuum: ⁷ multos enim errare fecerunt somnia, et exciderunt sperantes in illis. ⁸ Sine mendacio consummabitur verbum legis, et sapientia in ore fidelis complanabitur.] ³⁸⁸ ⁹ [Qui non est tentatus quid scit? vir in multis expertus cogitabit multa: et qui multa didicit enarrabit intellectum. ³⁸⁹ ¹⁰ Qui non est expertus pauca recognoscit: qui autem in multis factus est, multiplicat malitiam. ³⁹⁰ ¹¹ Qui tentatus non est qualia scit? qui implanatus est abundabit nequitia. ¹² Multa vidi errando, et plurimas verborum consuetudines. ³⁹¹ ¹³ Aliquoties usque ad mortem periclitatus sum horum causa, et liberatus sum gratia Dei.] ¹⁴ [Spiritus timentium Deum

³⁸⁵ + **33.25 Cibaria et virga**, etc. RAB. Necessè est ut iniqui servi, etc., usque ad ut habeant, scilicet victum et vestitum, non vagandi otium.

³⁸⁶ + **33.31 Si est tibi fidelis**, etc. ID. Boni servi legem tradidit, etc., usque ad non est enim homo persequendus, sed vitia.

³⁸⁷ + **34.2 Quasi qui apprehendit**. RAB. Significat somnia fallacia, etc., usque ad ut sciant quid a bono spiritu percipiant, vel quid ab illusionem patientur.

³⁸⁸ + **34.8 Sine mendacio**. Abiectis somniis hortatur credendum esse doctrinæ sapientiæ, quæ in ore fidelis viri complanata sine mendacio consummat verbum.

³⁸⁹ + **34.9 Enarrabit intellectum**. Aliis instruendis: unde, Benedictus Deus, qui consolatur nos in omni tribulatione nostra, ut possimus consolari eos qui in omni pressura sunt II Cor. 12..

³⁹⁰ + **34.10 Qui autem in multis**, etc. Mutabilis, scilicet mente, instabilis est actione. Vel, qui fidei unitate perdita multiplices sequitur hæreticorum sectas, multis impietatibus servit.

³⁹¹ + **34.12 Plurimas verborum** RAB. Scripturam significat; qui intente Scripturam meditatur, et humiliter Dominum deprecatur, et rerum et verborum scientiam adipiscitur.

quæritur, et in respectu illius benedicetur. ¹⁵ Spes enim illorum in salvantem illos, et oculi Dei in diligentes se. ¹⁶ Qui timet Dominum nihil trepidabit: et non pavebit, quoniam ipse est spes ejus. ¹⁷ Timentis Dominum, beata est anima ejus. ¹⁸ Ad quem respicit, et quis est fortitudo ejus? ¹⁹ Oculi Domini super timentes eum: protector potentiae, firmamentum virtutis, tegimen ardoris, et umbraculum meridiani: ²⁰ deprecatio offensionis, et adjutorium casus: exaltans animam, et illuminans oculos, dans sanitatem, et vitam, et benedictionem.] ²¹ [Immolantis ex iniquo oblatio est maculata, et non sunt beneplacitæ subsannationes injustorum. ²² Dominus solus sustinentibus se in via veritatis et justitiæ. ²³ Dona iniquorum non probat Altissimus, nec respicit in oblationes iniquorum, nec in multitudine sacrificiorum eorum propitiabitur peccatis. ³⁹² ²⁴ Qui offert sacrificium ex substantia pauperum, quasi qui victimat filium in conspectu patris sui. ²⁵ Panis egentium vita pauperum est: qui defraudat illum homo sanguinis est. ²⁶ Qui aufert in sudore panem, quasi qui occidit proximum suum. ³⁹³ ²⁷ Qui effundit sanguinem, et qui fraudem facit mercenario, fratres sunt. ²⁸ Unus ædificans, et unus destruens: quid prodest illis, nisi labor? ³⁹⁴ ²⁹ Unus orans, et unus maledicens: cujus vocem exaudiet Deus? ³⁰ Qui baptizatur a mortuo, et iterum tangit eum, quid proficit lavatio illius? ³⁹⁵ ³¹ Sic homo qui jejunit in peccatis suis, et iterum eadem faciens: quid proficit humiliando se? orationem illius quis exaudiet?]

³⁵[Qui conservat legem multiplicat oblationem. ³⁹⁶ ² Sacrificium salutare est attendere mandatis, et discedere ab omni iniquitate. ³ Et propitiationem litare sacrificii super injustitias: et deprecatio pro peccatis, recedere ab injustitia. ³⁹⁷ ⁴ Retribuet gratiam qui offert similitudinem: et qui facit misericordiam offert sacrificium. ³⁹⁸ ⁵ Beneplacitum est Domino recedere ab iniquitate: et deprecatio pro peccatis recedere ab injustitia. ⁶ Non apparebis ante conspectum Domini vacuus: ⁷ hæc enim omnia propter mandatum Dei fiunt. ⁸ Oblatio justi impinguat altare, et odor suavitatis est in conspectu Altissimi. ⁹ Sacrificium justi acceptum est, et memoriam ejus non obliviscetur Dominus. ¹⁰ Bono animo gloriam redde Deo, et non minuas

³⁹² + **34.23 Dona iniquorum.** Valde detestabile est sacrificium, quod orbi patris dolori comparatur. Quidam pensant quanta tribuunt, et non quanta rapiunt. Et congregant mercedes, et mittunt eas in saccum pertusum. In sacco pertuso videtur, quando pecunia mittitur, sed non quando amittitur. Qui ergo quanta largiuntur aspiciunt, sed non quanta rapiunt, in sacco pertuso mercedes mittunt, quia eas in spem fiduciae suae intuentes congerunt, sed non se intuentes perdunt.

³⁹³ + **34.26 Qui aufert.** RAB. In sudore vultus sui pauper acquirit panem. Qui hunc violenter tollit, quasi qui occidit proximum suum.

³⁹⁴ + **34.28 Unus ædificans.** Hoc est quod supra dixit, sacrificium de rapina non esse acceptabile. Qui offert de rapina, videtur sibi ædificium virtutum præparare, non crimen avaritiæ attendit et rapinæ.

³⁹⁵ + **34.30 Qui baptizatur.** ID. Lavamini, etc., usque ad et rursum flenda committunt.

³⁹⁶ + **35.1 Qui conservat.** RAB. Bene orat, etc., usque ad quia bene operando servat justitiam.

³⁹⁷ + **35.3 Propitiationum.** Inter litare et sacrificare hoc distat. Nam sacrificat qui sacrificium facit. Litat qui sacrificium facit, et quod sacrificio petiit, impetrat.

³⁹⁸ + **35.4 Retribuet,** etc. Utrumque, scilicet gratum Deo, et quod in altari in commemorationem Jesu Christi offertur, et quod per charitatem proximo tribuitur.

primitias manuum tuarum. ³⁹⁹ ¹¹ In omni dato hilarem fac vultum tuum, et in exultatione sanctifica decimas tuas. ¹² Da Altissimo secundum datum ejus, et in bono oculo adinventionem facito manuum tuarum, ¹³ quoniam Dominus retribuens est, et septies tantum reddet tibi. ⁴⁰⁰ ¹⁴ Noli offerre munera prava, non enim suscipiet illa. ⁴⁰¹ ¹⁵ Et noli inspicere sacrificium injustum, quoniam Dominus judex est, et non est apud illum gloria personæ. ¹⁶ Non accipiet Dominus personam in pauperem, et deprecationem læsi exaudiet. ¹⁷ Non despiciet preces pupilli, nec viduam, si effundat loquelam gemitus. ¹⁸ Nonne lacrimæ viduæ ad maxillam descendunt, et exclamatio ejus super deducentem eas? ¹⁹ A maxilla enim ascendunt usque ad cælum, et Dominus exauditor non delectabitur in illis. ²⁰ Qui adorat Deum in oblectatione suscipietur, et deprecatio illius usque ad nubes propinquabit.] ²¹ [Oratio humiliantis se nubes penetrabit, et donec propinquet non consolabitur, et non discedet donec Altissimus aspiciat. ⁴⁰² ²² Et Dominus non elongabit: et judicabit justos, et faciet judicium: et Fortissimus non habebit in illis patientiam, ut contribulet dorsum ipsorum: ²³ et gentibus reddet vindictam, donec tollat plenitudinem superborum, et sceptrā iniquorum contribulet: ²⁴ donec reddat hominibus secundum actus suos, et secundum opera Adæ, et secundum præsumptionem illius: ²⁵ donec judicet judicium plebis suæ, et oblectabit justos misericordia sua. ²⁶ Speciosa misericordia Dei in tempore tribulationis, quasi nubes pluviae in tempore siccitatis.]

36[Miserere nostri, Deus omnium, et respice nos, et ostende nobis lucem miserationum tuarum: ⁴⁰³ ² et immitte timorem tuum super gentes quæ non exquisierunt te, ut cognoscant quia non est deus nisi tu, et enarrent magnalia tua. ³ Alleva manum tuam super gentes alienas, ut videant potentiam tuam. ⁴ Sicut enim in conspectu eorum sanctificatus es in nobis, sic in conspectu nostro magnificaberis in eis: ⁵ ut cognoscant te, sicut et nos cognovimus quoniam non est deus præter te, Domine. ⁶ Innova signa, et immuta mirabilia. ⁷ Glorifica manum et brachium dextrum. ⁴⁰⁴ ⁸ Excita furorem, et effunde iram. ⁹ Tolle adversarium, et afflige inimicum. ¹⁰ Festina tempus, et memento finis, ut enarrent mirabilia tua. ¹¹ In ira

³⁹⁹ + **35.10 Bono animo.** ID. Quidquid bono animo non datur, apud Deum gratiam non meretur. Homo enim videt in facie, Deus autem in corde. Et non minuas, etc. Mystice. Primitiæ frugum, etc., usque ad a quo et boni operis initium et perfectio donatur.

⁴⁰⁰ + **35.13 Septies tantum.** Perfectam, scilicet remunerationem. Septenarius enim, etc., usque ad sed etiam quatuor principalium virtutum operationem præbet.

⁴⁰¹ + **35.14 Noli offerre munera,** etc. Apud Deum non est quantitas muneris; nec persona potentis aspicitur: sed dilectio et humilitas cordis. Ideo non debet offerri sacrificium de iniquitate, sed de justo labore.

⁴⁰² + **35.21 Et donec propinquet,** etc. Ad superiora respicit, affirmans, quia Dominus orationem humilium misericorditer exaudit, qui non cessant, donec consolationem accipiant.

⁴⁰³ + **36.1 Miserere nostri.** RAB. Ex persona fidelium dirigit orationem ad Deum, ut illos defendat et inimicos deprimat, ut digne correcti Deum iterum agnoscant, et idola deserant.

⁴⁰⁴ + **36.7 Glorifica manum,** etc. ID. Optat, ut divina majestas per manum et dextrum brachium, id est, per Christum, per quem antiqua miracula facta sunt, innovet tempore gratiæ, ut veteris legis et novæ idem intelligatur esse Deus.

flammæ devoretur qui salvatur: et qui pessimant plebem tuam inveniant perditionem. ¹² Contere caput principum inimicorum, dicentium: Non est alius præter nos. ¹³ Congrega omnes tribus Jacob, ut cognoscant quia non est deus nisi tu, et enarrent magnalia tua, et hæreditabis eos sicut ab initio. ¹⁴ Miserere plebi tuæ, super quam invocatum est nomen tuum, et Israël quem coæquasti primogenito tuo. ¹⁵ Miserere civitati sanctificationis tuæ, Jerusalem, civitati requiei tuæ. ⁴⁰⁵ ¹⁶ Reple Sion inenarrabilibus verbis tuis, et gloria tua populum tuum. ⁴⁰⁶ ¹⁷ Da testimonium his qui ab initio creaturæ tuæ sunt, et suscita prædicationes quas locuti sunt in nomine tuo prophetæ priores. ⁴⁰⁷ ¹⁸ Da mercedem sustinentibus te, ut prophetæ tui fideles inveniantur: et exaudi orationes servorum tuorum, ¹⁹ secundum benedictionem Aaron de populo tuo: et dirige nos in viam justitiæ, et sciant omnes qui habitant terram quia tu es Deus conspexeris sæculorum.] ⁴⁰⁸ ²⁰ [Omnem escam manducabit venter: et est cibus cibo melior. ⁴⁰⁹ ²¹ Fauces contingunt cibum feræ, et cor sensatum verba mendacia. ²² Cor pravum dabit tristitiam, et homo peritus resistet illi. ²³ Omnem masculinum excipiet mulier: et est filia melior filia. ²⁴ Species mulieris exhilarat faciem viri sui, et super omnem concupiscentiam hominis superducit desiderium. ⁴¹⁰ ²⁵ Si est lingua curationis, est et mitigationis et misericordiæ: non est vir illius secundum filios hominum. ⁴¹¹ ²⁶ Qui possidet mulierem bonam inchoat possessionem: adjutorium secundum illum est, et columna ut requies. ⁴¹² ²⁷ Ubi non est sepes, diripietur possessio: et ubi non est mulier, ingemiscit egens. ²⁸ Quis credit ei qui non habet nidum, et deflectens ubicumque obscuraverit, quasi succinctus latro exiliens de civitate in civitatem?] ⁴¹³

37[Omnis amicus dicet: Et ego amicitiam copulavi: sed est amicus solo

⁴⁰⁵ + **36.15 Extolle adversarium**, etc. RAB. Significat per adventum Christi, etc., usque ad pro statu Ecclesiæ et fidelium salute.

⁴⁰⁶ + **36.16 Sion**, etc. Notitia Scripturæ, in qua prædicatur inenarrabilis virtus Dei.

⁴⁰⁷ + **36.17 Et suscita**, etc., Omnes prophetæ incarnationi Christi dant testimonium, quod Deus homo factus Ecclesiam sibi desponsaret.

⁴⁰⁸ + **36.19 Secundum benedictionem**, etc. ID. Ordinem scilicet, et ritum sacerdotii, etc., usque ad quod Aaron figuravit in temporalibus sacrificiis, hoc impleat in spiritualibus Evangelii.

⁴⁰⁹ + **36.20 Omnem escam**. ID. Postquam prædixit vocationem gentium, etc., usque ad sic veracem doctrinam discernamus, et fallacem.

⁴¹⁰ + **36.24 Species mulieris**. Christi gratia, quæ per prædicationem animas curat, et carnis concupiscentiam mitigat. Hæc in Ecclesia abundat, cujus desiderium est super omnem concupiscentiam hominis, quia in ea decor virtutum et pulchritudo doctrinæ. Super omnem. Nulla concupiscentia hominis huic desiderio potest comparari: quia, Fallax gratia et vana est pulchritudo; mulier timens Deum ipsa laudabitur Prov. 31..

⁴¹¹ + **36.25 Non est vir**. Christus qui excedit humanam naturam. Unde, Speciosus forma præ filiis hominum Psal. 44.. Hic enim peccatum non fecit, nec est inventus dolus in ore ejus.

⁴¹² + **36.26 Adjutorium**. Adjutorium Ecclesiæ est secundum dispensationem Christi. Unde, Justum adjutorium meum a Domino Psal. 7., etc. Ipse est infinitatis ejus columna, et laboris requies.

⁴¹³ + **36.28 Qui non habet nidum**. Id est, Ecclesiam, ubi electorum animæ filios bonorum operum nutriunt. Unde, Invenit sibi passer domum, et turtur nidum, ubi reponat pullos suos. Psal. 83..

nomine amicus. Nonne tristitia inest usque ad mortem? ⁴¹⁴ ² sodalis autem et amicus ad inimicitiam convertentur. ⁴¹⁵ ³ O præsumptio nequissima, unde create es cooperire aridam malitia et dolositate illius? ⁴¹⁶ ⁴ Sodalibus amico conjucundatur in oblectationibus, et in tempore tribulationis adversarius erit. ⁵ Sodalibus amico condolet causa ventris, et contra hostem accipiet scutum. ⁴¹⁷ ⁶ Non obliviscaris amici tui in animo tuo, et non immemor sis illius in opibus tuis. ⁷ Noli consiliari cum eo qui tibi insidiatur, et a zelantibus te absconde consilium.] ⁸ [Omnis consiliarius prodit consilium, sed est consiliarius in semetipso. ⁴¹⁸ ⁹ A consiliario conserva animam tuam: prius scito quæ sit illius necessitas: et ipse enim animo suo cogitabit: ¹⁰ ne forte mittat sudem in terram, et dicat tibi: ¹¹ Bona est via tua: et stet e contrario videre quid tibi eveniat. ¹² Cum viro irreligioso tracta de sanctitate, et cum injusto de justitia, et cum muliere de ea quæ æmulatur, cum timido de bello, cum negotiatore de traiectione, cum emptore de venditione, cum viro livido de gratiis agendis, ¹³ cum impio de pietate, cum inhonesto de honestate, cum operario agrario de omni opere, ¹⁴ cum operario annuali de consummatione anni, cum servo pigro de multa operatione. Non attendas his in omni consilio: ⁴¹⁹ ¹⁵ sed cum viro sancto assiduus esto, quemcumque cognoveris observantem timorem Dei: ¹⁶ cujus anima est secundum animam tuam, et qui, cum titubaveris in tenebris, condolebit tibi. ¹⁷ Cor boni consilii statue tecum: non est enim tibi aliud pluris illo. ¹⁸ Anima viri sancti enuntiat aliquando vera, quam septem circumspectores sedentes in excelso ad speculandum. ⁴²⁰ ¹⁹ Et in his omnibus deprecare Altissimum, ut dirigat in veritate viam tuam.] ²⁰ [Ante omnia opera verbum verax præcedat te, et ante omnem actum consilium stabile. ²¹ Verbum nequam immutabit cor: ex quo partes quatuor oriuntur: bonum et malum, vita et mors: et dominatrix illorum est assidua lingua. Est vir astutus multorum eruditor, et animæ suæ inutilis est. ²² Vir peritus multos erudit, et animæ suæ suavis est. ⁴²¹ ²³ Qui sophisticè loquitur odibilis est: in omni re defraudabitur. ²⁴ Non est illi data a Domino gratia,

⁴¹⁴ + **37.1 Omnis amicus.** RAB. Superius diligentius expressit verum amicum et falsum, dicens: Et non permanebit in die tribulationis.

⁴¹⁵ + **37.2 Sodalibus autem.** Verus amicus toto animo diligit, et opere proficit. Unde, Non diligamus verbo neque lingua, sed opere et veritate I Joan. 3..

⁴¹⁶ + **37.3 O Præsumptio.** Detestatur hypocrisim, cum malus se bonum esse simulat cooperiendo aridam malitiam, in qua scilicet non est pinguedo charitatis vel misericordiæ.

⁴¹⁷ + **37.5 Causa ventris.** Pro gula, non pro amicitia. Possunt in falsis amicis hæretici intelligi, qui omnia recte faciunt, quasi animarum consultores, cum sint proditores. Unde, Attendite a falsis prophetis qui Matth. 7., etc. Cum socero. Socer, qui a parte feminea est cognatus, muliebrem et mutabilem ostendit animum, similiter et zelus qui præcipue est animarum.

⁴¹⁸ + **37.8 Omnis consiliarius.** Adhuc docet cautelam omnem habendam in suscipiendis amicis et consiliariis. Multi enim se amicos et consiliarios fingunt, et insidias tendunt. Unde Jeremias, Unusquisque se a proximo suo custodiat Jer. 9..

⁴¹⁹ + **37.14 Non attendite.** RAB. Diversas species consiliantium enumeravit, in quibus plures personas notavit, quæ a veritate discordant. Unde præcepit cum talibus non esse consiliandum, quorum consilium periclitatur. Prævidenda est ergo consiliarii prudentia, fides, voluntas, et religio.

⁴²⁰ + **37.18 Anima sancti viri.** Consiliorum, diversitate ostensa, adjungit, quantum humanæ sapientiæ sanctorum excellat scientia a Spiritu sancto infusa.

⁴²¹ + **37.22 Vir peritus.** Quia de lingua prædixerat: de bonis malisque doctoribus continuat.

omni enim sapientia defraudatus est. ²⁵ Est sapiens animæ suæ sapiens, et fructus sensus illius laudabilis. ²⁶ Vir sapiens plebem suam erudit, et fructus sensus illius fideles sunt. ²⁷ Vir sapiens implebitur benedictionibus, et videntes illum laudabunt. ²⁸ Vita viri in numero dierum: dies autem Israël innumerabiles sunt. ⁴²² ²⁹ Sapiens in populo hæreditabit honorem, et nomen illius erit vivens in æternum.] ³⁰ [Fili, in vita tua tenta animam tuam, et si fuerit nequam non des illi potestatem: ³¹ non enim omnia omnibus expediunt, et non omni animæ omne genus placet. ³² Noli avidus esse in omni epulatione, et non te effundas super omnem escam: ⁴²³ ³³ in multis enim escis erit infirmitas, et aviditas appropinquabit usque ad choleram. ³⁴ Propter crapulam multi obierunt: qui autem abstinens est adjiciet vitam.]

38[Honora medicum propter necessitatem: etenim illum creavit Altissimus. ⁴²⁴ ² A Deo est enim omnis medela, et a rege accipiet donationem. ³ Disciplina medici exaltabit caput illius, et in conspectu magnatorum collaudabitur. ⁴ Altissimus creavit de terra medicamenta, et vir prudens non abhorrebit illa. ⁵ Nonne a ligno indulcata est aqua amara? ⁴²⁵ ⁶ Ad agnitionem hominum virtus illorum: et dedit hominibus scientiam Altissimus, honorari in mirabilibus suis. ⁷ In his curans mitigabit dolorem: et unguentarius faciet pigmenta suavitatis, et unctiones conficiet sanitatis: et non consummabuntur opera ejus. ⁴²⁶ ⁸ Pax enim Dei super faciem terræ. ⁹ Fili, in tua infirmitate ne despicias teipsum: sed ora Dominum, et ipse curabit te. ¹⁰ Averte a delicto, et dirige manus, et ab omni delicto munda cor tuum. ⁴²⁷ ¹¹ Da suavitatem et memoriam similaginis, et impingua oblationem, et da locum medico: ⁴²⁸ ¹² etenim illum Dominus creavit, et non discedat a te, quia opera ejus sunt necessaria. ¹³ Est enim tempus quando in manus illorum incurras: ¹⁴ ipsi vero Dominum deprecabuntur, ut dirigat requiem eorum, et sanitatem, propter conversationem illorum. ¹⁵ Qui delinquit in conspectu ejus qui fecit eum, incidet in manus medici.] ⁴²⁹ ¹⁶ [Fili, in

⁴²² + **37.28 Vita viri.** ID. Præsens vita hominum in incerto non est apud eum. Unde, Breves dies hominis sunt, numerus mensium apud te est Job. 14..

⁴²³ + **37.32 Noli avidus.** Juxta historiam, parcimoniam laudat, crapulam vituperat, quæ ad infirmitatem perducit devorantem. Mystice vero admonet, ut in temporalibus simus temperantes. Unde, Mel invenisti, comede quod sufficit tibi Prov. 25., etc. Et alibi: Non plus sapere quam oportet Rom. 12..

⁴²⁴ + **38.1 Honora medicum.** RAB. Discretos vult nos esse, etc., usque ad utriusque ergo honorandi, sed spirituales præferendi.

⁴²⁵ + **38.5 Nonne a ligno.** Antiquam tangit historiam quia in deserto Sur invenerunt filii Israël aquam amaram, sed Deus ostendit Moysi lignum, quod immissum aquam indulcavit; ubi juxta historiam demonstratur ligni medicina indulcari aquas Mystice autem aqua amara significat legem, cui si confessio crucis et sacramentum jungatur, potabilis efficitur.

⁴²⁶ + **38.7 In his curans.** ID. Contra diversas infirmitates, diversa opponunt medici, cibos scilicet et potus, emplastra, et unguenta: ut morbis conveniant medicamenta. Similiter faciunt medici spirituales.

⁴²⁷ + **38.10 Averte.** Simile est illud: Declina a malo, et fac bonum. Et ab omni, etc., et non tantum corpus, sed ut sis innocens manibus et mundo corde.

⁴²⁸ + **38.11 Da suavitatem.** Panis et vini sacrificium in memoriam Dominicæ passionis oblatum, præcipue curat vulnera animarum nec solum vivis, sed et mortuis valde necessarium est.

⁴²⁹ + **38.15 Incidet in manus medici.** ID. Ægritudinis et molestiæ, etc., usque ad et instanter

mortuum produc lacrimas, et quasi dira passus incipe plorare: et secundum iudicium contege corpus illius, et non despicias sepulturam illius. ⁴³⁰ ¹⁷ Propter delaturam autem amare fer luctum illius uno die, et consolare propter tristitiam: ¹⁸ et fac luctum secundum meritum ejus uno die, vel duobus, propter detractionem: ¹⁹ a tristitia enim festinat mors, et cooperit virtutem, et tristitia cordis flectit cervicem. ²⁰ In abductione permanet tristitia, et substantia inopis secundum cor ejus. ²¹ Ne dederis in tristitia cor tuum, sed repelle eam a te, et memento novissimorum. ⁴³¹ ²² Noli oblivisci, neque enim est conversio: et huic nihil proderis, et teipsum pessimabis. ⁴³² ²³ Memor esto iudicii mei: sic enim erit et tuum: mihi heri, et tibi hodie. ²⁴ In requie mortui requiescere fac memoriam ejus, et consolare illum in exitu spiritus sui.] ⁴³³ ²⁵ [Sapientia scribæ in tempore vacuitatis, et qui minoratur actu sapientiam percipiet, qua sapientia replebitur. ²⁶ Qui tenet aratrum, et qui gloriatur in jaculo, stimulo boves agitat, et conversatur in operibus eorum, et enarratio ejus in filiis taurorum. ⁴³⁴ ²⁷ Cor suum dabit ad versandos sulcos, et vigilia ejus in sagina vaccarum. ²⁸ Sic omnis faber et architectus, qui noctem tamquam diem transigit: qui sculpsit signacula sculptilia, et assiduitas ejus variat picturam: cor suum dabit in similitudinem picturæ, et vigilia sua perficiet opus. ⁴³⁵ ²⁹ Sic faber ferrarius sedens juxta incudem, et considerans opus ferri: vapor ignis uret carnes ejus, et in calore fornacis concertatur. ³⁰ Vox mallei innovat aurem ejus, et contra similitudinem vasis oculus ejus. ³¹ Cor suum dabit in consummationem operum, et vigilia sua ornabit in perfectionem. ³² Sic figulus sedens ad opus suum, convertens pedibus suis rotam, qui in sollicitudine positus est semper propter opus suum, et in numero est omnis operatio ejus. ³³ In brachio suo formabit lutum, et ante pedes suos curvabit virtutem suam. ⁴³⁶ ³⁴ Cor suum dabit ut consummet linitionem, et vigilia sua mundabit fornacem. ³⁵ Omnes hi in manibus suis speraverunt, et unusquisque in arte sua sapiens est. ³⁶ Sine his omnibus non ædificatur civitas, ³⁷ et non inhabitabunt, nec

Dominum deprecantur ut dirigat opera eorum, et refrigerium præstet infirmantibus.

⁴³⁰ + **38.16 Fili,** etc. Quia de infirmitatibus, et medicorum curationibus disputavit, de mortuorum exsequiis adjungit.

⁴³¹ + **38.21 Memento novissimorum.** ID. Ad monitio bonorum patrum ut filii præparent sibi viaticum bonorum operum.

⁴³² + **38.22 Neque enim est conversio.** Quasi diceret: Ergo cautus esto in omnibus, ne forte in obitu proximi plus æquo doleas.

⁴³³ + **38.24 In requie.** Quasi: Morituri memoriam continuo conserva, et confide, et spe conforta, ne in ultimo articulo deficiat.

⁴³⁴ + **38.26 Qui tenet aratrum.** Prædicatores sanctos significat, qui omni tempore docendo, exhortando, auditores suos instruunt ut interioris hominis virtutem eliciant, et animam humanam ad imaginem Dei reformant. Unde, Ut sapiens architectus fundamentum posui I Cor. 3.. Et alibi: Filioli mei quos iterum parturio, donec formetur in vobis Christus Gal. 4.. Quot species virtutum sunt, tot operationes et documenta mentibus electorum doctrina imprimunt.

⁴³⁵ + **38.28 Sic omnis faber,** etc. Ordo prædicatorum, qui per diversa officia ministerium suum agunt, doctrinam secundum auditores temperant: qui fragiles et infirmos verbis et exemplo formant, ut vasa in honorem faciant. Cor suum dabit. Cum præsentis vitæ volubilem conversationem per vestigia bonorum operum subjectis ostendit immutabilem.

⁴³⁶ + **38.33 In brachio suo.** RAB. Quia multis exemplis, etc., usque ad ut in fornace cordis operationem discipulorum igne solidet charitatis.

inambulabunt, et in ecclesiam non transilient. ³⁸ Super sellam iudicis non sedebunt, et testamentum iudicii non intelligent, neque palam facient disciplinam et iudicium, et in parabolis non inveniuntur: ³⁹ sed creaturam ævi confirmabunt: et deprecatio illorum in operatione artis, accomodantes animam suam, et conquirentes in lege Altissimi.]

39[Sapientiam omnium antiquorum exquiret sapiens, et in prophetis vacabit. ² Narrationem virorum nominatorum conservabit, et in versutias parabolarum simul introibit. ³ Occulta proverbiorum exquiret, et in absconditis parabolarum conversabitur. ⁴ In medio magnatorum ministrabit, et in conspectu præsidis apparebit. ⁵ In terram alienigenarum gentium pertransiet: bona enim et mala in hominibus tentabit. ⁶ Cor suum tradet ad vigilandum diluculo ad Dominum, qui fecit illum, et in conspectu Altissimi deprecabitur. ⁷ Aperiet os suum in oratione, et pro delictis suis deprecabitur. ⁸ Si enim Dominus magnus voluerit, spiritu intelligentiæ replebit illum: ⁹ et ipse tamquam imbres mittet eloquia sapientiæ suæ, et in oratione confitebitur Domino: ¹⁰ et ipse dirigit consilium ejus, et disciplinam, et in absconditis suis consiliabitur. ¹¹ Ipse palam faciet disciplinam doctrinæ suæ, et in lege testamenti Domini gloriabitur. ¹² Collaudabunt multi sapientiam ejus, et usque in sæculum non delebitur. ¹³ Non recedet memoria ejus, et nomen ejus requiretur a generatione in generationem. ¹⁴ Sapientiam ejus enarrabunt gentes, et laudem ejus enuntiabit ecclesia. ¹⁵ Si permanserit, nomen derelinquet plus quam mille: et si requieverit, proderit illi.] ⁴³⁷ ¹⁶ [Adhuc consiliabor ut enarrem: ut furore enim repletus sum. ¹⁷ In voce dicit: Obaudite me, divini fructus, et quasi rosa plantata super rivos aquarum fructificate. ⁴³⁸ ¹⁸ Quasi Libanus odorem suavitatis habete. ¹⁹ Florete flores quasi lilium: et date odorem, et frondete in gratiam: et collaudate canticum, et benedicite Dominum in operibus suis. ²⁰ Date nomini ejus magnificentiam, et confitemini illi in voce labiorum vestrorum, et in canticis labiorum, et citharis: et sic dicetis in confessione: ⁴³⁹ ²¹ Opera Domini universa bona valde. ²² In verbo ejus stetit aqua sicut congeries: et in sermone oris illius sicut exceptoria aquarum: ⁴⁴⁰ ²³ quoniam in præcepto ipsius placor fit, et non est minoratio in salute ipsius. ²⁴ Opera omnis carnis coram illo, et non est quidquam absconditum ab oculis ejus. ⁴⁴¹ ²⁵ A sæculo usque in sæculum respicit, et nihil est mirabile in conspectu ejus. ²⁶ Non est dicere: Quid est hoc, aut quid est

⁴³⁷ + **39.15 Si permanserit.** RAB. Christi, cujus sunt membra, a suo habent omnia: qui est virtus et sapientia Patris.

⁴³⁸ + **39.17 Obaudite me.** ID. Intelligite doctrinam meam, mentes electorum per baptismum generatæ, et fructum martyrii facite in decursu mortalis vitæ.

⁴³⁹ + **39.20 Et citharis.** ID. Unde: Confitemini Domini in cithara Psal. 32.. Cithara est ligni ventris in imo concavitas, etc., usque ad quæ secundum formam psalterii de superius ad nos conveniunt.

⁴⁴⁰ + **39.22 In verbo ejus.** ID. Quando congregavit aquas, etc., usque ad vel aqua persecutionis, Dei dispensatione restringitur.

⁴⁴¹ + **39.24 Opera omnis carnis.** Præsentia Dei antecedit omnia, et quidquid fit temporaliter ei sine tempore præsens est. Nihil ergo novum, neque mutabile est in conspectu ejus Act. 1..

istud? omnia enim in tempore suo quærentur. ⁴⁴² ²⁷ Benedictio illius quasi fluvius inundavit. ⁴⁴³ ²⁸ Quomodo cataclysmus aridam inebriavit, sic ira ipsius gentes quæ non exquisierunt eum hæreditabit. ²⁹ Quomodo convertit aquas in siccitatem, et siccata est terra, et viæ illius viis illorum directæ sunt, sic peccatoribus offensiones in ira ejus. ³⁰ Bona bonis creata sunt ab initio: sic nequissimis bona et mala. ³¹ Initium necessariæ rei vitæ hominum, aqua, ignis, et ferrum, sal, lac, et panis similagineus, et mel, et botrus uvæ, et oleum, et vestimentum. ⁴⁴⁴ ³² Hæc omnia sanctis in bona, sic et impiis et peccatoribus in mala convertentur. ³³ Sunt spiritus qui ad vindictam creati sunt, et in furore suo confirmaverunt tormenta sua. ³⁴ In tempore consummationis effundent virtutem, et furorem ejus qui fecit illos placabunt. ³⁵ Ignis, grando, fames, et mors, omnia hæc ad vindictam creata sunt: ⁴⁴⁵ ³⁶ bestiarum dentes, et scorpium, et serpentes, et rhomphæa vindicans in exterminium impios. ³⁷ In mandatis ejus epulabuntur: et super terram in necessitatem præparabuntur, et in temporibus suis non præterient verbum. ⁴⁴⁶ ³⁸ Propterea ab initio confirmatus sum, et consiliatus sum, et cogitavi, et scripta dimisi. ⁴⁴⁷ ³⁹ Omnia opera Domini bona, et omne opus hora sua subministrabit. ⁴⁰ Non est dicere: Hoc illo nequius est: omnia enim in tempore suo comprobabuntur. ⁴⁴⁸ ⁴¹ Et nunc in omni corde et ore collaudate, et benedicite nomen Domini.] ⁴⁴⁹

40[Occupatio magna creata est omnibus hominibus, et jugum grave super filios Adam, a die exitus de ventre matris eorum usque in diem sepulturæ in matrem omnium. ² Cogitationes eorum, et timores cordis, adinventio expectationis, et dies finitionis, ⁴⁵⁰ ³ a residente super sedem gloriosam, usque ad humiliatum in terra et cinere: ⁴ ab eo qui utitur hyacintho et portat coronam, usque ad eum qui operitur lino crudo: furor, zelus, tumultus, fluctuatio, et timor mortis, iracundia perseverans, et contentio: ⁵ et in

⁴⁴² + **39.26 Non est dicere,** etc. Prohibet nos esse curiosos, et perscrutari quæ scire non convenit. Omnia enim in tempore suo manifestabuntur, cum illuminabit Dominus abscondita tenebrarum, et manifestabit consilia cordium.

⁴⁴³ + **39.27 Benedictio,** etc. Sicut post diluvii effusionem aquæ redibant, ut appareret arida et germinaret; sic post extinctionem impiorum, datur electis facultas fructificandi.

⁴⁴⁴ + **39.31 Initium necessariæ.** Ante diluvium, fructu terræ naturali cibo nutriebantur homines, nedum erant concessæ carnes.

⁴⁴⁵ + **39.35 Ignis, grando.** RAB. Omnia homini ante peccatum obediebant; post peccatum vero pugnat contra eum orbis terrarum. Inde fames et mors, et mille pericula mortis, bestię quoque contra cum sæviunt, et rhomphæa cœlestis vindictæ.

⁴⁴⁶ + **39.37 In mandatis.** Quia juxta supernam sententiam, in tempore opportuno digna ultio peccatores vastabit.

⁴⁴⁷ + **39.38 Propterea ab initio, confirmatus sum.** Ad superiora respicit, ubi ait: Non est dicere, etc. Videt enim incomprehensibilia Dei judicia, et investigabiles vias, nec audet inde aliquid temere loqui vel scribere: sed temperate de his disputans, non causam, sed modum divino consilio manifestum dimisit.

⁴⁴⁸ + **39.40 Non est dicere.** Utile dat consilium, ut opera ei non incaute discutiamus, sed Creatorem in omnibus laudemus et benedicamus.

⁴⁴⁹ + **39.41 Et nunc in omni tempore suo.** Quasi dicat: Ne dicas priora tempora meliora fuisse quam nunc sunt. Virtutes faciunt dies bonos, vitia malos.

⁴⁵⁰ + **40.2 Cogitationes.** RAB. Enumerat mala quæ homo pro peccatis sustinet.

tempore refectionis in cubili, somnus noctis immutat scientiam ejus. ⁶
 Modicum tamquam nihil in requie, et ab eo in somnis, quasi in die respectus.
⁴⁵¹ ⁷ Conturbatus est in visu cordis sui, tamquam qui evaserit in die belli:
 in tempore salutis suæ exsurrexit, et admirans ad nullum timorem: ⁴⁵² ⁸
 cum omni carne, ab homine usque ad pecus, et super peccatores septuplum.
⁹ Ad hæc mors, sanguis, contentio, et rhomphæa, oppressiones, fames, et
 contritio, et flagella: ¹⁰ super iniquos creata sunt hæc omnia: et propter illos
 factus est cataclysmus.] ⁴⁵³ ¹¹ [Omnia quæ de terra sunt in terram
 convertentur, et omnes aquæ in mare revertentur. ⁴⁵⁴ ¹² Omne munus et
 iniquitas delebitur, et fides in sæculum stabit. ¹³ Substantiæ injustorum
 sicut fluvius siccabuntur, et sicut tonitruum magnum in pluvia personabunt.
⁴⁵⁵ ¹⁴ In aperiendo manus suas lætabitur: sic prævaricatores in
 consummatione tabescent. ¹⁵ Nepotes impiorum non multiplicabunt ramos:
 et radices immundæ super cacumen petræ sonant. ⁴⁵⁶ ¹⁶ Super omnem
 aquam viriditas, et ad oram fluminis ante omne fœnum evelletur.] ¹⁷
 [Gratia sicut paradus in benedictionibus, et misericordia in sæculum
 permanet. ¹⁸ Vita sibi sufficientis operarii condulcabitur, et in ea invenies
 thesaurum. ⁴⁵⁷ ¹⁹ Filii et ædificatio civitatis confirmabit nomen: et super
 hæc mulier immaculata computabitur. ²⁰ Vinum et musica lætificant cor: et
 super utraque dilectio sapientiæ. ⁴⁵⁸ ²¹ Tibiæ et psalterium suavem faciunt
 melodiam: et super utraque lingua suavis. ²² Gratiam et speciem desiderabit
 oculus tuus: et super hæc virides sationes. ⁴⁵⁹ ²³ Amicus et sodalis in
 tempore convenientes, et super utrosque mulier cum viro. ²⁴ Fratres in
 adiutorium in tempore tribulationis: et super eos misericordia liberabit. ²⁵
 Aurum et argentum est constitutio pedum: et super utrumque consilium
 beneplacitum. ²⁶ Facultates et virtutes exaltant cor, et super hæc timor
 Domini. ⁴⁶⁰ ²⁷ Non est in timore Domini minoratio: et non est in eo

⁴⁵¹ + **40.6 Modicum.** Quia caro mortua et insensibilis ad tempus requiescere videtur, anima jam sentit dolorem, et post resurrectionem cum corpore suo in pœnis vivet æternis.

⁴⁵² + **40.7 Conturbatus est.** ID. Ideo mali cruciabantur in pœna, etc., usque ad nobilium scilicet et ignobilium.

⁴⁵³ + **40.10 Et propter illos factus est cataclysmus.** Peccanti homini multiplex pœna deputata est, ut correctus pœniteat, et deinceps caveat; sed quia negligit, et in pœnis proficit, inducit Deus diluvium orbi, ut hominem deleret quem creavit. Ad comparationem vero futuræ pœnæ nihil est quod homo patitur in præsentia.

⁴⁵⁴ + **40.11 Et aquæ omnes.** ID. Opera scilicet peccatorum supernæ mercedis fructum non acquirunt, sed pœnarum interitum.

⁴⁵⁵ + **40.13 Substantiæ injustorum.** Inchoant germinare, sed fluctuant in tentatione, et subito arescunt ad primum persecutionis æstum.

⁴⁵⁶ + **40.15 Nepotes impiorum non multi.** Sæpe videmus progeniem impiorum cito deficere, maxime cum filii imitantur iniquitatem patrum.

⁴⁵⁷ + **40.18 Vita sibi sufficientis.** Dulcis est somnus operanti, sive parum, sive multum comedat. Invenies thesaurum. Vere enim Christianum se esse probat, qui Christi mandata credit et facit.

⁴⁵⁸ + **40.20 Vinum et musica lætificant cor.** Hæc naturaliter mulcent et exhilarant animam, sed dilectio sapientiæ et lingua suaviter docens multo plus confortat intellectum.

⁴⁵⁹ + **40.22 Gratiam et speciem desiderabit oculus.** Ornatum scilicet templi et culturæ diversitatem, quæ prior populus sub lege habuit, prædicatio Evangelii in orbe seminata, bonorum operum virore excellit

⁴⁶⁰ + **40.26 Facultates et virtutes.** RAB. Divitiæ datæ in Domino, etc., usque ad et hæc et

inquirere adiutorium. ²⁸ Timor Domini sicut paradisi benedictionis, et super omnem gloriam operuerunt illum.] ²⁹ [Fili, in tempore vitæ tuæ ne indigeas: melius est enim mori quam indigere. ³⁰ Vir respiciens in mensam alienam, non est vita ejus in cogitatione victus: alit enim animam suam cibus alienis: ⁴⁶¹ ³¹ vir autem disciplinatus et eruditus custodiet se. ³² In ore imprudentis condulcabitur inopia, et in ventre ejus ignis ardebit.] ⁴⁶²

41 [O mors, quam amara est memoria tua homini pacem habenti in substantiis suis: ⁴⁶³ ² viro quieto, et cujus viæ directæ sunt in omnibus, et adhuc valenti accipere cibum ! ³ O mors, bonum est iudicium tuum homini indigenti, et qui minoratur viribus, ⁴ defecto ætate, et cui de omnibus cura est, et incredibili, qui perdit patientiam ! ⁵ Noli metuere iudicium mortis: memento quæ ante te fuerunt, et quæ superventura sunt tibi: hoc iudicium a Domino omni carni. ⁴⁶⁴ ⁶ Et quid superveniet tibi in beneplacito Altissimi? sive decem, sive centum, sive mille anni: ⁷ non est enim in inferno accusatio vitæ.] ⁸ [Fili abominationum fiunt filii peccatorum, et qui conversantur secus domos impiorum. ⁴⁶⁵ ⁹ Filiorum peccatorum periet hæreditas, et cum semine illorum assiduitas opprobrii. ¹⁰ De patre impio queruntur filii, quoniam propter illum sunt in opprobrio. ⁴⁶⁶ ¹¹ Væ vobis, viri impii, qui dereliquistis legem Domini Altissimi ! ¹² Et si nati fueritis, in maledictione nasceamini: et si mortui fueritis, in maledictione erit pars vestra. ¹³ Omnia quæ de terra sunt in terram convertentur: sic impii a maledicto in perditionem. ⁴⁶⁷ ¹⁴ Luctus hominum in corpore ipsorum: nomen autem impiorum delebitur. ¹⁵ Curam habe de bono nomine: hoc enim magis permanebit tibi quam mille thesauri pretiosi et magni. ⁴⁶⁸ ¹⁶ Bonæ vitæ numerus dierum: bonum autem nomen permanebit in ævum.] ¹⁷ [Disciplinam in pace conservate, filii: sapientia enim abscondita, et thesaurus invisus, quæ utilitas in utrisque? ¹⁸ Melior est homo qui abscondit stultitiam

omnes facultates mundi.

⁴⁶¹ + **40.30 Vir respiciens.** Stultum est enim otiari, et de alieno labore mercedem quærere. Percipiet enim unusquisque secundum opera sua.

⁴⁶² + **40.32 In ore imprudentis conculcabitur inopia,** etc. Cui placet otiose torpere, nec proximis docendo prodesse, tandem doloribus inferni et sera poenitentia æstuabit.

⁴⁶³ + **41.1 O mors,** etc. RAB. Qui prosperitatem mundi et divitias amat, amara est illi mors corporalis, quia futuræ vitæ gaudia negligit.

⁴⁶⁴ + **41.5 Hoc iudicium.** ID. Commune est omni carni, nec quisquam evadere potest, etiamsi centum aut mille annos vixerit aut ultra; unde: Quis est homo qui vivet, et non videbit mortem? Psal. 88.

⁴⁶⁵ + **41.8 Filii abominationum.** Abominabiles sunt filii peccatorum, qui scilicet, impios patres imitati sunt.

⁴⁶⁶ + **41.10 De patre impio.** Qui male filios nutrit, vel exemplo perdit, reus est eorum perditionis. Vel, qui mala opera de prava voluntate gignit, damnabitur pro eis

⁴⁶⁷ + **41.13 In perditionem.** Superioribus respondet, in quibus de morte temporali disputavit: quia sicut homo de terra creatus pro peccato originali in terram redit, quamvis in incorruptione surrecturus; sic impii pro peccatis suis maledicti, in æternam perditionem cum corpore et anima ibunt.

⁴⁶⁸ + **41.15 Curam habe de bono nomine,** etc. Ut bene et religiose vivas. Sic autem acquiritur bonum nomen.

suam, quam homo qui abscondit sapientiam suam. ⁴⁶⁹ ¹⁹ Verumtamen reveremini in his quæ procedunt de ore meo: ⁴⁷⁰ ²⁰ non est enim bonum omnem reverentiam observare, et non omnia omnibus bene placent in fide. ⁴⁷¹ ²¹ Erubescite a patre et a matre de fornicatione: et a præsidente et a potente de mendacio: ²² a principe et a iudice de delicto: a synagoga et plebe de iniquitate: ²³ a socio et amico de injustitia, et de loco in quo habitas: ²⁴ de furto, de veritate Dei, et testamento: de discubitu in panibus, et ab obfuscatione dati et accepti: ²⁵ a salutantibus de silentio, a respectu mulieris fornicariæ, et ab aversione vultus cognati. ²⁶ Ne avertas faciem a proximo tuo, et ab auferendo partem et non restituendo. ⁴⁷² ²⁷ Ne respicias mulierem alieni viri, et ne scruteris ancillam ejus, neque steteris ad lectum ejus. ⁴⁷³ ²⁸ Ab amicis de sermonibus improprietatis: et cum dederis, ne improprietes.]

42[Non duplices sermonem auditus de revelatione sermonis absconditi: et eris vere sine confusione, et invenies gratiam in conspectu omnium hominum. Ne pro his omnibus confundaris, et ne accipias personam ut delinquas: ⁴⁷⁴ ² de lege Altissimi, et testamento, et de iudicio justificare impium, ³ de verbo sociorum et viatorum, et de datione hæreditatis amicorum, ⁴ de æqualitate stateræ et ponderum, de acquisitione multorum et paucorum, ⁴⁷⁵ ⁵ de corruptione emptionis et negotiatorum, et de multa disciplina filiorum, et servo pessimo latus sanguinare. ⁴⁷⁶ ⁶ Super mulierem nequam bonum est signum. ⁷ Ubi manus multæ sunt, claude: et quodcumque trades, numera et appende: datum vero et acceptum omne describe. ⁴⁷⁷ ⁸ De disciplina insensati et fatui, et de senioribus qui judicantur ab adolescentibus: et eris

⁴⁶⁹ + **41.18 Melior est homo qui abscondit stultitiam suam,** etc. Qui abscondet frumentum, maledicetur in populis, benedictio autem super caput vendentium.

⁴⁷⁰ + **41.19 Verumtamen revertimini in his quæ procedunt.** Quia bonum nomen et bonam et vitam utilem esse prædixit, et occultantes scientiam reprehendit, suadet ut revertantur ad studium docendi, quia non est bonum irreverentem et inobedientem esse suo doctori.

⁴⁷¹ + **41.20 Non est bonum omnem irreverentiam observare.** Juxta litteram, nos instruit ut a vitiis caveamus, et virtutibus operam demus, et ne spretis melioribus, eligamus pejora, quæ sequitur confusio sempiterna.

⁴⁷² + **41.26 Non avertas faciem tuam a proximo tuo,** etc. RAB. Cum angeli colligent de Ecclesia omnia scandala, etc., usque ad et fornicationibus hæreticorum se miscuit.

⁴⁷³ + **41.27 Ne respicias mulierem alieni viri,** etc. Cupiditatem carnalem quæ debet subesse spiritui, hanc non debemus scrutari et suggestionibus ejus subjici.

⁴⁷⁴ + **42.1 Non duplices sermonem,** etc. RAB. Prohibet de occulto cordis bonum et malum simul dicere; unde: Nunquid fons de eodem foramine emanat dulcem et amaram aquam?

⁴⁷⁵ + **42.4 De æqualitate stateræ,** etc. ID. Ubi sequenda est æquitas, etc., usque ad subjectos quoque cum discretione disciplinæ regamus. De æqualitate stateræ. Quantum hypocrisis et dolus Domino displiceat ostenditur his verbis: Statera dolosa abominatio est apud Deum. Qui aliter causam pauperis quam potentis librat; vel sua errata leviora quam aliorum putat; vel qui imponunt in humeros hominum onera importabilia; vel qui bona in publico, mala in occulto agit, abominabilis est Domino.

⁴⁷⁶ + **42.5 Et servo pessimo.** Significat servum qui verbis non corrigitur, verberibus esse coercendum. Servus quoque vitiorum severa disciplina corrigendus est.

⁴⁷⁷ + **42.7 Ubi manus multæ,** etc. Admonet ubi diversæ sunt voluntates spirituali lucro inhiantes, caute esse dispensandum. Alii enim tentandi, alii discendi voto quærunt verbum, sed non omnia omnibus conveniunt.

eruditus in omnibus, et probabilis in conspectu omnium vivorum.]⁴⁷⁸ ⁹
 [Filia patris abscondita est vigilia, et sollicitudo ejus aufert somnum: ne forte
 in adolescentia sua adulta efficiatur, et cum viro commorata odibilis fiat:⁴⁷⁹
¹⁰ nequando polluatur in virginitate sua, et in paternis suis gravida
 inveniatur: ne forte cum viro commorata transgrediatur, aut certe sterilis
 efficiatur. ¹¹ Super filiam luxuriosam confirma custodiam, nequando faciat
 te in opprobrium venire inimicis, a detractioe in civitate, et objectione
 plebis, et confundat te in multitudine populi.⁴⁸⁰ ¹² Omni homini noli
 intendere in specie, et in medio mulierum noli commorari: ¹³ de vestimentis
 enim procedit tinea, et a muliere iniquitas viri. ¹⁴ Melior est enim iniquitas
 viri quam mulier benefaciens, et mulier confundens in opprobrium.]⁴⁸¹ ¹⁵
 [Memor ero igitur operum Domini, et quæ vidi annuntiabo. In sermonibus
 Domini opera ejus.⁴⁸² ¹⁶ Sol illuminans per omnia respexit, et gloria
 Domini plenum est opus ejus. ¹⁷ Nonne Dominus fecit sanctos enarrare
 omnia mirabilia sua, quæ confirmavit Dominus omnipotens stabiliri in gloria
 sua? ¹⁸ Abyssum et cor hominum investigavit, et in astutia eorum
 excogitavit. ¹⁹ Cognovit enim Dominus omnem scientiam, et inspexit in
 signum ævi, annuntians quæ præterierunt et quæ superventura sunt, revelans
 vestigia occultorum.⁴⁸³ ²⁰ Non præterit illum omnis cogitatus, et non
 abscondit se ab eo ullus sermo. ²¹ Magnalia sapientiæ suæ decoravit, qui est
 ante sæculum et usque in sæculum: neque adjectum est,⁴⁸⁴ ²² neque
 minuitur, et non eget alicujus consilio. ²³ Quam desiderabilia omnia opera
 ejus ! et tamquam scintilla quæ est considerare !⁴⁸⁵ ²⁴ Omnia hæc vivunt,
 et manent in sæculum, et in omni necessitate omnia obaudiunt ei. ²⁵ Omnia
 duplicia, unum contra unum, et non fecit quidquam deesse.⁴⁸⁶ ²⁶
 Uniuscujusque confirmavit bona: et quis satiabitur videns gloriam ejus?]

⁴⁷⁸ + **42.8 De disciplina.** Qui congrua disciplina unumquemque arguit, eruditum se et probabilem doctorem in conspectu sanctorum ostendit. Nec ætas juvenilis in doctore despicenda, quem vita et discretio commendat.

⁴⁷⁹ + **42.9 Filia patris.** RAB. Mystice filia patris, etc., usque ad vel transgrediatur legem Dei facta sterilis in omnibus bonis. Filia patris. Docet, ad litteram, parentes sobolis suæ curam gerere, et cum disciplina nutrire, et ne lasciviæ et voluptati frena relaxent.

⁴⁸⁰ + **42.11 Super filiam luxuriosam,** etc. Quæ diligentem quærit custodiam. Si enim dimittitur suæ voluntati, doctorem confundit et in multitudine populi erubescere facit. Unde, periculose tibi ministrat, cujus vultum frequenter attendis. Nam impudici oculi non norunt animæ pulchritudinem considerare, sed corporum.

⁴⁸¹ + **42.14 Melior est enim iniquitas viri,** etc. ID. Mulier aut sexum significat, etc., usque ad quia res confusione dignas gerit.

⁴⁸² + **42.15 Memor ero igitur operum,** etc. ID. Hucusque de diversis rebus disputavit, etc., usque ad et postea patrum fortia facta describit.

⁴⁸³ + **42.19 Cognovit enim Dominus,** etc. Quia omnes ætates mundi præsentis sunt ei, apud quem nihil præteritum, nihil futurum est; ipse solus revelat mysteria, qui scit singulorum corda, qui omnes cogitatus et sermones inspicit.

⁴⁸⁴ + **42.21 Magnalia sapientiæ.** Quando prophetis scilicet et apostolis sacramentum consilii sui absconditum a sæculis et generationibus fidelibus revelavit. Ipse enim est ante omnes, et post omnes, cui nihil additur, nihil minuitur.

⁴⁸⁵ + **42.23 Et tanquam scintilla.** Tanquam scintillam in opera Dei consideramus, quia vix parvam notitiam inde percipimus.

⁴⁸⁶ + **42.25 Omnia duplicia,** etc. RAB. Ita ordinavit Deus omnia, ut quæ sibi videntur esse contraria convenient, ut elementa vel quatuor tempora.

43[Altitudinis firmamentum pulchritudo ejus est, species cæli in visione gloriæ. ⁴⁸⁷ ² Sol in aspectu annuntians in exitu, vas admirabile, opus Excelsi. ³ In meridiano exurit terram, et in conspectu ardoris ejus quis poterit sustinere? fornacem custodiens in operibus ardoris: ⁴⁸⁸ ⁴ tripliciter sol exurens montes, radios igneos exsufflans, et refulgens radiis suis obcæcat oculos. ⁵ Magnus Dominus qui fecit illum, et in sermonibus ejus festinavit iter.] ⁴⁸⁹ ⁶ [Et luna in omnibus in tempore suo, ostensio temporis, et signum ævi. ⁴⁹⁰ ⁷ A luna signum diei festi: luminare quod minuitur in consummatione. ⁴⁹¹ ⁸ Mensis secundum nomen ejus est, crescens mirabiliter in consummatione. ⁹ Vas castrorum in excelsis, in firmamento cæli resplendens gloriose. ⁴⁹² ¹⁰ Species cæli gloria stellarum: mundum illuminans in excelsis Dominus. ⁴⁹³ ¹¹ In verbis Sancti stabunt ad iudicium, et non deficient in vigiliis suis.] ⁴⁹⁴ ¹² [Vide arcum, et benedic eum qui fecit illum: valde speciosus est in splendore suo. ⁴⁹⁵ ¹³ Gyrauit cælum in circuitu gloriæ suæ: manus Excelsi aperuerunt illum. ⁴⁹⁶ ¹⁴ Imperio suo acceleravit nivem, et accelerat coruscationes emittere iudicii sui. ¹⁵ Propterea aperti sunt thesauri, et evolaverunt nebulæ sicut aves. ¹⁶ In magnitudine sua posuit nubes, et confracti sunt lapides grandinis. ⁴⁹⁷ ¹⁷ In conspectu ejus commovebuntur montes, et in voluntate ejus aspirabit notus. ⁴⁹⁸ ¹⁸ Vox tonitruum ejus verberavit terram, tempestas aquilonis, et congregatio spiritus: ⁴⁹⁹ ¹⁹ et sicut avis deponens ad sedendum, aspergit nivem, et sicut locusta demergens descensus ejus. ²⁰ Pulchritudinem candoris ejus admirabitur

⁴⁸⁷ + **43.1 Altitudinis**, etc. ID. pulchritudo firmamenti, etc., usque ad nullus corporeis oculis divinitatis splendorem potest sufferre.

⁴⁸⁸ + **43.3 Fornacem custodiens**. Quia superbos, pro cogitatione, locutione, et operatione mala, excruciat æterna flamma.

⁴⁸⁹ + **43.5 Et in sermonibus ejus**, etc. ID. Mysticis verbis superbiorum ludit intellectum. Festinavit, etc. Cum in prædicatione Evangelii præparata est via salutis et aditus regni cœlestis.

⁴⁹⁰ + **43.6 Et luna**, etc. ID. Postquam de sole disputavit, etc., usque ad sed rectius aprili deputatur, quia in ipso vel incipit, vel desinit, vel totus includitur.

⁴⁹¹ + **43.7 Luminare quod minuitur**, etc. Luna non habet nativum splendorem, sed a sole accipit: sic et Ecclesia a Christo, quæ in persecutione videtur minui, sed in parte clarescit; crescit enim mirabiliter in consummatione.

⁴⁹² + **43.9 Vas castrorum**, etc. Quia in ipsa consistit multitudo fidelium, quæ in firmamento veritatis et divinæ prædicationis per totum orbem gloriose resplendet.

⁴⁹³ + **43.10 Species cœli**, etc. Ornatus Ecclesiæ, sanctorum plenitudo, quos Deus excelsus ordinavit, ut prædicatione Evangelii illustrarent. Hi in verbis sanctis et in doctrina veræ fidei permanentes, exspectant iudicium Dei.

⁴⁹⁴ + **43.11 In verbis**. Quia in patientia sua possident animas, præcincti lumbos; et lucernas tenentes in manibus suis, exspectant Dominum suum, quando revertatur a nuptiis.

⁴⁹⁵ + **43.12 Vide arcum**, etc. Scriptum Veteris vel Novi Testamenti. Hic fidelibus suave jugum ostenditur, contumacibus arma terribilia.

⁴⁹⁶ + **43.13 Gyrauit cœlum**, etc. Quando per virtutem et sapientiam Dei, id est, Christum, Vetus et Novum Testamentum conditum est.

⁴⁹⁷ + **43.16 Et confracti sunt lapides grandinis**. Doctores, qui terram humani cordis irrigant, et tempestatem increpationis in se gerunt, et in tempore effundunt, et confringunt lapides grandinis; increpando, scilicet duritiam pravi cordis lapident vitale gramen.

⁴⁹⁸ + **43.17 Aspirabit Notus**. RAB. Qui et Auster, etc., usque ad potentes ad Christiani nominis persecutionem, et aliquando ad poenitentiam.

⁴⁹⁹ + **43.18 Tempestas**. Varia tentamenta per malignos spiritus Deus irrogat, ut fervorem fidei et dilectionem frigescere faciant.

oculus, et super imbrem ejus expavesceat cor. ²¹ Gelu sicut salem effundet super terram: et dum gelaverit, fiet tamquam cacumina tribuli. ⁵⁰⁰ ²² Frigidus ventus aquilo flavit, et gelavit crystallus ab aqua: super omnem congregationem aquarum requiescet, et sicut lorica induet se aquis: ²³ et devorabit montes, et exuret desertum, et extinguet viride, sicut igne. ²⁴ Medicina omnium in festinatione nebulæ: et ros obvians ab ardore venienti humilem efficiet eum. ⁵⁰¹ ²⁵ In sermone ejus siluit ventus, et cogitatione sua placavit abyssum: et plantavit in illa Dominus insulas. ²⁶ Qui navigant mare enarrant pericula ejus, et audientes auribus nostris admirabimur. ⁵⁰² ²⁷ Illic præclara opera et mirabilia, varia bestiarum genera, et omnium pecorum, et creatura belluarum. ²⁸ Propter ipsum confirmatus est itineris finis, et in sermone ejus composita sunt omnia.] ²⁹ [Multa dicemus, et deficiemus in verbis: consummatio autem sermonum ipse est in omnibus. ³⁰ Gloriantes ad quid valebimus? ipse enim omnipotens super omnia opera sua. ³¹ Terribilis Dominus, et magnus vehementer, et mirabilis potentia ipsius. ³² Glorificantes Dominum quantumcumque potueritis, supervalebit enim adhuc: et admirabilis magnificentia ejus. ³³ Benedicentes Dominum, exaltate illum quantum potestis: major enim est omni laude. ³⁴ Exaltantes eum, replemini virtute, ne laboretis, non enim comprehendetis. ⁵⁰³ ³⁵ Quis videbit eum et enarrabit? et quis magnificabit eum sicut est ab initio? ³⁶ Multa abscondita sunt majora his: pauca enim vidimus operum ejus. ³⁷ Omnia autem Dominus fecit, et pie agentibus dedit sapientiam.]

44[Laudemus viros gloriosos, et parentes nostros in generatione sua. ⁵⁰⁴ ² Multam gloriam fecit Dominus: magnificentia sua a sæculo. ³ Dominantes in potestatibus suis, homines magni virtute et prudentia sua præditi, nuntiantes in prophetis dignitatem prophetarum: ⁴ et imperantes in præsentī populo, et virtute prudentiæ populis sanctissima verba: ⁵ in peritia sua requirentes modos musicos, et narrantes carmina Scripturarum: ⁶ homines divites in virtute, pulchritudinis studium habentes, pacificantes in domibus suis. ⁷ Omnes isti in generationibus gentis suæ gloriam adepti sunt, et in diebus suis habentur in laudibus. ⁸ Qui de illis nati sunt reliquerunt nomen narrandi laudes eorum. ⁹ Et sunt quorum non est memoria: perierunt quasi qui non fuerint: et nati sunt quasi non nati, et filii ipsorum

⁵⁰⁰ + **43.21 Gelu sicut salem**, etc. Id est, sterilitatem; ubi enim sal spargitur, sterilitas sequitur: diabolus vero per frigus infidelitatis terrena corda ad bona opera sterilia facit.

⁵⁰¹ + **43.24 Medicina**, etc. Omnis eloquentia deficit in comparatione ejus, nec sufficit virtutem ejus enarrare.

⁵⁰² + **43.26 Qui navigant mare**, etc. Multa sunt ad litteram pericula maris, et ibi mirabilia Dei opera in variis bestiis, sicut naturalium rerum scriptores tradiderunt. In mari quoque hujus mundi sunt multa monstra dæmoniorum et multæ eorum insidiæ.

⁵⁰³ + **43.34 Ne laboretis**, etc. RAB. Comprehendere quod est incomprehensibile. Unde non quæras opes ad quas pertingere non possis.

⁵⁰⁴ + **44.1 Laudemus viros**, etc. Moraliter disputando, allegoriamque et anagogem in plerisque tangendo, mysteria divini sacramenti edidit; nunde sanctis patribus narrare incipit. Parentes nostros. Patriarchas, qui divina locutione et visione fruebantur; et Prophetas, qui, Spiritu sancto repleti, multa Christi et Ecclesiæ mysteria præcinerunt.

cum ipsis. ¹⁰ Sed illi viri misericordiæ sunt, quorum pietates non defuerunt. ¹¹ Cum semine eorum permanent bona: ¹² hæreditas sancta nepotes eorum, et in testamentis stetit semen eorum: ⁵⁰⁵ ¹³ et filii eorum propter illos usque in æternum manent: semen eorum et gloria eorum non derelinquetur. ¹⁴ Corpora ipsorum in pace sepulta sunt, et nomen eorum vivit in generationem et generationem. ¹⁵ Sapientiam ipsorum narrent populi, et laudem eorum nuntiet ecclesia.] ¹⁶ [Enoch placuit Deo, et translatus est in paradisum, ut det gentibus pœnitentiam. ⁵⁰⁶ ¹⁷ Noë inventus est perfectus, justus, et in tempore iracundiæ factus est reconciliatio. ⁵⁰⁷ ¹⁸ Ideo dimissum est reliquum terræ, cum factum est diluvium. ¹⁹ Testamenta sæculi posita sunt apud illum, ne deleri possit diluvio omnis caro.] ²⁰ [Abraham magnus pater multitudinis gentium, et non est inventus similis illi in gloria: qui conservavit legem Excelsi, et fuit in testamento cum illo. ²¹ In carne ejus stare fecit testamentum, et in tentatione inventus est fidelis. ⁵⁰⁸ ²² Ideo jurejurando dedit illi gloriam in gente sua, crescere illum quasi terræ cumulum, ⁵⁰⁹ ²³ et ut stellas exaltare semen ejus, et hæreditare illos a mari usque ad mare, et a flumine usque ad terminos terræ. ²⁴ Et in Isaac eodem modo fecit, propter Abraham patrem ejus. ²⁵ Benedictionem omnium gentium dedit illi Dominus, et testamentum confirmavit super caput Jacob. ²⁶ Agnovit eum in benedictionibus suis, et dedit illi hæreditatem, et divisit illi partem in tribubus duodecim. ⁵¹⁰ ²⁷ Et conservavit illi homines misericordiæ, invenientes gratiam in oculis omnis carnis.]

45[Dilectus Deo et hominibus Moyses, cujus memoria in benedictione est. ² Similem illum fecit in gloria sanctorum, et magnificavit eum in timore inimicorum, et in verbis suis monstra placavit. ³ Glorificavit illum in conspectu regum, et jussit illi coram populo suo, et ostendit illi gloriam suam. ⁴ In fide et lenitate ipsius sanctum fecit illum, et elegit eum ex omni carne. ⁵ Audivit enim eum, et vocem ipsius, et induxit illum in nubem. ⁶ Et dedit illi coram præcepta, et legem vitæ et disciplinæ, docere Jacob testamentum suum, et judicia sua Israël.] ⁵¹¹ ⁷ [Excelsum fecit Aaron fratrem ejus, et

⁵⁰⁵ + **44.12 In Testamentis stetit**, etc. RAB. Hæc juxta historiam de patriarchis, etc., usque ad quando semen bonorum operum coelesti mercede compensabitur.

⁵⁰⁶ + **44.16 Henoeh placuit Deo**. Non ab Adam, etc., usque ad ut det hominibus consilium pœnitendi.

⁵⁰⁷ + **44.17 Noë inventus est**, etc. Quando pereunte mundo diluvio reservatus est, ut pœnitentiam gentibus prædicaret, et exemplo demonstraret quod qui Deo devote serviunt, ab æterno interitu liberantur. Cum eo Deus pactum statuit, ne ultra perderet aquis diluvii omnem carnem Gen. 17.. Significat autem rectores, qui inter fluctus sæculi arcam, id est Ecclesiam, regunt, et prædicant baptismum pœnitentiæ, orationibus et sacrificiis Deum placantes humano generi.

⁵⁰⁸ + **44.21 In carne ejus facit stare testamentum**, etc. RAB. Ut significaretur renovata natura nostra per baptismum Christi, post exspoliationem veteris hominis.

⁵⁰⁹ + **44.22 Ideo jurejurando**, etc. Duplex est promissio Abrahæ. In arena maris exprimuntur steriles Judæi; in similitudine stellarum, fideles Christiani, qui resurrectionis lumine coruscabunt sicut astra cœli.

⁵¹⁰ + **44.26 Et dedit illi hæreditatem**, etc. Gentilis populi, qui posterior ad gratiam fidei et baptismi regenerationem accessit, cui plenitudo paternæ benedictionis provenit.

⁵¹¹ + **45.6 Præcepta**. In monte Sinai, scilicet legem dedit ei et præcepta vitæ, cum eo loquens

similem sibi, de tribu Levi. ⁸ Statuit ei testamentum æternum, et dedit illi sacerdotium gentis, et beatificavit illum in gloria: ⁹ et circumcinxit eum zona gloriæ, et induit eum stolam gloriæ, et coronavit eum in vasis virtutis. ⁵¹² ¹⁰ Circumpedes, et femoralia, et humerale posuit ei: et cinxit illum tintinnabulis aureis plurimis in gyro: ¹¹ dare sonitum in incessu suo, auditum facere sonitum in templo in memoriam filiis gentis suæ. ¹² Stolam sanctam auro, et hyacintho, et purpura, opus textile viri sapientis, iudicio et veritate præditi: ¹³ torto cocco opus artificis gemmis pretiosis figuratis in ligatura auri, et opere lapidarii sculptis, in memoriam secundum numerum tribuum Israël. ¹⁴ Corona aurea super mitram ejus expressa signo sanctitatis, et gloria honoris: opus virtutis, et desideria oculorum ornata. ⁵¹³ ¹⁵ Sic pulchra ante ipsum non fuerunt talia usque ad originem. ¹⁶ Non est indutus illa alienigena aliquis, sed tantum filii ipsius soli, et nepotes ejus per omne tempus. ¹⁷ Sacrificia ipsius consumpta sunt igne quotidie. ⁵¹⁴ ¹⁸ Complevit Moyses manus ejus, et unxit illum oleo sancto. ¹⁹ Factum est illi in testamentum æternum, et semini ejus, sicut dies cæli, fungi sacerdotio, et habere laudem, et glorificare populum suum in nomine ejus. ²⁰ Ipsum elegit ab omni vivente, offerre sacrificium Deo, incensum, et bonum odorem, in memoriam placare pro populo suo: ²¹ et dedit illi in præceptis suis potestatem, in testamentis judiciorum: docere Jacob testimonia, et in lege sua lucem dare Israël. ²² Quia contra illum steterunt alieni, et propter invidiam circumdederunt illum homines in deserto, qui erant cum Dathan et Abiron, et congregatio Core in iracundia. ²³ Vidit Dominus Deus, et non placuit illi, et consumpti sunt in impetu iracundiæ. ²⁴ Fecit illis monstra, et consumpsit illos in flamma ignis. ²⁵ Et addidit Aaron gloriam, et dedit illi hæreditatem, et primitias frugum terræ divisit illi. ²⁶ Panem ipsis in primis paravit in satietatem: nam et sacrificia Domini edent, quæ dedit illi et semini ejus. ²⁷ Ceterum in terra gentes non hæreditabit, et pars non est illi in gente: ipse est enim pars ejus, et hæreditas.] ²⁸ [Phinees, filius Eleazari, tertius in gloria est, imitando eum in timore Domini, ⁵¹⁵ ²⁹ et stare in reverentia gentis: in bonitate et alacritate animæ suæ placuit Deo pro Israël. ³⁰ Ideo statuit illi testamentum pacis, principem sanctorum et gentis suæ, ut sit illi et semini ejus sacerdotii dignitas in æternum. ³¹ Et testamentum David regi filio Jesse de tribu Juda, hæreditas ipsi et semini ejus: ut daret sapientiam in cor nostrum, judicare gentem suam in justitia, ne abolerentur bona ipsorum: et

in nube.

⁵¹² + **45.9 Et circumcinxit eum,** etc. Describit ritum veteris sacerdotii et ornatum pontificis, quæ omnia figura erant Novi Testamenti, et veri sacerdotis Jesu Christi. Et induit. Vestimenta pontificis sunt opera virtutum: sapientia, doctrina.

⁵¹³ + **45.14 Corona aurea,** etc. In qua erat nomen omnipotentis Dei, quæ significat honorificentiam divinæ majestatis, quoniam super omnia statuere debemus, ut in omnibus actibus nostris et sermonibus honorificetur Deus per Jesum Christum, qui est caput nostrum I Petr. 4..

⁵¹⁴ + **45.17 Sacrificia.** RAB. Quomodo Moyses Aaron, etc., usque ad Christi enim sacerdotium et ritus sacrificiorum in æternum manebit.

⁵¹⁵ + **45.28 Phinees filius Eleazari.** ID. Phinees, sicut scriptum est in libro Numerorum Cap. 25., etc., usque ad ad montem fortitudinis, id est Christum, feliciter pervenit.

gloriam ipsorum in gentem eorum æternam fecit.] ⁵¹⁶

46[Fortis in bello Jesus Nave, successor Moysi in prophetis, qui fuit magnus secundum nomen suum, ⁵¹⁷ ² maximus in salutem electorum Dei, expugnare insurgentes hostes, ut consequeretur hæreditatem Israël. ³ Quam gloriam adeptus est in tollendo manus suas, et jactando contra civitates rhomphæas ! ⁴ Quis ante illum sic restitit? nam hostes ipse Dominus perduxit. ⁵¹⁸ ⁵ An non in iracundia ejus impeditus est sol, et una dies facta est quasi duo? ⁶ Invocavit Altissimum potentem, in oppugnando inimicos undique: et audivit illum magnus et sanctus Deus, in saxis grandinis virtutis valde fortis. ⁷ Impetum fecit contra gentem hostilem, et in descensu perdidit contrarios: ⁸ ut cognoscant gentes potentiam ejus, quia contra Deum pugnare non est facile. Et secutus est a tergo potentis: ⁹ et in diebus Moysi misericordiam fecit, ipse, et Caleb filius Jephone, stare contra hostem, et prohibere gentem a peccatis, et perfringere murmur malitiæ. ⁵¹⁹ ¹⁰ Et ipsi duo constituti a periculo liberati sunt a numero sexcentorum millium peditum, inducere illos in hæreditatem, in terram quæ manat lac et mel. ¹¹ Et dedit Dominus ipsi Caleb fortitudinem, et usque in senectutem permansit illi virtus, ut ascenderet in excelsum terræ locum, et semen ipsius obtinuit hæreditatem, ¹² ut viderent omnes filii Israël quia bonum est obsequi sancto Deo.] ¹³ [Et judices singuli suo nomine, quorum non est corruptum cor, qui non aversi sunt a Domino, ⁵²⁰ ¹⁴ ut sit memoria illorum in benedictione, et ossa eorum pullulent de loco suo: ⁵²¹ ¹⁵ et nomen eorum permaneat in æternum, permanens ad filios illorum, sanctorum virorum gloria.] ¹⁶ [Dilectus a Domino Deo suo Samuel, propheta Domini, renovavit imperium, et unxit principes in gente sua. ⁵²² ¹⁷ In lege Domini congregationem judicavit, et vidit Deus Jacob: et in fide sua probatus est propheta, ¹⁸ et cognitus est in verbis suis fidelis, quia vidit Deum lucis. ¹⁹ Et invocavit Dominum omnipotentem, in oppugnando hostes circumstantes undique, in oblatione agni inviolati. ²⁰ Et intonuit de cælo Dominus, et in sonitu magno auditam fecit vocem suam: ²¹ et contrivit principes Tyriorum, et omnes duces Philistiim: ²² et ante tempus finis vitæ suæ et sæculi, testimonium præbuit in conspectu Domini et christi: pecunias et usque ad calceamenta ab omni

⁵¹⁶ + **45.31 Et testamentum David.** ID. Significat quod David in distributione ministeriorum Dei, etc., usque ad et in tabernaculo ministrorum vices ordinavit.

⁵¹⁷ + **46.1 Fortis in bello Jesus Nave.** RAB. Jesus et opere et sermone Christum significat, etc., usque ad triumphans principatus et potestates in semetipso.

⁵¹⁸ + **46.4 Quis ante illum,** etc. ID. Quomodo in occurso Josue impeditus est sol, etc., usque ad breviabuntur in tempore perditionis.

⁵¹⁹ + **46.9 A peccatis.** Desperationis, quando exploratorum rumoribus auditis desperaverunt intrare terram.

⁵²⁰ + **46.13 Et judices singuli,** etc. RAB. Post Josue, successerunt judices qui populum Dei ab hostibus defendebant; et post Christi passionem, apostoli rectores Ecclesiæ Dei.

⁵²¹ + **46.14 Ut sit memoria illorum,** etc. Quia in recta fide perseveraverunt, ut memoria eorum perpetua benedictione firmaretur. Ossa. Robur bonorum operum mercede donatur, ut memoria nominis eorum ad posteros cum gloria transferatur.

⁵²² + **46.16 Dilectus a Domino,** etc. RAB. Narrat historia quod Dominus Samueli infanti, etc., usque ad pronuntiat malis rectoribus pœnam futuram et mortem perpetuam.

carne non accepit, et non accusavit illum homo. ²³ Et post hoc dormivit: et notum fecit regi, et ostendit illi finem vitæ suæ: et exaltavit vocem suam de terra in prophetia, delere impietatem gentis.]

47[Post hæc surrexit Nathan, propheta in diebus David. ⁵²³ ² Et quasi adeps separatus a carne, sic David a filiis Israël. ⁵²⁴ ³ Cum leonibus lusit quasi cum agnis, et in ursis similiter fecit sicut in agnis ovium, in juventute sua. ⁵²⁵ ⁴ Numquid non occidit gigantem, et abstulit opprobrium de gente? ⁵ In tollendo manum, saxo fundæ dejecit exultationem Goliæ: ⁶ nam invocavit Dominum omnipotentem, et dedit in dextera ejus tollere hominem fortem in bello, et exaltare cornu gentis suæ. ⁷ Sic in decem millibus glorificavit eum: et laudavit eum in benedictionibus Domini, in offerendo illi coronam gloriæ: ⁸ contrivit enim inimicos undique, et extirpavit Philisthiim contrarios usque in hodiernum diem: contrivit cornu ipsorum usque in æternum. ⁹ In omni opere dedit confessionem Sancto, et Excelso in verbo gloriæ. ¹⁰ De omni corde suo laudavit Dominum: et dilexit Deum, qui fecit illum, et dedit illi contra inimicos potentiam: ¹¹ et stare fecit cantores contra altare, et in sono eorum dulces fecit modos. ¹² Et dedit in celebrationibus decus, et ornavit tempora usque ad consummationem vitæ, ut laudarent nomen sanctum Domini, et amplificarent mane Dei sanctitatem. ¹³ Dominus purgavit peccata ipsius, et exaltavit in æternum cornu ejus: et dedit illi testamentum regni, et sedem gloriæ in Israël.] ¹⁴ [Post ipsum surrexit filius sensatus, et propter illum dejecit omnem potentiam inimicorum. ⁵²⁶ ¹⁵ Salomon imperavit in diebus pacis, cui subiecit Deus omnes hostes, ut conderet domum in nomine suo, et pararet sanctitatem in sempiternum. Quemadmodum eruditus es in juventute tua, ¹⁶ et impletus es, quasi flumen, sapientia, et terram rexit anima tua. ¹⁷ Et replesti in comparationibus ænigmata: ad insulas longe divulgatum est nomen tuum, et dilectus es in pace tua. ¹⁸ In cantilenis, et proverbiiis, et comparationibus, et interpretationibus, miratæ sunt terræ: ¹⁹ et in nomine Domini Dei, cui est cognomen Deus Israël. ²⁰ Collegisti quasi auricalcum aurum, et ut plumbum complesti argentum: ²¹ et inclinasti femora tua mulieribus: potestatem habuisti in corpore tuo. ²² Dedisti maculam in gloria tua, et profanasti semen tuum, inducere iracundiam ad liberos tuos, et incitari stultitiam tuam: ²³ ut faceres imperium bipartitum, et ex Ephraim imperare imperium durum. ⁵²⁷ ²⁴ Deus autem non derelinquet misericordiam suam: et non corrumpet, nec delebit opera sua, neque perdet a stirpe nepotes electi sui, et semen ejus

⁵²³ + **47.1 Post hæc surrexit Nathan.** Ad litteram, facta David commemorat, de quibus liber Regum et Paralipomenon plenissime narrant.

⁵²⁴ + **47.2 Quasi adeps.** Significat eum gratia Spiritus sancti repletum, a carnalium consortio vita et moribus separatum.

⁵²⁵ + **47.3 Cum leonibus lusit.** RAB. David significat Christum, etc., usque ad et dedit illi nomen, quod est super omne nomen.

⁵²⁶ + **47.14 Post ipsum surrexit filius sensatus.** ID. Mystice, Salomon, etc., usque ad sicut in una area bonos significant grana, malos vero palea.

⁵²⁷ + **47.23 Ut faceres imperium,** etc. ID. Quia decem tribus secutæ sunt Jeroboam, et duæ Roboam; de Ephraim fuit Jeroboam, qui primus in decem tribubus crudeliter regnavit.

qui diligit Dominum non corrumpet. ²⁵ Dedit autem reliquum Jacob, et David de ipsa stirpe. ²⁶ Et finem habuit Salomon cum patribus suis.] ²⁷ [Et dereliquit post se de semine suo, gentis stultitiam, ⁵²⁸ ²⁸ et imminutum a prudentia, Roboam, qui avertit gentem consilio suo: ⁵²⁹ ²⁹ et Jeroboam filium Nabat, qui peccare fecit Israël, et dedit viam peccandi Ephraim: et plurima redundaverunt peccata ipsorum. ³⁰ Valde averterunt illos a terra sua. ³¹ Et quæsivit omnes nequitias, usque dum perveniret ad illos defensio, et ab omnibus peccatis liberavit eos.]

48[Et surrexit Elias propheta quasi ignis, et verbum ipsius quasi facula ardebat. ⁵³⁰ ² Qui induxit in illos famem: et irritantes illum invidia sua pauci facti sunt: non enim poterant sustinere præcepta Domini. ⁵³¹ ³ Verbo Domini continuit cælum, et dejecit de cælo ignem ter. ⁴ Sic amplificatus est Elias in mirabilibus suis. Et quis potest similiter sic gloriari tibi? ⁵ qui sustulisti mortuum ab inferis de sorte mortis, in verbo Domini Dei: ⁶ qui dejecisti reges ad pernicem, et confregisti facile potentiam ipsorum, et gloriosos de lecto suo: ⁷ qui audis in Sina iudicium, et in Horeb iudicia defensionis: ⁸ qui ungis reges ad pœnitentiam, et prophetas facis successores post te: ⁹ qui receptus es in turbine ignis, in curru equorum igneorum: ¹⁰ qui scriptus es in iudiciis temporum, lenire iracundiam Domini, conciliare cor patris ad filium, et restituere tribus Jacob. ¹¹ Beati sunt qui te viderunt, et in amicitia tua decorati sunt. ¹² Nam nos vita vivimus tantum: post mortem autem non erit tale nomen nostrum.] ¹³ [Elias quidem in turbine tectus est, et in Eliseo completus est spiritus ejus: in diebus suis non pertimuit principem, et potentia nemo vicit illum: ⁵³² ¹⁴ nec superavit illum verbum aliquod, et mortuum prophetavit corpus ejus. ¹⁵ In vita sua fecit monstra, et in morte mirabilia operatus est.] ¹⁶ [In omnibus istis non pœnituit populus, et non recesserunt a peccatis suis, usque dum ejeti sunt de terra sua, et dispersi sunt in omnem terram: ¹⁷ et relicta est gens perpauca, et princeps in domo David. ⁵³³ ¹⁸ Quidam ipsorum fecerunt quod placeret Deo: alii autem multa commiserunt peccata. ¹⁹ Ezechias munivit civitatem suam, et induxit in medium ipsius aquam: et fodit ferro rupem, et ædificavit ad aquam

⁵²⁸ + **47.27 Et dereliquit post se**, etc. ID. Mystice, Roboam, qui interpretatur latitudo populi, etc., usque ad in regula catholicæ fidei permansit.

⁵²⁹ + **47.28 Avertit gentem consilio suo**. Credens scilicet consilio juvenum.

⁵³⁰ + **48.1 Et surrexit Elias**. RAB. Qui duos quinquagenarios ab Ozia rege missos cœlesti igne combussit IV Reg. 1..

⁵³¹ + **48.2 Qui induxit**. ID. Mystice, fames trium annorum verbi Dei et fidei Trinitatis inedium figuravit, etc., usque ad ut postea veniret qui nec translatus nec subvectus, cœlum æthereum sua virtute penetraret.

⁵³² + **48.13 Elias quidem in turbine**, etc. ID. Cum non sit discipulus super magistrum, etc., usque ad qui enim firma fide tangit mortem Christi, particeps est ejus resurrectionis. In Eliseo completus. Qui oravit die: Fiat spiritus tuus duplex in me, et obtinuit. Unde in patientia et virtute insuperabilis fuit, qui in vita et in morte multa signa fecit.

⁵³³ + **48.17 Relicta est gens perpauca**. Quia domus David, et tribus Juda, et Benjamin, non penitus abjecerunt culturam Dei, sed alii eorum fuerunt idolatræ, sicut Joram et Achaz: alii adhæserunt Deo, sicut Ezechias et Josias.

puteum. ⁵³⁴ ²⁰ In diebus ipsius ascendit Sennacherib, et misit Rabsacen, et sustulit manum suam contra illos: et extulit manum suam in Sion, et superbus factus est potentia sua. ²¹ Tunc mota sunt corda et manus ipsorum: et doluerunt quasi parturientes mulieres. ²² Et invocaverunt Dominum misericordem, et expandentes manus suas extulerunt ad cælum: et Sanctus, Dominus Deus, audivit cito vocem ipsorum. ²³ Non est commemoratus peccatorum illorum, neque dedit illos inimicis suis: sed purgavit eos in manu Isaiaë sancti prophetæ. ²⁴ Dejecit castra Assyriorum, et contrivit illos angelus Domini: ²⁵ nam fecit Ezechias quod placuit Deo, et fortiter ivit in via David patris sui, quam mandavit illi Isaïas, propheta magnus, et fidelis in conspectu Dei. ²⁶ In diebus ipsius retro rediit sol, et addidit regi vitam. ²⁷ Spiritu magno vidit ultima, et consolatus est lugentes in Sion usque in sempiternum. ²⁸ Ostendit futura, et abscondita antequam evenirent.]

49[Memoria Josiaë in compositionem odoris facta opus pigmentarii. ⁵³⁵ ² In omni ore quasi mel indulcabitur ejus memoria, et ut musica in convivio vini. ³ Ipse est directus divinitus in pœnitentiam gentis, et tulit abominationes impietatis. ⁴ Et gubernavit ad Dominum cor ipsius, et in diebus peccatorum corroboravit pietatem.] ⁵ [Præter David et Ezechiam et Josiam, omnes peccatum commiserunt: ⁵³⁶ ⁶ nam reliquerunt legem Altissimi reges Juda, et contempserunt timorem Dei. ⁷ Dederunt enim regnum suum aliis, et gloriam suam alienigenæ genti. ⁸ Incenderunt electam sanctitatis civitatem, et desertas fecerunt vias ipsius in manu Jeremiaë. ⁵³⁷ ⁹ Nam male tractaverunt illum qui a ventre matris consecratus est propheta, evertere, et eruere, et perdere, et iterum ædificare, et renovare: ¹⁰ Ezechiel, qui vidit conspectum gloriæ quam ostendit illi in curru cherubim. ⁵³⁸ ¹¹ Nam commemoratus est inimicorum in imbre, benefacere illis qui ostenderunt rectas vias. ⁵³⁹ ¹² Et duodecim prophetarum ossa pullulent de loco suo: nam corroboraverunt Jacob, et redemerunt se in fide virtutis.] ¹³ [Quomodo amplificemus Zorobabel? nam et ipse quasi signum in dextera manu: ⁵⁴⁰ ¹⁴ sic et Jesum filium Josedec, qui in diebus suis ædificaverunt domum, et exaltaverunt templum sanctum Domino, paratum in gloriam sempiternam.

⁵³⁴ + **48.19 Ezechias munivit civitatem suam**, etc. RAB. Quod Ezechias fontem obturat, etc., usque ad civitatem extinctis hostibus liberatam in Paralipomenon plene ostenditur.

⁵³⁵ + **49.1 Memoria Josiaë**. RAB. Memoria Josiaë regis, etc., usque ad ipse zelo Dei mundat terram Judæ et Jerusalem ab omnibus abominationibus, qui ait: Zelus domus tuæ comedit me.

⁵³⁶ + **49.5 Præter David, et Ezechiam, et Josiam**, etc. Hi tres comparatione aliorum non dicuntur peccasse. Quod enim peccaverunt, condigna pœnitentia deleverunt, et devotione et pietate Deo placuerunt.

⁵³⁷ + **49.8 Incenderunt electa civitatem sanctitatis**, etc. ID. Quidam hunc locum in persona Christi intelligunt, etc., usque ad his autem destructis, ædificavit Ecclesiam Dei.

⁵³⁸ + **49.10 Ezechiel qui vidit**, etc. ID. Mystice, Ezechiel, etc., usque ad et pœnitentibus prædixisse remedia.

⁵³⁹ + **49.11 In imbre**. Significat quod prædicaverit super peccatores venturam esse pluviam vindictæ, et per viam mandatorum Dei gradientibus promiserit consolationem misericordiæ.

⁵⁴⁰ + **49.13 Nam et ipse**, etc. Quia Christum signat, qui est imago Dei: ut quicumque crediderit in Deum, hic quasi annulo signetur.

⁵⁴¹ ¹⁵ Et Nehemias in memoriam multi temporis, qui erexit nobis muros
eversos, et stare fecit portas et seras, qui erexit domos nostras.] ⁵⁴² ¹⁶
[Nemo natus est in terra qualis Henoch, nam et ipse receptus est a terra: ⁵⁴³
¹⁷ neque ut Joseph, qui natus est homo princeps fratrum, firmamentum
gentis, rector fratrum, stabilimentum populi: ⁵⁴⁴ ¹⁸ et ossa ipsius visitata
sunt, et post mortem prophetaverunt. ⁵⁴⁵ ¹⁹ Seth et Sem apud homines
gloriam adepti sunt, et super omnem animam in origine Adam.] ⁵⁴⁶

50[Simon, Oniæ filius, sacerdos magnus, qui in vita sua suffulsit domum, et
in diebus suis corroboravit templum. ⁵⁴⁷ ² Templi etiam altitudo ab ipso
fundata est, duplex ædificatio, et excelsi parietes templi. ³ In diebus ipsius
emanaverunt putei aquarum, et quasi mare adimpleti sunt supra modum. ⁵⁴⁸
⁴ Qui curavit gentem suam, et liberavit eam a perditione: ⁵ qui prævaluit
amplificare civitatem, qui adeptus est gloriam in conversatione gentis, et
ingressum domus et atrii amplificavit. ⁵⁴⁹ ⁶ Quasi stella matutina in medio
nebulæ, et quasi luna plena, in diebus suis lucet: ⁷ et quasi sol refulgens, sic
ille effulsit in templo Dei. ⁸ Quasi arcus refulgens inter nebulas gloriæ, et
quasi flos rosarum in diebus vernis, et quasi lilia quæ sunt in transitu aquæ, et
quasi thus redolens in diebus ætatis: ⁹ quasi ignis effulgens, et thus ardens
in igne: ¹⁰ quasi vas auri solidum, ornatum omni lapide pretioso: ¹¹ quasi
oliva pullulans, et cypressus in altitudinem se extollens, in accipiendo ipsum
stolam gloriæ, et vestiri eum in consummationem virtutis. ⁵⁵⁰ ¹² In ascensu
altaris sancti gloriam dedit sanctitatis amictum. ¹³ In accipiendo autem
partes de manu sacerdotum, et ipse stans juxta aram: et circa illum corona
fratrum: quasi plantatio cedri in monte Libano, ⁵⁵¹ ¹⁴ sic circa illum

⁵⁴¹ + **49.14 Et Jesum filium Josedec.** Quia per gratiam Jesu Christi, qui est rex noster et sacerdos, post captivitatem diabolicæ oppressionis, reædificatur Ecclesia.

⁵⁴² + **49.15 Nehemias.** RAB. Consolator Deus, vel consolatus a Domino, etc., usque ad qui ædificat civitatem Dei, id est Ecclesiam, et consolatur moerentes.

⁵⁴³ + **49.16 Nemo,** etc. Enoch, dedicatio. Hic Christum significat, qui ædificavit et consecravit Ecclesiam sanguine suo; qui sine peccato venit in mundum, et cum gloria suscepturus est in cælum.

⁵⁴⁴ + **49.17 Ut Joseph.** Joseph, sicut Jacob pater ejus, terram promissionis desiderabat, Ægyptum detestabatur; instruens nos ut desideremus terram viventium, ut quiescamus in pace.

⁵⁴⁵ + **49.18 Et ossa ipsius visitata sunt.** RAB. Significat quod Joseph, etc., usque ad et sepelierunt in Sichem, quæ est Neapolis, urbs Samaritanorum.

⁵⁴⁶ + **49.19 Seth et Sem,** etc. Seth filius Adam, et Sem primogenitus Nœ, tam fide quam moribus hominibus sui temporis prælati sunt; in quibus Christus significatur, qui Deus et homo est.

⁵⁴⁷ + **50.1 Simon Oniæ filius.** RAB. Ad homines in tempore suo pervenit, etc., usque ad cum vitam Simonis et mores tam expresse describat Jesus.

⁵⁴⁸ + **50.3 Putei aquarum.** Profunditates Scripturarum, quæ in divinis libris sub figuris latent, sed ore prædicatorum redundant, quasi mare ad saturitatem plurimorum.

⁵⁴⁹ + **50.5 Et ingressum domus atrii amplificavit.** Quia in rudibus, quos signat atrium; et in perfectis, qui signantur per domum, magistrorum excrescit meritum.

⁵⁵⁰ + **50.11 In accipiendo ipsum stolam,** etc. Ordo prædicatorum accipiendo stolam gloriæ, et vestiendo se consummatione virtutum, judicium dignitatis suæ, et ornatum fidei, et vestitum bonæ operationis demonstrat. Hæc enim debent in sacerdotibus apparere, ut digne possint docere.

⁵⁵¹ + **50.13 In accipiendo autem partes de manu sacerdotis.** Partes accipit de manu sacerdotis, qui bonæ operationis actum exigit a ministris.

steterunt quasi rami palmæ: et omnes filii Aaron in gloria sua. ¹⁵ Oblatio autem Domini in manibus ipsorum coram omni synagoga Israël: et consummatione fungens in ara, amplificare oblationem excelsi Regis, ⁵⁵² ¹⁶ porrexit manum suam in libatione, et libavit de sanguine uvæ. ¹⁷ Effudit in fundamento altaris odorem divinum excelso Principi. ⁵⁵³ ¹⁸ Tunc exclamaverunt filii Aaron, in tubis productilibus sonuerunt: et auditam fecerunt vocem magnam in memoriam coram Deo. ⁵⁵⁴ ¹⁹ Tunc omnis populus simul properaverunt, et ceciderunt in faciem super terram, adorare Dominum Deum suum, et dare preces omnipotenti Deo excelso. ⁵⁵⁵ ²⁰ Et amplificaverunt psallentes in vocibus suis, et in magna domo auctus est sonus suavitatis plenus. ²¹ Et rogavit populus Dominum excelsum in prece, usque dum perfectus est honor Domini, et munus suum perfecerunt. ⁵⁵⁶ ²² Tunc descendens, manus suas extulit in omne congregationem filiorum Israël, dare gloriam Deo a labiis suis, et in nomine ipsius gloriari: ⁵⁵⁷ ²³ et iteravit orationem suam, volens ostendere virtutem Dei. ⁵⁵⁸ ²⁴ Et nunc orate Deum omnium, qui magna fecit in omni terra, qui auxit dies nostros a ventre matris nostræ, et fecit nobiscum secundum suam misericordiam: ²⁵ det nobis jucunditatem cordis, et fieri pacem in diebus nostris in Israël per dies sempiternos: ²⁶ credere Israël nobiscum esse Dei misericordiam, ut liberet nos in diebus suis.] ²⁷ [Duas gentes odit anima mea: tertia autem non est gens quam oderim: ⁵⁵⁹ ²⁸ qui sedent in monte Seir, et Philisthiim, et stultus populus qui habitat in Sichimis.] ²⁹ [Doctrinam sapientiæ et disciplinæ scripsit in codice isto Jesus, filius Sirach, Jerosolymita, qui renovavit sapientiam de corde suo. ⁵⁶⁰ ³⁰ Beatus qui in istis versatur bonis: qui ponit

⁵⁵² + **50.15 Et consummatione fungens in ara.** Consummata oblatio datur excelso Regi, quando corpus Christi offertur Deo.

⁵⁵³ + **50.17 Effudit in fundamento.** In commemorationem Christi, qui est fundamentum Ecclesiæ, hujus oblationis est odor suavissimus Deo omnipotenti.

⁵⁵⁴ + **50.18 Tunc exclamaverunt filii Aaron.** Christi sacerdotes prædicationem exhibuerunt per passionem consummatam. Ductiles tubæ bene dicuntur, quia prædicatores tanto crescunt quanto tribulationum malleis percutiuntur.

⁵⁵⁵ + **50.19 Tunc omnis populus,** etc. Cum officium ecclesiasticum per ministros altaris agitur in memoriam Christi, populus, ad laudem Dei provocatus, prosternit se in faciem, id est, cordis sui exhibet humilitatem. Dare preces Omnipotenti. Quia quidquid amore Dei agitur, coram Deo est oratio et odor suavitatis; quia omnis Ecclesia satagit ut perseveret in prece usque ad finem mundi, quando corpus Christi in incorruptione honorabitur, et membra capiti suo conjungentur.

⁵⁵⁶ + **50.21 Et rogavit populus,** etc. RAB. Quia quidquid in unitate fidei Deo offertur, apud eum recipitur; quidquid extra, impietati deputatur. Magnus fit in Ecclesia sonus, quando orantibus sacerdotibus et benedicientibus respondet omnis populus: Amen: qui sonus tam ad clamorem vocis quam ad devotionem cordis pertinet.

⁵⁵⁷ + **50.22 Tunc descendens,** etc. Cœtus sanctorum exsultans. Extulit. Quando gratias agit pro perfectione laboris in salute universi populi, tunc laudes multiplicat, orationem iterat, quia nunquam a laudibus cessat.

⁵⁵⁸ + **50.23 Ostendere virtutem Dei.** Prædicare scilicet misericordiam ejus, qui dat nobis jucunditatem cordis, et pacem in temporibus æternis, ut omnes viri Israël, et amatores Regis æterni, prædicent potentiam et bonitatem Dei in liberatione populi sui.

⁵⁵⁹ + **50.27 Duas gentes,** etc. Ruina duplex, gentilitas scilicet, quæ idololatria polluta est et conversatione vana.

⁵⁶⁰ + **50.29 Doctrinam sapientiæ,** etc. Opus suum commendat, ostendens quam utile sit legenti, meditati et operanti.

illa in corde suo, sapiens erit semper. ³¹ Si enim hæc fecerit, ad omnia valebit, quia lux Dei vestigium ejus est.]

51 Oratio Jesu filii Sirach. [Confitebor tibi, Domine rex, et collaudabo te Deum salvatorem meum. ⁵⁶¹ ² Confitebor nomini tuo, quoniam adjutor et protector factus es mihi, ³ et liberasti corpus meum a perditione: a laqueo linguæ iniquæ, et a labiis operantium mendacium: et in conspectu astantium factus es mihi adjutor. ⁴ Et liberasti me, secundum multitudinem misericordiæ nominis tui, a rugientibus præparatis ad escam: ⁵ de manibus quærentium animam meam, et de portis tribulationum quæ circumdederunt me; ⁵⁶² ⁶ a pressura flammæ quæ circumdedit me, et in medio ignis non sum æstuatus; ⁵⁶³ ⁷ de altitudine ventris inferi, et a lingua coinquinata, et a verbo mendacii, a rege iniquo, et a lingua injusta. ⁸ Laudabit usque ad mortem anima mea Dominum, ⁹ et vita mea appropinquans erat in inferno deorsum. ⁵⁶⁴ ¹⁰ Circumdederunt me undique, et non erat qui adjuvaret: respiciens eram ad adjutorium hominum, et non erat. ⁵⁶⁵ ¹¹ Memoratus sum misericordiæ tuæ Domine, et operationis tuæ, quæ a sæculo sunt: ¹² quoniam eruis sustinentes te, Domine, et liberas eos de manibus gentium. ¹³ Exaltasti super terram habitationem meam, et pro morte defluente deprecatus sum. ¹⁴ Invocavi Dominum patrem Domini mei, ut non derelinquat me in die tribulationis meæ, et in tempore superbiorum, sine adjutorio. ¹⁵ Laudabo nomen tuum assidue, et collaudabo illud in confessione: et exaudita est oratio mea, ¹⁶ et liberasti me de perditione, et eripuisti me de tempore iniquo. ¹⁷ Propterea confitebor, et laudem dicam tibi, et benedicam nomini Domini.] ¹⁸ [Cum adhuc junior essem, priusquam oberrarem, quæsivi sapientiam palam in oratione mea. ¹⁹ Ante templum postulabam pro illis, et usque in novissimis inquiram eam: et effloruit tamquam præcox uva. ²⁰ Lætatum est cor meum in ea: ambulavit pes meus iter rectum: a juventute mea investigabam eam. ²¹ Inclinavi modico aurem meam, et excepi illam. ²² Multam inveni in meipso sapientiam, et multum profeci in ea. ²³ Danti mihi sapientiam dabo gloriam: ²⁴ consiliatus sum enim ut facerem illam. Zelatus sum bonum, et non confundar. ²⁵ Colluctata est anima mea in illa, et in faciendo eam confirmatus sum. ²⁶ Manus meas extendi in altum, et

⁵⁶¹ + **51.1 Oratio Jesu filii Sirach.** Melius ad totam Ecclesiam refertur, quam ad unam personam, quia in ea multæ species tribulationum et diversa solatia describuntur. Confitebor tibi, Domine rex. RAB. Jesus Christus adjutor et protector est sponsæ suæ, qui tradidit semetipsum pro ea, ut liberaret eam a perditione originalis peccati.

⁵⁶² + **51.5 Portis tribulationum.** Hæc sunt ora principum et tyrannorum, unde minæ prodeunt et fraudulentia, quæ servos Dei negare fidem compellunt.

⁵⁶³ + **51.6 A pressura flammæ.** Hoc tribus pueris contigit in camino ignis corporaliter; sed omnes sancti ab æstu persecutionis liberantur spiritualiter.

⁵⁶⁴ + **51.9 Et vita mea appropinquans erat inferno.** Quia vita carnis quotidie deficiendo ad mortem tendit. Mortem enim infernum vocat, quia mors carnis, primi peccati vindicta est, sicut infernus peccantium animarum pœna perpetua.

⁵⁶⁵ + **51.10 Circumdederunt me undique,** etc. Videns Ecclesia se ab hostibus circumdari, et humanum deesse solatium, a Deo quærit adjutorium, a quo est omne bonum, cui attribuit quod liberatur ab inimicis.